

WANTOK


NIUSPEPA BILONG YUMI OL PAPUA NIUGINI STRETI - 27 VIA NAU

28 pes

Namba 1,216

Wik i stat long Fonde Oktoba 16, 1997

50 toea



KANAGE

"Em nau,
narapela wik
bilong mi ken"



Kanage em kuk boi long mes bilong ol ami. Wanpela taim em i kukim ol sosis long mes. Em i kukim ol sosis pinis na sevim long ol ami long mes na ol i kam sindaun na kaikai. Kanage yet i aigris tru long kaikai wanpela sosis tu olsem na em kisim tupela sosis long fraipan na i laik kaikai. Tasol sem taim bos i kam olsem na em kisim na haitim long tupela sait poket bilong em. Man sosis i kukim tupela sait lek bilong Kanage na em i kalap kalap na mekim nabaut i stap. Taim bos bilong ami askim Kanage long watpo na em i kalap kalap, Kanage i pilim bikpela pen pinis olsem na em singaut olsem, "bos o, olgeta ami ya i kaikai sosis bilong mi olsem na mi amamas nogut tru ya." Taim ol ami long mes i harim olsem na lukim olsem Kanage i wok long amamas na kalap kalap, ol i belhat nogut tru na tromoi olgeta sosis i kam bek long Kanage na tok, "yu tasol i gat sosis na mipela nogat a?". Ol soldia boi i tok olsem na dring sup tasol na go ausait long mes.

WINA BILONG DISPELA WIK EM

**Graham Ramban
Madang**

Sapos yu ting yu gat wanpela gutpela pani stori, orait katim hap pepa antap i makim "Mutrus Kanage bilong dispela wik" na salim wantaim stori bilong yu i kam long WANTOK NIUSPEPA, P.O. BOX 1982 BOROKO PNG.

Putim nem na adres bilong yu long pas na bai yu gat sans long kamap wina bilong "MUTRUS KANAGE BILONG DISPELA WIK" na winim wanpela praiz, SANS, YAH!

Stori na nem bilong yu bai kamaut long wanwan wik so noken lus tingting long baim Wantok niuspepa na painimaut!

SEKIM NEM BILONG
TUPELA ARAPELA WINA
LONG PES 12




Kenel Salamos ting ami laik rausim gavman

WENCESLAUS MAGUN i raitim


Liutenen Kolonel Walter Salamos i tokim namba tu Sandlain Enkwairi olsem insait long palamen miting long Tunde Mas 25, taim Gavana bilong Nesenel Kapitel Distrik (NCD) Bill Skate nau Praim Minista, i muvim mosen olsem Gavman i mas risain, tasol Gavman i no risain, ol ami i banisim haus palamen na pretim gavman long risain.

QC Ian Molloy i laik kisim tingting bilong Mista Salamos long dispela tok sapos i tru na Mista Salamos i tok em i ting dispela em i tru. Kolones Salamos i tokim Enkwairi aninit long jas Kubulan Los long dispela wik.

QC Molloy i tok, long dispela de ol ami i pulapim ol ka bilong ol ami, na salim sampela ami ka bilong i go kisim ol man nating na i go long palamen bilong sapatim ol ami long pretim ol gavman lain long risain. Long sem taim ol ami i salim wanpela helikopta long ron antap long palamen haus. Em i tok, long dispela taim tu ol ami i bin karim gan na i go long palamen. Mista Molloy i go het na tokim Komisen olsem Meja Walter Enuma na ol ami wantaim gan i banisim haus palamen na traim pretim ol gavman memba long senisim disisen bilong ol long mekim bai Gavman lain i risain. Em i tokim Komisen olsem dispela



• Jerry Singiok.



• Meja Walter Enuma.

Kot bilong Sandlain

ol samting i kamap bikos i gat man i givim oda long ol ami long mekim. I luk olsem Mista Molloy i gat laik long digim aut man husat i givim oda long ol ami bilong mekim ol dispela pasin. Taim em i askim Mista Salamos sapos dispela em i tru, Mista Salamos i tokim Komisen olsem ol dispela tok tok em i tru.

Enkwairi i harim tu olsem Lutenen Kolonel Walter Salamos, i traim long rausim ol praiwet ami bilong Sandline long kalabus bilong ol PNGDF long Taurama bareks tasol ol ami i stapim em long Tunde Mas 18, 1997.

"Mi bin kisim oda i kam long olpela Difens Minista, Mathias Ijape long painimaut we ol Sandlain eksekutiv i stap na long rausim ol i go bek long haus bilong ol. Bihain long mi painim aut olsem ol i stap long Taurama Bareks, mi yet i go na stretim toktok bilong

poin bilong gan na tokim mi long go bek long Murray Bareks. Na ol i kisim ol praiwet ami bilong Sandline i go bek long haus kalabus long Taurama bareks. Long dispela taim mi save olsem ol ami i salensim pawa bilong mi na mi nogat moa pawa," Mista Salamos i tok.

Mista Salamos em i Siv Ov Operesens. Olsem Siv Ov Operesens, em i gat wok bilong lukautim olgeta operesen bilong Difens Fos. Em i gat

wok bilong mekim ol plen na lukim olsem ol dispela pien i go het na kamap. Long taim ol ami i holim pas ol praiwet ami bilong Sandlain, Mista Salamos i tok em i kisim tok-save i kam long olpela komanda bilong ol ami, Mista Singiok olsem em i mas singautim ol bos bilong praiwet ami bilong Sandline long kam na holim wanpela miting long Flag Haus long 7 kilok long nait wantaim olpela ami komanda. Taim foapela bos bilong ol Sandlain praiwet ami i kamap, ol ami i tokim Mista Salamos long stap ausait long Flag Haus na ol Sandlain ami tasol bai go insait. "Long ausait mi inap harim ol ami i brukim triga bilong gan na mi harim tu olpela ami bos Singiok i singaut, 'You are under arrest... You are under arrest' o mipela i kalabusim yupela," Mista Salamos i tok. Em i tokim Komisen olsem em i no lukim Mista Singiok long ai bilong em, tasol em i bilip olsem Mista Singiok i mekim dispela toktok.

rausim ol," Mista Salamos i tok.

Mista Salamos i tok, em i go long singel haus bilong ol ami long Taurama na i toktok wantaim Brigadia Van Den Berg wanpela bos bilong ol Sandlain praiwet ami olsem olpela Minista bilong ol ami, Mista Ijape i salim em i kam bilong rausim ol long kalabus. Long dispela taim, Mista Salamos i tokim tu Komanding Opisa bilong Fes Batalion Liutenen Kolonel Kanene, Meja Walter Enuma na Major Toropo na ol arapela opisa husat i wok insait long Operesen Rausim Kwik, olsem Mista Ijape i askim em long kam kisim ol praiwet ami bilong Sandline i go bek long haus.


Em i tok, bihain long sampela taim ol ami i rausim ol na i givim em wanpela ami ka bilong kisim ol Sandlain praiwet ami i go. "Taim mi draiv i go ausait klostu long geit bilong Taurama Bareks, sampela ami i stapim mipela long

• Lo na Oda hevi
bikpela long Mosbi. p2

• 300,000 manmeri
bungim hevi. p3

• Moa trabel long boda. p5

Neks wik
Kisim fri pulaut ful kala 1998
Cambridge kalenda



MUTRUS

MAJOR SPONSA BILONG RAGBY LEAGUE INSAIT LONG PAPUA NIUGINI

GOVERNMENT WARNING: SMOKING IS DANGEROUS TO HEALTH

PLIS RIPOT

Hagen, Westen Hailans:

Lokol level gavman ileksen we ol i holim long dispela taim i kamapim hevi na pait long planti hap bilong hailans rijon.

Plis ripot i tokaut olsem sampela man i belhat long risal bilong ileksen na ol i bagarapim Wapenamanda plis stesen na Enga distrik opis long dispela wik.

Ripot i tok belhat i wokim ol pipel bilong ol ples klostu long stesen na distrik opis i go insait long plis stesen, brukim na bagarapim ol sia, tebol long opis bilong komanda na kriminel investigesen opis. Ol i wok long go long bareks tasol ol bin kisim moa plisman long Wabag na salim ol long daunim dispela hevi.

Provinsal Plis Komanda John Wakon i tok insait long dispela hevi ol bin bagarapim planti bokis wantaim ol vot pepa insait long ol. Hevi long wankain samting i kamap tu long Porgera taun.

Ripot i tok olsem hevi na pait i kamap tu long Westen na Sauten Hailans na Simbu provins.

Plis i ripotim tu olsem wanpela kendidet i kukim haus bilong narapela man husat i sanap long resis bilong Lokol Level gavman ileksen.

Popondetta, Oro:

Sampela raskol i bin bagarapim wanpela mama na pikinini meri bilong em long Popondetta las Fraide.

Plis long Popondetta i ripotim olsem birua ya i kamap long haus bilong ol taim sampela raskol i go insait long haus taim mama na pikinini i slip. Pikinini meri i gat 16 krismas.

Ripot i tok siksipela raskol i bin rausim luva glas long toilet bilong haus na go insait. Tupela meri i no luksave long ol man bikos ol i haitim pes wantaim klos. Ol bin pasim pes bilong tupela mama wantaim klos na bagarapim ol, plis i ripotim. Ol bin kisim tupela mama i go long haus sik bihain long bagrap.

Provinsal Plis Komanda Lincoln Gerari i sutim tok kriminel pasin i wok long go bikpela long Popondetta bihain long ol i lusim 24 kalabus lain long mun Ogas. Gavman i bin givim tok orait long lusim ol dispela kalabus lain i go fri bikos Biru haus kalabus long hap i no gutpela. Planti kalabus lain i kisim ol sik olsem malaria sik pekpek blut na ol kain moa olsem.

Mista Gerari i tok em i odaim plis long nuken isi long ol raskol na long sut long kilim husat man i mekim nabaut.

Manus:

Wanpela hai skul tisa bilong Icom Hai skul long Manus i stap nau long haus sik bihain long sampela man i paitim em. Tupela narapela i bin kisim bagrap.

Provinsal Plis Komanda bilong Manus, Lawrence Tiyonei i tok sampela lain man i putim rotblok na stapim skul trak long Momote-Lorengau Haiwe long las wiken na kikim tripela tisa na paitim ol. Ol tisa i wok long go bek long skul bihain long ol i bungim paiauw.

Mista Tiyonei i tok ol papamama bilong Lorengau na Lou Ailan i putim strongpela komplek na 12-pela man bilong Lou Ailan i givim ol yet long han bilong plis tasol ol i no putim sas long ol yet.

Mista Tiyonei i tok ol man i bin bagarapim skul trak tu. Em i tok ol i no klia long wanem as tru na ol i wokim dispela pasin tasol ol lain bilong em i karimaut ol wok painimaut yet.

Bikhet pasin i go bikpela long Mosbi

RIPOT bilong ol pasin raskel i wok long go bikpela gen insait long biktaun Mosbi long taim kefiu i bin stop long mun Julai.

Plis i ripot i soim olsem planti raskel pasin we i sut long stilim ol ka, hensapim ol manmeri na stilim mani na arapela raskel pasin i wok long kamap planti. Tupela wik i go pinis insait long Mosbi siti, rekot long 14 raskel pasin i bin kamap long wanpela wiken tasol.

Bos bilong plis long Mosbi naSauten rijon, Asisten

Komisina Sam Inguba i tok ol manmeri long Mosbi i mas was gut long ol yet na mekim wok na raun bilong ol. Ol i mas was gut long ol yet long taim ol i mekim samting bikos raskel pasin i wok long kamap bikpela gen.

Mista Inguba i mekim dispela toktok bihain long ol raskel i bin kilim wanpela Australia man long hotel rum bilong em long Sarere tupela wik i go pinis. Ol i bin kilim man ya na givim bagarap tu long meri bilong em. Tasol em i hariap long go

daun long Australia long kisim marasin na i orait.

Mista Inguba i no tokaut long wanem kain samting bai ol plisman i mekim. Tasol ol bai mekim wok painimaut bilong ol i go het long dispela birua na tu mekim wok bilong ol yet long stapim hevi bilong lo na oda long siti. Em i askim ol manmeri long wok klostu wantaim ol plisman long ripot long wanem kain hevi o birua pasin ol raskel i kamapim na ripot tu long plis sapos ol i klia long ol dispela kain man nogut.

Mista Inguba i tok i gat wanwan sekyuriti kampani i save mekim gut wok bilong ol. Ol i save hariap long ripot long plis na ol i save wok klostu wantaim ol plisman long stapim na holim ol raskel long kamapim ol birua na stil pasin. Tasol em i tok i gat sampela sekyuriti grup husat i no save wok bung wantaim ol plisman. Na dispela em wanpela hevi tu bilong ol plis long kisim sapot na helpim i kam long mekim gut wok bilong karimaut lo na oda long siti, Mista Inguba i tok.

Wol Fud De i kamap long Markham tude



• Sir Michael Somare, Philip Holzknicht, Gavana Luther Wenge, Dr Chris DeKuka na ROC opisel i kaikai wotamelon long Bubia stesin long Lae.

BARBARA MASIKE i raitim

TUDE Oktoba 16 em Wol Fud Dei na Agrikalsa Minista Andrew Baing i toktok strong olsem ol ples i mas gat gutpela wara saplai, irigeson na we bilong skelim wara long kamapim gutpela na inap kaikai.

Minista Baing i bai mekim dispela toktok tude long Mutzing long Kaiapit distrik we Dipatrimen bilong Agrikalsa bai bung long makim Wol Fud De.

Long planti kantri husat i memba bilong United Nations ol i save luksave long Wol Fud De wantaim ol kain spesel wok long kamapim pablik awenes long pasin bilong kamapim na skelim inap kaikai long rausim ol birua na wari i save kamap taim kaikai i sot.

Long Papua Niugini yet, pro-

grek bilong makim Wol Fud De bai kamap long long Markham Veli we Fud na Agrikalsa Ogenaisesen (FAO) i gat wanpela pailot projek i wok long kamap.

Dispela pailot projek em i kamap long wanpela program i wok long kamap long 19 kantri long Wol na PNG i wanpela bilong ol.

Long tude, ol deligesen i kamap long Mutzing Agrikalsa stesin long makim Wol Fud De bai sekim tu wok kamap bilong dispela projek na painimaut sapos dispela program i ken go long ol arapela hap bilong kantri.

Tasol Minista Baing i toktok strong tru olsem ol ples i mas gat gutpela wara saplai, irigeson na we bilong skelim o yusim wara.

Em i tok olsem bikos taim ples drai na ais i kamap long kantri planti wara i drai na ol gaden i

dai nabaut na kaikai i sot long ol ples. Em i tok olsem asua bilong nogat wara i kamapim planti moa wari na ol ples lain i painim hat tru long wokim gut gaden.

Program bilong Wol Fud de tude bai stat long 9 kilok long moning tasol Minista Baing i no inap kamap. Long kisim ples bilong em, namba wan seketeri Philip Holzknicht bai kamap na givim toktok bilong Mista Baing long dispela bung.

Program bai kamap long Markham Veli Hai Skul. Bihain long opisel program bai i gat lukluk raun long ol hap pailot projek i stap, kaikai na ol sampela pilai ol sumatin bilong skul bai kamapim.

Bihain long dispela bai i gat ol soka gem na dispela bai pinisim program bilong Wol Fud De long dispela ya.

Manus i gat inap hul wara long helpim ol pipel long taim bilong biksan

NEVILLE CHOI i raitim

Provinsal Disasta Komiti (PDC) long Manus i gat bilip olsem ol inap stretim wari bilong wara long taim bilong biksan bikos ol i painim pinis sampela hul wara we ol inap yusim.

"Lorengau i gat sevenpela wod na wan wan bilong ol dispela wod i gat hul wara," Provinsal Administreta Simeon Malai i tok. Ol komiti bilong PDC i painim pinis nainpela hul wara. Ol i traim long kisim moa wara long tri o foapela bilong ol dispela wara taim ol i mekim dem o banisim ol dispela hul wara bilong kisim moa wara.

Mista Malai i tok tu olsem ol wokman bilong helt dipatmen i bin go sekim ol dispela wara na i tok olsem ol dispela wara i gutpela long ol pipel i ken dring. Tasol em i tok i gat sampela hevi yet long hul wara long Lombrum na em i bilip ol inap long stretim dispela hevi. Narapela samting tu em olsem ol i bin wokim wanpela nupela ples bilong kisim wara we ol inap putim marasin bilong klinim wara na givim ol pipel. Tasol nau yet ol i no inap yusim dispela wara ples bikos wok bilong em i no pinis. Em i tok Wota Bod i lukautim dispela ples bilong kisim wara na ol i gat wok bilong stretim wanpela liklik paip tasol. Taim ol i stretim dispela, ol inap sekim na klinim wara bilong olgeta pipel long provins.

Kaunsel ileksen i pinis long Oktoba 10

ILEKSEN bilong Provinsal na lokol level gavman i pinis long Oktoba 10 long dispela mun. Na nem bilong olgeta kendidet i win long ol wanwan wod na kaunsel eria bilong ol i kamap klia olsem ol wina long Oktoba 11.

Dispela em bihainim opisel program bilong Iktorel Komisin long taim bilong statim ileksen na taim bilong pinisim olgeta wok bilong ileksen.

Tasol ripot i kam long bikpela opis bilong Iktorel Komisin long Mosbi i tokaut olsem ol ino kisim wanpela gutpela ripot i kam long wanwan distrik na provins yet long risal na ol wok bilong ileksen.

Ripot i tok bikpela hevi ol i bungim em long rot bilong salim toktok na walis long ol iktorel na poling opisel.

Ripot i tok planti i mekim wok bilong ol long karimaut ileksen i go het, tasol nogat ripot i go bek yet long Iktorel Opis long Mosbi bikos ol ino gat gutpela telefon o radio sistem bilong yusim long salim walis long narapela.

Olsem na Wantok i no inap kisim ful ripot bilong dispela Provinsal na lokol level gavman ileksen long olgeta hap bilong kantri.

Morobe lusim K385,000 long kaunsel ileksen

MORobe edministresen i bin lusim pinis K385,000 long karimaut ileksen bilong lokol level gavman we nesanel gavman i no givim wanpela helpim tru.

Edministreta bilong Morobe Aine Sengero long ripot bilong em i tok, ol i bin yusim olgeta fil opisa na wokman, trenspot na ol samting bilong wok wantaim long karimaut ileksen. Ol opisa na wokman i bin yusim helikopta long karimaut ileksen insait long ol bus na longwe ples.

Mista Sengero i mekim bikpela tok amamas igo long olgeta wokman bilong Morobe edministresen long karimaut wok bilong ol gut tru na pinis gut long taim, maski ol i no gat inap mani bilong mekim dispela wok.

Em i tok long dispela taim tu, nogat bikpela hevi long sait bilong lo na oda na em i tok amamas i go long ol plisman long lukautim gut ol samting long taim bilong dispela kaunsel ileksen.

Bai olgeta 28 lokol gavman kaunsel bai holim namba wan bung bilong ol long Oktoba 16 na 22 na long dispela taim, bai ol i makim ol presiden.

Lokol gavman ileksen long Morobe i bin pinis long las wik Fraide Oktoba 10. Long dispela kaunsel ileksen, igat 28 lokol gavman we i gat olsem 497 wods olgeta.

Nogat vot i bin kamap long 33 wod bikos ol kendidet ol i makim em nogat man i egensim ol o vot wantaim ol.

I bin gat sampela namba bilong vot i wankain long 7-pela wod olsem na bai i gat Balot Lot we i bihainim Seksen 128 bilong Ogenik. Lo long Nesanel na Lokol level gavman ileksen. Olgeta risal na ripot bilong ol dispela ileksen bai i go kamap long Minista bilong Provinsal na Lokol Gavman Afeas long Oktoba 15, 1997.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief:
Anna Solomon.

Advertising Manager:
Mike Kanin.

Editor of Wantok:
Leo Wafiwa.

Papers distributed by air throughout PNG.

Available by air mail subscription within Papua New Guinea and overseas

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms and acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

300,000 manmeri stap long bikpela taim nogut

VERONICA HATUTASI i raitim

TETI-FAIV (35) ples insait long 8-pela provins long kantri i stap long level 5 insait long mak bilong nesenel disasta long dispela hevi bilong bikpela san kantri i bungim insait long 6-pela mun nau.

Dispela i min olsem ol i nidim tru helpim long wara, kaikai na marasin. Ol i sot long ol dispela samting na planti pikinini na ol lapun pipel i kisim sik.

Disasta na lmejensi Sevis i skelim ol eria long hevi ol i bungim na putim ol long wan wan level bilong ol atoriti i lukim na givim helpim long ol.

Moa long 300,000 pipel long kantri i pilim bikpela hevi long bagarap bilong bikpela san na ais.

Ol toktok i kam long opis bilong Nesenel Disasta na lmejensi Sevis i tok bihainim ol ripot we asesmen grup i redim, ol dispela ples i stap long level 5 na ol i mas kisim helpim long wara, kaikai na marasin kwik-taim em long

• Long Sentrel provins, Onege insait long Goilala distrik.

NDES opis i tok gavman i givim pinis K500,000 i go long Sentrel provinsal gavman long helpim ol pipel insait long eria bilong em we i bungim hevi. Tasol ol bai lukluk long

ripot bilong asesmen grup na givim moa helpim, opis i tok.

• Isten Hailens provins: Ol ples long Aponofi Sensus Divisen olsem Yontebe, Kumuina, Yova, Kafegoruga, Karafi, Nifima, Yahotegabe, Habaru na Tingunta, Narinkafenofi i kisim taim tru.

Long Henganofi distrik dispela ol ples i bungim bikpela hevi. Em long Mumuyanofi, Fagaminofi, Imarabi, Kamano, Fegenafamo, Tebinofi, Irai na Nengasiruempa.

• Enga provins:

Ol pipel long Kandep distrik, Lai na Wage Sensus Divisen i kisim taim tru.

• Galp provins: Kotidunga Sensus Divisen.

• Madang: Bogia distrik na ol ples olsem Boisa i kisim taim tru long hevi bilong bikpela san. Ples Budua long Raikos eria na Manam Ailan.

• Milen Be: Daga eria long Alotau na Woodlark Ailan

• Morobe: Kaiapit eria long Leron Sensus Divisen, Makam eria na Mumeng distrik

• Westen provins: Biami Sensus Divisen, Nomad na Mougulu Sensus Divisen na Pare eria.

NDES opis i tok asesmen grup we AusAID i fandim na salim i wokim dispela ripot bihain long ol i go aut long olgeta provins. Ful ripot i no redi yet.

Kot rausim Dusava tasol em apil gen

MEMBA bilong Yangoru Sausia Gabriel Dusava i lus pinis long kot bilong em long las wik Fraide. Lidasip Traibunel aninit long Jas Tracey Doherty i sasim em long 6-pela poin we em i mas pinis long wok bilong em olsem memba na Minista.

Insait long 17 poin olgeta we Mista Dusava i kisim kot long en, arapela 11 poin em Traibunel i askim em long baim sas. Tasol long narapela 6-pela poin, Traibunel i painim Mista Dusava asua. Na asua bilong dispela 6-pela poin i sanap long mak bilong pinis long opis na wok bilong em.

Siameri bilong Lidasip Traibunel i tok ol i kisim bikpela hat taim tru long sindaun na glasim olgeta poin na ol toktok bilong Mista Dusava. Ol i skelim olsem em i wanpela gutpela na save lida bilong dispela kantri. Tasol dispela 6-pela poin i no inap givim em

sans long stap yet olsem memba bilong palamen na Minista.

Tasol ausait long kot haus, loya bilong Mista Dusava, Greg Sheppard i raitim wanpela pepa bilong holim bek disisen bilong Traibunel long rausim em olsem memba na Minista. Na em i salim dispela pepa i go long sief jastis na ol lain bilong em long Suprim Kot. Em i raitim aplike-sen tu i go long Suprim Kot i mas sindaun gen na glasim na harim gen dispela Traibunel disisen bilong Mista Dusava.

Nogat ripot i kam yet long wanem taim bai Suprim Kot i sindaun na harim dispela apil kot bilong Gabriel Dusava.

Mista Dusava i bin olupela seketeri bilong Foren Afeas na Tred Dipatmen. Em i bin risain las yia na sanap long ileksen na winim sia bilong Yangoru Sausia long dispela yia.

Sandlain kot bai sasim husat?

Bikpela kot bilong Sandlain i kamap gen long dispela wik. Na mipela bai harim gen ol nem bilong kain kain lida na ol ami opisa i kamap long dispela kot long tokaut long wanem kain wok na tingting bilong ol na ol i mekim sampela samting insait long dispela taim kontrak bilong Sandlain i bin kamap na i kam long taim hevi i bin kamap.

Man i gat nem long kamapim dispela hevi bilong Sandlain i kamaut ples klia Jerry Singirok long dispela wik i no laik mekim wanpela toktok long dispela kot. Bikos em i gat narapela kot long distrik kot. Olsem na loya bilong em i ting dispela bai paulim ol toktok bilong em long distrik kot na tu long kot bilong Komisn ov Enkwairi.

Long lukluk insait long dispela tems ov referens o ol poin bilong kot i paitem toktok long en, Praim Minista Bill Skate i bin rausim sampela poin na daunim namba i kam daun. I bin gat 14 poin olgeta. Tasol Praim Minista i daunim kam daun long 10-pela tasol. Na dispela i min olsem sampela lain i no inap bekim planti askim bikos Praim Minista i rausim pinis 4-pela poin bilong ol loya na komisina i ken tromoi askim long ol lain i kamap long kot.

Narapela tu, olupela Praim Minista olsem Sir Julius Chan husat i bin stap long taim bilong dispela Sandlain kontrak na Sandlain hevi bai i no gat planti toktok tumas long mekim o bekim ol askim. Olpela Difens Minista Mathias Ijape na Chris Haiveta tu bai i nogat planti askim tumas long dispela enkwairi. Bikos planti olupela poin na toktok bipo i bin kamap long olupela Komisn ov Enkwairi aninit long Jas Andrew Warwick em nupela Komisn ov Enkwairi nau aninit long Jas Kubulan Los i no bihainim. Jas Los i gat ol nupela poin o Tems ov Referens long dispela namba tu taim bilong harim Sandlain hevi.

Olsem na i luk olsem dispela kot i wok long sut long sampela arapela lain yet we i no kamap ples klia yet. Olsem na ating bai ol ami husat i bin wok insait long rausim ol Sandlain praivet ami bilong Inglen i go bek na sampela bikman bilong pablik sevans bai mekim planti toktok long bekim ol askim. Na ating bai sampela nem we i bin kamaut ples klia pinis na ol politiks lain bai i nogat nau.

Askim long putim tambu long painim si kukamba

NEVILLE CHOI na NOAH KAGAI i raitim

BIHAIN long indai bilong namba tu yangpela man, ol ples pipel bilong Nu Ailan i askim nau gavman long putim 20 yia tambu long painim si kukamba.

Tripela wik i go pinis, wanpela yangpela man bilong Eruk ailan, we i stap wantaim ol Tigak ailan i dring solwara na indai namel long Lisenung na Manne ailan long Balgai Pasis. Dispela em bihain long em i go daiv long painim si kukamba.

I gat save olsem em i painim si kukamba long hap we solwara i go daun tru namel long mak bilong 30 na 50 mita.

Wanpela wik bipo long dispela birua, John Wais bilong Not Solomons i bungim wankain birua long

Mait ailan, we i stap long saut bilong Djaul ailan. John i dring wara na indai bihain long saplai bilong win em i karim long tenk i sot. Dispela em long taim em i painim si kukamba aninit long solwara we i go daun long 60 mita olgeta.

Si kukamba em wanpela bikpela bisnis we ol manmeri long nambais save kisim gutpela mani. Na bihain long indai bilong dispela tupela yangpela man, ol pipel i askim nau gavman long putim tambu.

Bikos prais bilong ol si kukamba i go antap na pipel i kisim moa si kukamba long salim, nogat moa i stap klostu long nambis. Na pipel save kisim kanu o bot i go ausait tru long solwara long daiv i go aninit na painim.

Olsem na pipel i askim nau gavman long luksave long dispela tupela birua na putim tambu kwik.

INSAIT long tupela wik i go pinis, ren i pundaun long sampela hap bilong Manus provins.

Dispela i helpim ol pipel bilong Lorengau, Los Negros, Lombrum, Lelemasih na sampela hap bilong bikailan long sait bilong wara. Tasol planti hap bilong provins i bungim yet hevi long sait bilong wara na kaikai bikos bikpela drai i stap yet we i bagarapim pinis ol gaden kaikai. Wara long ol liklik ailan tu i pinis.

Provinsal administreta Simeon Malai i tok provins i stap long level 3 na 4 long skel we disasta komiti i makim long ol ples we hevi i bagarapim. Ol ples we hevi i nogut tru em ol i stap long level 5 na i go.

Mista Malai i tok ol liklik ailan na sampela hap long bikailan i stap long level 4 taim ol arapela eria i stap long level 3. Dispela i min olsem ol ples i sot long wara na kaikai. Insait long sampela hap bilong bikailan, buspaia i kamap tu, Mista Malai i tok.

Em i tok samting olsem 30,000 pipel long provins i pundaun long

hevi bilong bikpela san.

Mista Malai i tok provins i kisim pinis tupela hap mani long nesenel gavman long helpim ol pipel husat i bungim hevi. Namba wan hap em K20,000.

Ol bin kisim gen narapela hap mani we i abrusim K13,000. Wantaim K109,000 provinsal gavman yet i katim long dispela wok, provinsal disasta komiti i bin kisim samting olsem K142,225. Ol yusim pinis K67,000 long mekim wok long namba wan hap bilong plen.

Na dispela em long kisim wara na kaikai i go long ol eria we hevi i moa yet. Ol i pinisim stej wan bilong prosek na long neks wik ol bai go het long stej 2 o namba tu hap bilong en. Long dispela level, ol bai stretim ol pam wara na wel bilong lukim olsem wara i stap.

Mista Malai i tok provins i laikim moa mani long helpim ol baeim kos bilong sip na fiul long karim wara na kaikai i go long ol pipel husat i stap longwe long ol liklik ailan.

WANTOK
NIUSPEPA BILONG OL PNG STRET

P O Box 1982 BOROKO
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
Mosbi	K 40.00
Arapela PNG eria	K 75.00
Australia na Nu Silan	K115.00
Esia pasifik na Japan	K150.00
Amerika na Yurop	K215.00



Bogenvil nius wantaim VERONICA HATUTASI



• Michael Ogio i kamap ful memba bilong Bogenvil Trensisenel Gavman.

Bung long Nu Silan yesa long stapim pait

BUNG bilong ol Bogenvil lida we i bin pinis long Nu Silan long las wik, Fraide Oktoba 10, i kamap wantaim wanpela tokorait long stapim pait. Ol i kolim dispela tokorait olsem 'Burnham Truce'.

Ol opisal i makim Nesenel Gavman, Bogenvil Trensisenel Gavman (BTG), Bogenvil Revoluseneri Ami/Bogenvil Interim Gavman, PNG Difens Fos na grup bilong ol resisten paitman i bin putim nem long dispela agrimen long stapim pait long Bogenvil long pinis bilong tupela wik bung long Burnham ami kem long Krajsjets, Nu Silan.

Burnham Truce, em dispela agrimen o tokorait we ol grup husat i stap insait long pait long Bogenvil i bin putim nem na pasim tok long lusim pait. Na kamapim stap isi bilong go hetim ol wok long painim gutpela sindaun.

Hia em sampela samting we bai gat luksave aninit long dis-

pela tokorait:

• Olgeta grup noken pait na mekim nabaut long wanpela arapela;

• Rausim ol tambu na sekpoin we i stap nau long olgeta hap bilong Bogenvil, maski ol sekyuriti fos, BRA na ol arapela lain i putim. Dispela bai givim sans long ol pipel i muv i go i kam long gavman na BRA kontrol eria wantaim nogat pret pasin; na

• Gutpela toktok na wok bung namel long ol sekyuriti fos long Bogenvil wantaim ol komyuniti na vilij lida, ol fil komanda bilong ol BRA na resistens grup.

Praim Minista Bill Skate i tok amamas long gutpela wok i kamap na go het bihainin namba tu raun bilong dispela kibung bilong painim gutpela sindaun long Bogenvil, em i bin kamap long Nu Silan.

Foapela nesenelel memba bilong Bogenvil i bin stap insait long ol toktok, na tu long taim

bilong putim nem long tokorait bilong stapim pait. Mista Skate i tok strongpela wok go het i stap nau long kamapim gutpela sindaun long ailan na aninit long Burnham Truce dispela bai inapim laik bilong ol pipel long dispela samting.

"I tru bikpela wok i stap yet tasol dispela agrimen i opim rot long olgeta grup long Bogenvil na ol lida bilong strongim luksave (tras na bilip), na ol i ken wok wantaim long kamapim trupela gutpela sindaun", Mista Skate i tok.

Em i tok nesenelel gavman bai lukluk long wanpela namel grup husat bai go pas long ol wok bilong stapim pait long ailan. Dispela em bihain long ol i lukluk na glasim hamas mani ol bai tromoi long dispela wok na ol kain samting olsem.

Praim Minista i tok em i no gutpela long bungim wankain hevi nau. Bikos em i gat bikpela bilip

RAUSIM SIK POLIO, MISEL NA TETANAS

1997

NENESELEL IMUNAISESEN DE



RAUN 1: Septemba 22 i go onal long Fraide 26.

RAUN 2: Oktoba long Monde 27 i go inap long Fraide 31.

4-pela Palamen memba stap nau long BTG

FOAPELA Bogenvil memba long Haus Palamen i kamap ful memba nau bilong Bogenvil Trensisenel Gavman (BTG).

Em long Rijonal memba John Momis, memba bilong Saut Bogenvil Michael Laimo, Not Bogenvil memba Michael Ogio, na Sentrel Bogenvil memba, Sam Akoitai, husat i holim wok olsem Minista bilong Bogenvil Afeas.

Nesenelel Eksekutyutiv Kaunsil i givim tokorait long dispela samting long las wik Fraide, bihain long em i glasim askim bilong Oposisen.

Long bung bilong Palamen long tupela wik i go pinis, Oposisen Lida Bernard Narokobi i bin askim gavman long lukluk long dispela, sapos Praim Minista Bill Skate i laikim Oposisen givim namba long vot bilong skruim taim bilong BTG i go long narapela yia gen.

Praim Minista Bill Skate long taim em i tokaut long dispela samting i tok pasin we ol Palamen memba i kamap ful memba insait long ol provinsal asembli i stap aninit long nupela ogenik lo bilong Provinsal na Lokol Level Gavamn.

"Yumi mas belgut long dispela tokorait, bikos tupela memba i stap long Oposisen. Na dispela i soim olsem gavman i no laik haitim wanpela samting. Na i laik wokbung wantaim olgeta grup long bringim bek gutpela sindaun long Bogenvil," Mista Skate i tok.

Em i tok ol toktok we i go het nau namel long nesenelel gavman na ol lain i makim ol wanwan grup long Bogenvil i soim olsem ol pipel i gat strongpela laik long gutpela sindaun i mas go bek long ailan na pipel.

"Samting we ol lida i wanbel long en long Haus Palamen bai strongim gutpela bel long ol lida husat i bin stap insait long ol pis toktok long Nu Silan. Na tu long ol pipel bilong Bogenvil, PNG na intenesenelel komyuniti," Mista Skate i tok.



• Rijinol memba John Momis tu i kamap ful memba bilong BTG.



Bikmeri makim Bogenvil Intasios grup long Tailen kibung

OL meri na pikinini i save bungim hatpela taim tru taim pait na trabel i kamap long kantri bilong ol. Bikos ol stap long liklik han na strong bilong ol yet taim ol meri i go pait.

Ol meri save hatwok stret long lukautim famili long sait bilong kaikai, sefti, na painim sefti ples bilong slip taim ol ranawe go long hap em ol bilip i nogat pait. Na tu ol i kisim taim bikos ol birua grup i save mekim nabaut long sampela yangpela meri na mama.

Bihainim dispela wari, wanpela meri lida bilong Bogenvil i bin lusim kantri long las wik Sarere bilong stap insait long wanpela bung long kantri Tailen. Bung ya i toktok long ol hevi we ol refuji meri na ol meri long ol ples we pait i stap long en i bungim.

Seketeri bilong Bogenvil Intasios grup, Anastasia Lapointe, i makim ol meri bilong Bogenvil long dispela bung. Na lusim Mosbi long las wik Sarere long stap long kibung ya. Em i tok em bai toktok long wok we ol meri na intasios grup i wokim

long Bogenvil long helpim stapim pait na kamapim gutpela sindaun gen long ailan.

Moa long 1,000 meri i memba long intasios grup long Bogenvil. Na ol i kam long Katolik, Yunaited, SDA na ol Pentekostel sios long ailan.

Misis Lapointe i tok grup i gat wok bung insait long 9-pela distrik long provins. Na ol i save wok olsem ol namel lain insait long wok bilong kamapim gutpela sindaun long Bogenvil.

"Bikos ol BRA i luksave long ol mama na ol i gat sori, ol i save harim tok bilong ol taim ol i go toktok wantaim ol long lusim pasin bilong pait na stap wantaim gen," em i tok.

Wok bilong ol intasios meri i helpim long pulim planti yangpela man i lusim ol samting bilong pait na go bek insait long ol komyuniti long planti hap bilong Bogenvil. Olsem na bikmeri ya i tok em bai toktok tu long ol hevi we ol meri na ol pikinini i bungim long dispela hevi long Bogenvil.

PNG-Indonesia boda gat planti ripot nogut

YAKAM KELO i raitim

BODA mak bilong Papua Niugini long Sandaun provins i go daun long Westen provins i kamapim planti toktok pinis olsem ol kainkain pasin nogut i wok long kamap bikpela long dispela hap. Dispela em boda mak we i brukim kantri PNG na Indonesia.

Long dispela taim tu, Daru taun i bin kisim nem nogut bihain long wanpela nius ripot i kamap long Australia olsem planti sik AIDS i bin kamap long Daru i go daun long Thursday ailan na kamap planti long Australia.

Planti bikpela toktok bilong ol tabel olsem stilim gan na salim,

hait na salim ol smok nogut olsem spak brus na planti arapela pasin pamuk tu i bin kamap.

Gavana bilong Westen provins, Nibert Makmop i no amamas long harim dispela kain nius we i bagarapim nem bilong provins bilong em. Olsem na em i askim gavman long wokim wanpela bikpela rot we inap ron long Westen provins i go antap long Sandaun provins.

Mista Makmop i tok gavman i mas hariap long wokim dispela haiwe bikos dispela inap helpim ol gavman wokman olsem plisman, haus sik lain na arapela lain tu long wok gut na was long sekim ol dispela kain bikhet pasin na ol samting nogut olsem. Ol i ken wok klostu na stapim ol dispela pasin

bilong hait na salim ol sotgan na smok nogut na tu stapim ol manmeri long i no ken go i kam na kirapim sik nogut i go bikpela.

Mista Makmop i tok strong olsem sapos gavman i kamapim bikpela rot long dispela tupela boda provins, bai dispela inap mekim kamap planti gutpela senis. Na dispela rot tu bai helpim long kamapim arapela boda developmen we inap bihainim stret wanbel bilong PNG na Indonesia gavman long developim boda.

Mista Makmop i askim Foren Afeas Minista Kilroy Genia long painimaut dispela ripot bilong nius we i tok long Daru taun i save kamapim planti sik AIDS. Na askim husat lida o bikman i mekim dispela toktok long mekim bikpela tok

sori i kam long ol pipel bilong Westen provins na Papua Niugini.

Minista bilong Woks Dibara Yagabo i tok em bai raun wantaim Minista bilong Trensport na gavana bilong Westen na Sandaun provins long lukim na skelim ol wok we gavman inap kamapim long boda. Na ol bai toktok long wanem kain rot na plen ol i mas mekim.

Mista Yagabo i tok dispela hevi bilong stilim na salim ol strongpela sotgan na smok nogut olsem mariwana na pasin pamuk i bikpela hevi tumas. Olsem na gavman i mas kam insait hariap na mekim samting long stapim dispela kain hevi long i no ken kamap.

Em i tok long wokim rot long boda i bikpela samting na gavman

bai putim dispela olsem bikpela samting bilong mekim hariap.

Sapos dispela rot i op, bai i mekim isi long gavman i ken was gut na sekim na stapim planti bilong ol dispela bikhet pasin long kamap. Na tu, ol plisman i ken holim ol sampela bilong ol kain man husat i save mekim ol dispela hait pasin na bikhet long boda.

Anit tu long PNG na Indonesia agrimen bilong lukautim na developim boda bilong tupela kantri wantaim, Indonesia gavman i mekim ol wok bilong em pinis. Indonesia gavman i ronim rot pinis long boda. Olsem na PNG gavman i mas mekim haiwe bilong en tu long Sandaun i go daun long Westen provins.



Man o samting?... • Noken lukim piksa ya na ting olsem mama i karim man ya olsem, nogat. Bikman ya i supim tasol longpela tit bilong pig i go joinim nus, na soim stail long Goroka 1997 So, em i bin kamap long las mun. Planti hap bilong PNG i save yusim tit bilong pig olsem bilas bilong ol long taim bilong singsing tumbuna. Foto: Sape Metta.

Wewak distrik laikim sia bilong Deputi Gavana

KAUNSEL iieksen bilong Provinsel na lokol level gavman long Turubu Is Sepik provins i laik kamap olsem bikpela nesenel iieksen.

Wanpela bikman husat i winim Kep Turubu Wod eria, Gabriel Molok i tok dispela kaunsel iieksen i bikpela tru na i kamap wanpela olsem bikpela nesenel iieksen we i bin kamap na pinis long mun Julai.

Mista Molok i tok em i ken lukim olsem planti kendidet husat i win long dispela kaunsel iieksen i stat long grisim na baim ol sapat long winim gen ol sit bilong presiden.

Mista Molok i tok ol kaunsel i wok long yusim mani long gisim ol arapela kaunsel. Dispela i no gutpela pasin tru anit long rifom sistem bilong lokol level gavman. Mipela i mas mekim samting stret na klin long makim ol presiden na namba tu presiden, Mista Molok i tok.

Gabriel Molok em wanpela memba bilong Non Gavman Ogenaisesen (NGO) long wok bilong envarmen na sosel wok.

Developmen na helpim bai i kam taim ol man i sanap bungim tingting na wok wantaim. Anit long rifom bilong provinsel na lokol level gav-

man, i mas gat strongpela plen na wok long anit i go antap long kisim developmen long olgeta kain wok olsem sosel, politikel, spirituel o ekonomik developmen, Mista Molok i tok.

Iieksen long Turubu i pinis wantaim 21 sit olgeta. Long Oktoba 21, bai olgeta memba i kamap long tokaut long asembli. Long Oktoba 22 bai ol kaunsel bilong Wewak Lokol na 23 em ol lain bilong Wewak Is Sepik Ailan. Na namba wan asembli miting bilong ol Is Sepik Lokol Levul Gavman presiden bai kamap long Oktoba 28.

Tasol Mista Molok i laik mekim tingting bilong em klia olsem sia bilong Deputi Gavana i mas stap long Wewak distrik. Bikos ol lain long Mapik na Ambunti i bin kisim sans pinis long ol provinsel gavman bipo.

Mista Molok i tok em i askim olgeta presiden long kam bung wantaim na serim tingting bilong ol long makim Deputi Gavana husat inap wok stret wantaim olgeta presiden bilong provins.

Mipela i mas wok bung wantaim long gutpela developmen bilong provins, Mista Molok i tok.

Buk bilong namba wan tisa long sik longlong i redi

WENCESLAUS MAGUN i raitim

NAMBA wan dokta na tisa bilong sik longlong long Papua Niugini, Sir Burton Gyrrh Buton-Bradley, husat i dai pinis nau i gat wanpela seksen bilong ol buk na ol pepa wok bilong em insait long laibreri bilong Yunivesiti bilong PNG long Medikel divisen. Sir Burton i gat bikpela nem insait long wok bilong ol sik longlong long UPNG. Ol i save kolim em olsem "Papa bilong PNG Psychiatry na Papa bilong Melanesian Psychiatry" o sik longlong.

"Dispela em i namba wan taim tru bilong UPNG long kisim ol buk na ol pepa wok bilong wanpela saveman na tisa bilong yunivesiti. Planti ol buk, bilong Sir Burton em i hat tru long painim long wol, bikos ol kampani husat i save kamapim ol dispela buk i no moa kamapim," Dokta na tisa bilong UPNG na man husat i kam kisim ples bilong Sir Burton, Profesa Felix Y. AttahJohnson i tok. Profesa Felix i tok, em i hat tru long painim ol kain buk na pepa wok, Sir Burton i gat bikos i nogat planti ol kain buk olsem long ol laibrari na long ol stua.

"Olsem na bilong kisim ol kain buk na pepa wok fri long Sir Burton em i wanpela bikpela samting ol pipel bilong PNG i mas luksave na amamas long em," Profesa Felix i tok. Profesa Felix i givim tu bikpela tok tenkyu i go long meri husat i lukautim ol dispela buk bilong Sir Burton, Misis Rose Mojika.

Mama i karim Profesa Sir Burton long Sidni long 1914. Na long 31 Januari, 1994 em i dai taim lewa bilong em i stop long wok. Sir Burton i dai, bihain long em i wok long PNG inap long 25 yia olgeta. Em i bin kam long PNG long 1959 na i wok tasol long PNG inap long taim em i dai. Planti ol saveman i save long Sir Burton bikos em i kisim biknem long gutpela wok bilong em bilong mekim ol gutpela plen na developim Mental Helt Sistem na Sevis long olgeta hap bilong kantri. Wanpela bilong ol bikpela wok Sir Burton i kamapim em long Laloki Saikiatrik (Psychiatric) Senta, klostu long Mosbi. Dispela em i haus sik bilong ol longlong manmeri na pikinini. Sir Burton i raitim moa long 200 saientifik pepa insait

long profesenel jenels na siksipela buk long kainkain eria bilong trenskalsereel saikiatri (transcultural psychiatry) insait long Melanesia. Long luksave long gutpela wok bilong em insait long sik bilong ol longlong o saikiatri (psychiatry), UPNG i givim em namba bilong Honorari Doktoret bilong Marasin. Long 1990, Kwin Elisabeth II i mekim em Knight Bachelor "long go pas olsem namba wan man long wok bilong mental helt insait long PNG". Em i winim tu ol arapela namba olsem Benjamin Rush Bronze Medal (1974), PNG Independens Medal (1975) na OBE (1982). Olsem na ol i givim ol taitel olsem, Kt. OBE, MD, BSc, FRCPsych, FRANCP, FRAI, FRACMA, DipPsyMed, DTM&H, DipAthrop, MD(Hon)(UPNG) long Sir Burton.

Long 1950, Sir Burton i maritim Ingeborg Roeser, husat i dai long 1972. Tasol tupela i no bin gat wanpela pikinini. Olsem na Misis Rose Mojika wanpela sekreteri bilong Mosbi Jenerel Haus Sik i

kisim em na lukautim em inap long taim em i dai. Taim Sir Burton i dai, em i lusim olgeta samting bilong em long Misis Rose Mojika. Na olsem Misis Mojika i ting em i gutpela long givim ol buk na pepa wok bilong Sir Burton long UPNG medikel laibrari.

Sir Burton i bin holim ol wok olsem dokta boi wantaim ol ami bilong Ostrelia long Ostrina na Jemeni long 1949 i go long 1950; Dokta bilong Saikiatri Sevis long Kwinslen long 1951 i go long 1957, Tisa bilong Saikolojikel marasin (Psychological Medicine) long Yunivesiti bilong Malaya long 1957 i go long 1959; Bos bilong Mental Helt long PNG long 1959 inap 1975; Honorari Asosiet Profesa bilong Saikiatri long UPNG long 1978 inap 1994; Klinikel Profesa bilong Saikiatri long Yunivesiti bilong Hawaii long 1976 inap 1994 na Inagurel Presiden bilong PNG Saikiatrik Asosiesen long Julai 1979 i go pinis long Januari 1994.

THERE ARE MANY ROADS TO SUCCESS... HERE ARE 57 OF THEM

And the "road map" you need is the FREE ICS Career Kit—the same Career Kit we've sent to millions of men and women all over the world. It works—and it can work for you.

ICS doesn't promise you success; no legitimate educational institution does. But we DO promise that, if you mail or fax this ad to us, we'll send you the Career Kit in the career area of your choice, without obligation, and get you started down the career road of your choice...the road that leads to success and a better life.

Please select one number only. Although you may wish to enroll in additional ICS programs later on, experience has shown that there is a far better chance for success when the student concentrates on one career area.

SEND FOR FREE FACTS—NO OBLIGATION



http://www.icslearn.com

World's Recognized Leader in Home-Study Training for More Than 100 Years.

ASSOCIATE IN SPECIALIZED BUSINESS DEGREE PROGRAMS

- 60 Business Management
- 61 Accounting
- 80 Business Management with option in Marketing
- 81 Business Management with option in Finance
- 64 Applied Computer Science
- 68 Hospitality Management

ASSOCIATE IN SPECIALIZED TECHNOLOGY DEGREE PROGRAMS

- 67 Electronics Engineering Tech.
- 63 Civil Engineering Tech.
- 62 Mechanical Engineering Tech.
- 65 Electrical Engineering Tech.
- 66 Industrial Engineering Tech.

Get FREE Information—

MAIL OR FAX ENTIRE AD TODAY

Write the number of the one career that interests you

MR / MRS / MISS

(Please print clearly)

ADDRESS

CITY/COUNTRY

International Correspondence Schools, Dept. TTSB7
Box 1900, Scranton, Pennsylvania 18501-1900 U.S.A.
Fax: 717-343-8462

CAREER DIPLOMA PROGRAMS

- 07 U.S. High School Diploma
- 02 Electronics
- 05 Hotel/Restaurant Management
- 13 Professional Secretary
- 35 Travel Agent
- 14 Air Conditioning & Refrigeration
- 32 Art
- 59 Catering/Gourmet Cooking
- 23 Medical Office Assistant
- 24 Dental Office Assistant
- 51 Fashion Merchandising
- 33 Motorcycle Repair
- 52 Surveying & Mapping
- 22 Wildlife/Forestry Conservation
- 47 Animal Care Specialist
- 89 Small Engine Repair
- 08 Legal Assistant
- 48 Computer-Assisted Bookkeeping
- 42 Dressmaking & Design
- 87 TV/VCR Repair
- 04 Auto Mechanics
- 12 Interior Decorating
- 18 Bookkeeping
- 06 Electrician
- 03 Child Day Care
- 38 PC Specialist
- 55 Diesel Mechanics
- 94 Fitness & Nutrition
- 85 Drafting
- 41 Journalism/Short Story Writing
- 40 Photography
- 70 Computer-Assisted Small Business Mgmt.
- 79 Electronics Technician
- 25 Gun Pro
- 26 Teacher Aide
- 30 Floral Design
- 27 PC Repair
- 15 Home Inspector
- 39 Medical Transcriptionist
- 72 Appliance Repair
- 58 Private Investigator
- 76 Freelance Writer
- 84 Pharmacy Technician

COMPUTER PROGRAMMING

- 01 Programming in BASIC
- 37 Visual Basic
- 36 Visual C++


ICS ACCREDITATIONS AND APPROVALS

ICS is an accredited member of the Distance Education and Training Council in Washington, D.C. and is licensed by the Pennsylvania State Board of Private Licensed Schools. ICS Learning Systems has been reviewed and approved as a certified provider of continuing education and training programs by the International Association for Continuing Education and Training.



TU MINIT TINGTING OL BLAK BOKIS INAP SKULIM YUMI

LONG wanpela de ol enimal i pait wantaim ol pisin. Wanpela blakbokis i stap long sait bilong ol pisin. Tasol em i lukim ol pisin i wok long lusim pait, nau em



FRANK MIHALIC i raitim

ranawe na i hait long bus. Nau ol enimal i amamas i wokabout i go bek long ples, na blakbokis i joinim ol. Ol i lukim em na ol tok, "E, blakbokis, yu mekim wanem samting hia? Yu wanpela dispela pisin i bin pait egens long mipela."

Tasol blakbokis i bekim tok olsem: "Mi no wanpela pisin, mi wanpela enimal. Lukim maus bilong mi. Mi gat tit. Ol pisin i no gat tit."

Orait, ol enimal i harim dispela tok na ol i larim blakbokis i stap.

Bihain liklik, pait i kamap wantaim moa namel long ol enimal na ol pisin, na nau blakbokis i stap long sait bilong ol enimal. Tasol em i lukim ol i wok long lusim pait, na wantaim moa em i ranawe i go hait. Na long taim ol pisin i kam bek long pait, em i joinim ol. Nau ol pisin i kros na i laik rausim em. Ol i tok olsem: "E, blakbokis, yu mekim wanem samting hia? Yu birua bilong mipela; mipela i bin lukim yu i stap namel long ol enimal."

Tasol blakbokis i krungutim tok gen na i tokim ol pisin olsem: "Mi no birua. Mi no enimal. Ating yu bin lukim wanpela enimal i gat wing, laka?"

Ol pisin i harim dispela tok na ol i larim blakbokis i stap.

Blakbokis i save go i kam olsem na joinim kain kain sait, nau ol enimal na ol pisin wantaim i kros, na ol rausim em i go. Ol i tokim em olsem: "Yu trikman tru, yu trikman stret. Olsem bai yu no gat pren wantaim ol enimal na wantaim ol pisin. Na nau yu mas hait long san na flai long nait tasol."

Blakbokis ya em i makim ol pipel i save senis senis nabaut oltaim. Oltaim ol i wok long painim rot i moa isi. Ol i save senisim sios na lotu bilong ol; ol i save senisim politikal pati bilong ol. Ol i dripman. Ol i gat ol anis insait long pens bilong ol.

Ol anis i kaikai as bilong ol na nau ol i no inap sindaun, ol i mas wokabout raun tasol.

Ol man na meri i wok long pinisim laik bilong ol tasol, ol bilong lain bilong ol blakbokis. Tude ol i laikim wanpela samting; long tumora ol i laikim narapela samting gen. Oltaim ol i senis senis nabaut tasol. Ol i dripman stret.

Baibel i givim sampela strongpela tok long kain pipel olsem. Long las buk bilong Olpela Testamen, em Revelesen tasol, Sen Jon i putim dispela tok insait long maus bilong Jisas: "Yu hat liklik tasol. Yu no hatpela tru na yu no kolpela tru. Olsem na mi laik trautilim yu bek long maus bilong mi." (Rev 3.16)

Manmeri i statim gaden, tasol em i no pinisim, em bai no painim kaikai long gaden. Manmeri i statim pilai, tasol em i no pinisim, em i no inap win. Meri i wokim blium, tasol em i no pinisim, em i wankain olsem manmeri i statim wanpela gutpela wok na em i hapim tasol na tromoi i stap. Kain pipel olsem i no inap win. Ol i olsem ol bebi, ol i no bin groap yet.

Boi o meri i mekim nating skulwok bilong em, em bai fel. Tisa giaman tasol long tis, em bai kamapim planti dropaut. Man o meri o pikinini husat i no joinim tru ol prea na singsing insait long haus lotu, em i no inap kisim blesim bilong God.

Ol dispela kain pipel ol i no enimal o pisin; nogat. Ol i blakbokis stret.

Statu bilong matir bilong PNG i stap nau long Wesminsta Abi, London


HELEN REI i raitim

Ol lain i lukim piksa bilong Prins Diana taim ol i laik planim bodi bilong em long televisen long olgeta hap bilong graun ating lukim tu tenpela hap kona long bikpela wes dua bilong Westminster Abi o haus lotu, long London i stap nating.

Long narapela yia, ol bai putim statu bilong wanpela bilipman, bilong Papua Niugini husat i dai long bilip bilong em long wanpela kona bilong ol dispela hol long dispela bikpela dua. Ol i save kolim ol kain bilipman matir. Nem bilong dispela bilipman em Lucian Tapiedi. Ol i mekim statu bilong matir Lucian long ston. Matir Lucian bai kamap namba wan matir insait long Angliken Sios long PNG. I gat narapela matir bilong PNG tu bilong Katolik Sios, em Blesed Peter ToRot. Dispela bai mekim namba bilong ol matir long PNG i go long tupela.

Matir Lucian em i stap namel long faipela arapela ol matir husat i gat bikpela nem insait long ol bikpela Sios. Ol narapela em long Dokta Martin Luther King, Dietrich Bon Hoesser, wanpela German Filosofa o saveman bilong glasim laip, Katolik bisop, Oscar Romero na Angliken asbisop bilong Yuganda, Janani Luwum.

Man i lukautim Wesminsta Abi na ol arapela lida long Sios i plen long sanapim wanpela haus na putim statu bilong ol



• Bisop Sir David Hand i ritim stori bilong bilipman Lucian Tapiedi.

matir ol i mekim long ston insait long dispela haus lotu. Ol i tingting long putim tu statu bilong ol santu bilong 20th senseri insait long dispela haus lotu.

I gat wanpela man, Dokta Andrew Chandler i raitim tu wanpela buk na kolim dispela buk The Book of Status. Dispela buk bai stori long laip stori bilong wan wan ol matir. Long painim moa stori long laip bilong matir Lucian, Dokta Andrew i salim tok long Dokta Errol Hodger, wanpela tisa long Ats Fakelti long Kwinslens Yunivesiti bilong

Teknologi. Dokta Errol em i raitim wanpela buk taitel, The Seed of the Church. Tasol Dokta Errol i salim tok ken long asbisop bilong Angliken Sios long Mosbi, Bisop David Hand na askim inap ol i mas karim aut wanpela wok painim long laip stori bilong Lucian. Olsem Bisop Sir David wantaim helpim bilong sampela pipel husat i save long Lucian. Wanpela bilong ol dispela man, em kasan brata bilong Lucian, Duncan Tiwekuri. Olgeta dispela man i bungim ol save bilong ol na raitim wanpela stori, i stori long laip bilong Lucian. Long

tingting bilong Bisop David, ol i salim pinis olgeta laip stori bilong Lucian i go long London. Man husat bai wokim piksa bilong Lucian long ston bai yusim dispela stori na go het wantaim wok bilong em. Nau yet ol i wok long painim piksa bilong Lucian.

Long dispela as, Bisop David i askim ol pablik husat i save liklik long Lucian na i gat piksa bilong em o i save long husat i gat piksa bilong Lucian long salim toksave i go long Bisop David bai em i ken kisim dispela piksa na salim i go long London.

Ol Luteran mama i helpim ol refuji manmeri

YAKAM KELO i raitim

OL Luteran mama long Mosbi, long makim Papua rijn i bungim moa long K1,000 long las wik Sarere long givim i go long ol Irian Jaya manmeri husat i kisim bagarap long bikpela drai long Is Awini refuji kem long Westen provins.

Long las wik Sarere, moa long 500 mama bilong Luteran sios long wanwan kongrigesen na grup i bin kamap wantaim mani na ol laplap na kolos samting bilong givim i go long ol turangu lain bilong Is Awini refuji kem.

SiAmeri bilong ol Luteran mama long NCD, Hesa Basava i tokim Wantok olsem, em i amamas tru long lukim ol mama i kam bung gut tru na givim dispela helpim bilong ol. I gat olsem tripela mama grup long Mosbi i no givim yet helpim bilong ol. Na ol bai kam bihain wantaim ol arapela helpim we i wok long kam yet.

Misis Basava i tok mipela oltaim i save harim tok bilong God. Tasol long dispela taim nogut we hevi i kamap long kantri bilong yumi, yumi mas givim na helpim arapela. Mipela i no ken harim tok bilong narapela na givim. Mipela i mas givim wantaim laik na bel na tingting bilong mipela yet bihainim bilip long helpim narapela brata na susa, Misis Basava i tok.

SiAmeri bilong ol Papua rijn mama i tok long dispela wik Trinde, bai ol i salim ol dispela helpim we ol mama i bungim i go long Is Awini refuji kem long

Westen provins.

Dispela singaut bilong ol turangu Wes Irian manmeri bilong Is Awini refuji kem i bin salim pas i go long het opis bilong Luteran long Ampo, Lae. Ol i askim long helpim wantaim kaikai na ol samting bikos dispela hevi bilong bikpela san i kukim tru ol kaikai na ol samting bilong ol. Ol i tok mak olsem 8-pela manmeri i dai pinis na sampela i wok long stap long mak bilong dai nau bikos long kaikai i sot na wara i drai na arapela sik i wok long kamap.

Misis Basava i tok ol arapela mama grup na kongrigesen grup husat i no givim yet helpim bilong ol i ken givim i go long tresera bilong ol mama long Papua rijn; Mary Mopela Theo long Koki haus lotu.

Ol Luteran mama long Papua rijn i save mekim kain wok helpim olsem i go long ol singaut na askim i kam olsem long ples o long arapela provins na taun. Sampela helpim bilong ol wantaim mani na kolos samting i save go long ol sios wokman olsem ol pasto husat i save wok insait long ol bus ples. Ol i save givim tu helpim bilong ol i go long ol mama grup bilong narapela provins long ol hevi bilong ol.

Misis Hesa Basava i tok em i amamas tru long lukim ol meri i soim dispela bilip bilong ol long rausim mani long bilum bilong ol yet na tromoi i go antap long mani bilong ol grup na bung. Na dispela i soim pasin bilong givim bel na sori na helpim arapela husat i stap long nogut.

Wanem taim bai Sios i tokaut long Mama Teresa i kamap Santu?

Inap Katolik Sios i go het na tokaut olsem Mama Teresa em i wanpela Santu? Taim em i stap laip yet, planti pipel i save kolim em santu. Yu inap lukim tru pasin bilong wanpela Santu long laip bilong Mama Teresa. Em wantaim ol lain sista bilong kongrigesen bilong em ol Misinari sista bilong Sariti i givim ol yet olgeta long lukautim ol trangu bilong ol trangu lain. I gat planti man i luksave long kain santu pasin bilong Mama Teresa.

Kadinel Ratzinger, prifek bilong Kongrigesen bilong Doktrin bilong bilip na Kadinel Sodano, Sekreteri bilong Stet, i tokaut liklik olsem ating ol i traim mekim kwik wok bilong tokaut long Mama Teresa olsem wanpela santu. Dispela i min olsem ol i mas abrusim sampela lo ol Pop na ol bisop i wok long Vatikan II i save bihainim bilong makim ol man o meri long kamap santu we olgeta Pop i save mekim i kam inap long taim bilong Pop John XXIII.

Tasol Pop John Paul II i senisim lo bilong Sios long makim ol santu. Em i daunim ol strongpela lo Sios i save bihainim bipo na mekim isi liklik wankain olsem ol arapela pop i save mekim bipo tru. Em i gat laik long strongim wok bilong Sios long wok na pasin bilong planti ol santu long olgeta hap bilong graun.

Nau olgeta pipel i laik save wanem samting Pop John Paul II bai mekim long Mama Teresa husat em yet i save tokaut long pasin bilong em i gutpela tru na i santu. Tasol planti tingting i sanap strong olsem em i mas bihainim stret ol lo bilong Katolik Sios bilong

makim ol santu.

Long namba wan ples, em i stret long glasim ol toktok i sut long Mama Teresa long wok bilong em bilong helpim ol trangu bilong ol trangu olsem gutpela pasin aninit long lo o gutpela pasin long laik bilong God. Katolik Sios tude i sanap strong long mekim pasin bilong bihainim lo olsem wanpela samting bilong mekim long autim tok bilong God. Olsem na i moa gutpela long givim moa taim long lukim ol wok bilong Mama Teresa i karim kaikai. God i no singautim Mama Teresa long kamap sista bilong askim, 'bilong wanem na yumi gat ol trangu man?' Dispela pasin i stap pinis.

Narapela as tingting bilong wanem Pop John Paul II i mas bihainim stret ol lo bilong Katolik Sios bilong makim Mama Teresa i kamap santu em i bikos Sios i mas givim inap taim bilong lukim wok ol sista bilong Mama Teresa bai mekim long dispela taim, taim Mama Teresa i no stap wantaim ol. Ol Misinari sista bilong Sariti i soim tru gutpela wok bilong ol wantaim ol trangu bilong ol trangu long ol man i dai long rot, i go long ol pikinini, i go long ol lain i gat sik AIDS, ol lain i nogat haus, ol pikinini i stap long bel, na ol lepa. Tasol bilong makim Mama Teresa i kamap Santu kwik ating inap stapim ol gutpela pasin Mama Teresa i gat laik long mekim. Em i statim wanpela oda i gat laip. I no wanpela oda olsem samting ol i putim i stap na ol pipel i ken go lukim na tingim ol gutpela wok Mama Teresa i bin mekim taim em i stap yet.

Ol klinik na sios helt skul sot long helpim

YAKAM KELO i raitim

KOMYUNITI Helt Wokas Asosiesen i askim strong gavman long lukluk gut long ol liklik aid pos o klinik sevis insait long kantri na helpim ol wankain olsem ol bikipela haus sik na klinik long ol taun.

Sinia Vais presiden bilong union Moses Nukon i tokaut olsem gavman i oltaim lukluk tasol long helpim ol bikipela haus sik, helt senta na sab helt senta wantaim ol samting bilong wok na ol kain sevis bilong haus sik.

Mista Nukon i tok ol aid pos sevis long kantri i klostu 100 yia nau na ol i no save kisim gut ol helpim bilong gavman long strongim na sevim gut laip bilong ol manmeri insait long asples na ol bus ples.

Em i tok sampela taim gavman i save baim sampela liklik samting olsem o medikal saplai bilong ol aid pos. Tasol ol komyuniti helt wokas yet i save painim rot bilong kisim ol dispela samting i go long aid pos bilong ol wanwan. Planti taim, ol i mas yusim poket mani bilong ol yet long baim trenspot na ol samting bilong karim ol dispela medikal saplai i go long aid pos bilong ol.

Olsem na Mista Nukon i askim gavman long luksave long dispela kain hevi bilong ol na givim wankain helpim olsem ol haus sik na helt senta long ol distrik senta i save kisim.

Long dispela taim nogut nau we bikipela san na ais i wok long bagarapim ol manmeri long planti hap bilong kantri nau, ol kain kain sik i wok long kamap na bungim ol manmeri. Tasol ol aid pos i nogat kain marasin na helpim bilong givim long ol manmeri bilong ples husat i bungim

hevi nau long ol kain sik nabaut.

Long palamen, memba bilong Mosbi Not Wes Ledi Carol Kidu i bin askim Minista bilong Helt Ludger Mondo long lukluk insait gut na helpim ol sios haus sik na ol sios nening skul we i save skulim ol manmeri long kamap ol helt woka.

Ledi Kidu i mekim dispela askim bihain long ol Sios Medikal Kaunsel i askim long ol helpim bikos ol sios helt skul i bin sot long mani na sampela i klostu long mani skul bilong ol.

Ol Nening skul olsem Luteran Nening Skul long Madang, Nazarene koles long Kudjip, Sopas long Enga, St Barnabas long Alotau na St Marys long Vunapope.

Ledi Kidu i tok mak olsem K1.5 milion i sot long ol long karimaut wok skul bilong ol i go moa.

Em i askim gavman long givim dispela mani hariap bikos klostu taim bai ol dispela sios nening skul bai pasim wok bilong ol.

Helt Minista Ludger Mondo i tok em i klia long dispela hevi na em wantaim ol wokman bilong em i wok long mekim wok insait long stretim dispela hevi. Mista Mondo i tokaut olsem dispela hevi bai ol i lukluk long en na ol dispela nening skul bai i no inap pasim wok bilong ol.

Olsem gavman, mipela i amamas long olgeta wok na helpim ol sios i mekim dispela givim helpim na helt sevis long ol pipel bilong dispela kantri. Sios i save nonim olsem 80 pesen bilong ol komyuniti helt senta long olgeta hap ples. Olsem na gavman i gat dinau long ol. Bai mipela i mas givim ol gutpela helpim wantaim mani bilong ol i karimaut wok bilong ol gut long neks yia, Mista Mondo i tok.

Milen Be pipel kisim gutpela helpim nau

HELEN REI i raitim

OL eria long Milen Be we i kisim bikipela bagarap long hevi bilong san i stap longpela taim i kisim pinis saplai bilong ol long kaikai samting. Ripot i kam long provin-sal opis bilong disasta na imejensi komiti long biktaun, Alotau i tok olsem.

Kodineta bilong disasta na imejensi komiti, Allen Jonathar, i tok ol pipel bilong Kiriwina na Goodenough i kisim nau saplai bilong rais.

Komiti i bin stat wok long painimaut ahamas saplai bilong kaikai

bai go long wanwan eria we i bungim bikipela mekimsave long hevi bilong san i stap longpela taim, we planti ples na gaden kaikai i drai.

Nau yet komiti wok long Rabaraba na Woodlark ailan. Long Woodlark, ol pipel long ol liklik ailan i kisim bikipela bagarap tru.

Bikos em i tok bikos long komiti i no kisim bikipela mani, ol i mekim disisen long baim ol namba wan saplai tasol olsem rais, flaua beg na majarin long givim pipel.

Jonathan i tok komiti i kisim K30,000 i kam long nesesenel gavman, wantaim narapela K113,000. Putim tupela wantaim,

dispela i kamap long K143,000 olgeta.

Long dispela mani, ol i spenim pinis K53,000 long ol bagarap i kamap long Kiriwina eria.

Em i tok mani ol i kisim i no inap. Bikos komiti mas haiarim ol bot long kisim saplai i go i kam. Na dispela mani ol i kisim i no inap.

Em i tok moa olsem hevi bilong wara i sot i no bikipela hevi tumas long planti eria bilong Milen Be provins. Em i tok ol ailan olsem Samarai na Duau long Esa'ala tasol i sot liklik long wara. Samarai ailan em wanpela eria i sot tru long wara. Tasol wantaim liklik ren, pipel i gat liklik wara saplai nau.

Dalbi yut grup stap yet long wasim ka

LEO WAFIWA i raitim

DALBI yut grup bilong wasim ka insait long Mosbi em planti manmeri i mas save nau long ol. Bikos stori bilong ol i kamap planti taim pinis long niuspepa. Tasol dispela i no amamasim yet projek kodineta Joe Waive.

Las wik Waive i kamap long *Wantok* opis na laikim olsem ol i mas kamap gen long niuspepa, bai moa manmeri i save olsem ol i stap yet. Na ol manmeri i ken kisim ka i go long ol mangi bilong em i wasim.

Nau yet grup i amamas long PNG Stationary kampani long oraitim ol i yusim ausait bilong opis wantaim wara long wasim ka bilong ol kastoma, na tu bilong ol arapela manmeri.

Grup i no sasim bikipela mani, em long K2 i go antap long K8. Na tu grup i yusim ol gutpela samting bilong wasim ka em ICI Dulux kampani i saplaim. Olsem na sapos yu laik sapotim ol, go tasol long hap ol i bes nau na larim ol wasim gut ka long liklik mani tasol. Dispela bai helpim ol yut olsem Waive yet i tok, "bai ol yangpela man i noken askim ol manmeri long mani long baim kaikai sam-



• Projek kodineta Joe Waive na ol mangi bilong em soim ol yet long kamera taim ol i wasim wanpela ka ausait long PNG Stationary opis long Waigani long las wik Fraide.

ing."

Ol save stat wok long 8 klok moning i go inap long 11 klok.

Grup i bin stat long 1993. Bikipela astingting bilong kamapim dispela grup, em Mista Waive i tok em long rausim ol yangpela manmeri long rot long mekim raskol

pasin. Na givim sampela kain wok long ol bai ol i ken helpim long wanem we ol i ken long developmen bilong Papua Niugini.

Nau yet grup i no save stap long wanpela hap tasol. Ol save muv long wanpela eria i go long narapela.

CONCENTRATED CLEANING POWER

**STRONGPELA PAWA
BILONG KLINIM,
NAU IKAM LONG
LIK LIK FAB BAR**





Coffee Plantation & Processors Association Inc

Toksave i go long Kopi Industri

Dispela toksave i go long olgeta stekholda insait long kopi industri.

- Long ol groa, liklik na bikpela - na olgeta rejista grup.

- na i kam aninit long tokorait bilong siaman na Bod ov Dairekta bilong Asosiesen. Dispela i bihainim miting bilong CIC Bod long Oktoba 2 we sampela bikpela senis i bin kamap bihainim risolusen.

Kopi industri na CIC i stap insait long bikpela hevi na planti toktok long taim ol i rausim longtaim sief eksekutiv Ricky Mitio long 1994.

Dispela i bihainim gen taim Kewa Boiye bod i bin rausim ol eksekutiv na saspensen bilong Hon Ron Ganarafa husat i bin kisim ples bilong Ricky Mitio. Na dispela i bihainim gen narapela bikpela disisen we Ron Ganarafa i bin mekim long stapim K25 milien pemen igo long Panga Kopi.

Bihainim ol dispela pasin bilong rausim ol eksekutiv na pemen na ol kain kain miting we leit Kwea Goiye bod i bin kamapim, i bin gat bikpela paul long rot bilong bihainim namel long ol CIC menesmen na ol wokman.

Olgeta de wok program i save kam aninit long pret bikos long nogat baset na nogat plen bilong ol senis i kamap. I bin gat bikpela paul tingting. Sapot na wok bung wantaim bilong ol wokman i pundaun olgeta.

Nau mi amamas long tokim ol stekholdas olsem bihainim nupela Asosiesen ileksen na makim bilong ol trupela mausman long Bod ov Dairekta, planti gutpela senis i wok long kamap. Olsem na mi laik mekim klia ol dispela senis long yumi ken save.

1. Nupela Bod i tok strong olsem isi rot bilong bihainim long mekim polisi, program developmen na karimaut wok i mas kamap. Ol dairekta na menesmen i gat wok bilong ol stret long mekim na ol i mas mekim wok bilong ol gut. Long kisim na mekim wok bilong ol ausait lain bai i no gat moa.

2. Nupela Bod i glasim na skelim gen wok bilong olgeta sinia menesa na mekim sampela senis. Nupela Sief Eksekutiv i mas gat save na eksperiens long wok agrikalsa na administresen, man wantaim klia na open tingting em bod i makim pinis. Nupela sinia menesa i lukautim administresen na akaunting em bod i makim pinis na nupela menesa bilong tripela operesen Divisen olsem Industri Afeas, Ekstensen na Rises i stap nau na bai bod i makim ol man bihainim rot bilong kisim aplikesen na makim man stret.

3. Odit akaun bilong ol krismas i go long Desemba 1996 i redi nau na ol kopi i bin go pinis long olgeta stekholda Asosiesen long ol i ken lukim na save.

4. Narakain program em spesel Bod apoin komiti i kamapim na bihainim ol wok lukluk insait Bod i oraitim dispela ripot bilong komiti. Ol dispela ripot em:

(a) Kos bilong Operesen. Daunim kos bilong ol samting, namba bilong manpawa bai i go daun olsem long 50 % mak long holim strong mani i go aut we i wok pinis long 1996. Dispela eksesai bai pinis long Desemba 1, 1997.

(b) Ekstensen Sevis: Kamapim gutpela rot bilong ol groa na rises woka i ken toktok wantaim gut long senisim ol tingting. Bai ol i mas stretim gut ol mobail task fos tim long karimaut gut dispela wok wantaim ol groa. Wok bilong rijinol na administresen straksa em ol i bin katim daun olgeta. Olsem na kos bilong dispela operesen bai i daun long mak i bin kamap pastaim, na nupela rot bilong kamapim sevis bai i wok gut long givim gutpela risal long ol groa.

(c) Rises Resenolaisesen long sait bilong wok painimaut o rises bai lukluk moa long ol wok bilong program na risal na bungim ol kain kain rises dipatmen i kam aninit long tupela bikpela het. Na rausim ol saintis long wok insait long administresen o menesmen sait.

(d) Tred na Kualiti wok: CIC i gat gutpela rekot long dispela eria. Bikpela senis i no gutpela tumas. Tasol ol program i kamap long salensim ol pret we inap kamap long kopi. Dispela em long mekim ol kopi i go olgeta na bungim ol nupela kastoma kantri na kirapim nem bilong PNG kopi bikoš long gutpela nem na swit bilong em. Na long abrusim ol krangi tred prektis we inap kamap long nupela disain bilong eksplot monitoring sistem. Long dispela las wok, bai i gat join wantaim Trenspersensi Intanesenel husat i gat wankain eksperiens long dispela bikpela eria.

(e) Bai ol groa i gat planti samting long stap insait. Long bihainim ol groa asosiesen, i gat laik olsem Ekstensen task - fos tim i mas kisim membasip draiv na tokaut moa long ol bikpela samting long ol groa. Wanem kain rot em i go, tasol bikpela samting em long skulim na toksave long olgeta kopi groa long bikpela tingting na sanap bilong CIC long lukautim na was long interes bilong ol groa, (a) long pasin bilong mekim wok stret long tred na long wok bung wantaim ol kastoma bilong arapela kantri na ol namel man, (b) long bungim ol kain pret olsem ol sikna binatang nogut long kopi na (c) bilong luksave na skelim gut ol helpim na save.

(f) Opim wok. Nupela tim bilong CIC i luksave long wok bilong opim CIC i go bikpela em bikpela samting tumas olsem na em i laik kamapim polisi beis we:

(i) painimaut long ol gutpela hap bilong planim kopi long ol longwe hap. Dispela bai kirapim maket sistem long wok wantaim olgeta kopi nau i stap. Na bihain nupela wok bilong planim kopi bai bihainim.

(ii) Moa wok long rausim na senisim ol olupela kopi diwai long ol olupela hap eria we kopi diwai i bin stap longpela taim tru long ol.

Long dispela bikpela askim bilong Panga Kopi long K25 milien les long K11.2 milien edvens i go long Panga aninit long rot bilong Stok ritensen 10-pela krismas i go pinis:

(a) Long 1996 Panga i askim long K25 milien

(b) CIC i kamapim kot pepa long stil pasin

(c) Panga i kamapim kot pepa tok em i no mekim stil pasin.

(d) CIC i bungim amend Difens na Kros kleim long pepa bilong Panga.

(e) Panga bungim Mosen bilong Samari jasmen

(f) 1997 - Februari - Jas i givim oda long Panga long aplai long kot i ken harim aplikesen bilong em,

(g) 1997 - Ogus - CIC i bungim aplikesen long rausim aplikesen bilong Panga

(h) 1997 - Septemba - Kot i harim Mosen bilong rausim aplikesen bilong Panga long samari jasmen. Jas i tok sapos tupela pati i no stretim dispela hevi, ol i mas stretim gut ol pepa bilong kirapim kot stret.

(i) Wanpela wik bihain, Panga na CIC loya i bung wantaim jas husat i askim long harim mosen bilong karim tok i go long kot. 6-pela wik bihain long olgeta pepa i bin kamap klia. Kot i mas kamap hariap tasol bihain long dispela. Kuskus bilong kot bai tokaut long de na taim bilong kot long stat.

(j) Oktoba 2 - CIC Bod i strongim eksen na wok bilong CIC loya, Warner Shand Loya na sapot long kisim dispela toktok i go long kot long stretim aninit long lo.

6. Long pinisim toktok, dispela em bikpela laik bilong mi olsem ol stekholda na rejista grup wantaim bai sana pbiain long nupela Bod bilong CIC, luksave olsem planti samting i bin kamap pinis long strong na stretim ol politiks na operesen bilong CIC. Mi laik tok amamas long olgeta stekholda long rot bilong joinim asosiesen bilong ol wanwan, na bai yu gat rait long toktok insait long wok na ron bilong CIC na industri we i bikpela samting long yumi olgeta.

Coffee Plantation & Processors Association Inc

Dick Hagon
SIAMAN

SBDC helpim yu wantaim liklik wok bisnis

I KAM LONG LAS WIK

Ol bikpela samting long faktori bisnis

Sapos yu kamapim bisnis bilong wokim samting olsem faktori, yu mas tingim planti samting. Hia yu mas raitim we bai yu mekim samting olsem long wanpela mesin i go long narapela, wanem kain samting yu nidim long mekim dispela prodak, ol mesin em yu bai nidim o yusim wantaim namba na save bilong ol wokman meri bilong yu. Dispela i no wankain olsem plen bilong sanapim wanpela tred stua. Long sanapim stua, yu bai raitim wanem kain kaikai o samting yu bai salim, wanem hap bai yu salm ol dispela kaikai samting, we yu baim ol samting bilong salim, na hamas ol dispela samting i kos.

Ol bisnis husat bai givim "sevis" tasol long kastom mas tokaut long ripot long wanem kain we ol bai kisim sevis i go long ol kastoma husat bai baim sevis bilong ol. Dispela em ol kain sevis olsem bilong woksop, haus kaikai o trak bilong kisim kaikai go salim long ol manmeri na pikinini olsem long skol. Long dispela kain ripot, i gat tripela bikpela samting bilong skelim:

i) Yu mas tingim ol kain samting em yu bai yusim, hamas namba bilong ol dispela samting em yu bai yusim, kos bilong ol dispela samting, na ol bisnis o pipel husat bai saplaim ol dispela samting long yu.

ii) Yu mas tingim ol samting bilong mekim wok olsem tuls, mesin bilong wok, wanem kain mesin bai yu yusim, ol bisnis o pipel husat i saplaim mesin na samting long bilong mekim wok, na we



yu bai mekim wok bilong yu.

iii) Yu mas putim tu long ripot long wanem hap o eria em bisnis o faktori bai sanap, plen bilong faktori o opis spes, na kos bilong sanapim bisnis o faktori long eria yu makim long en.

Mani plen bilong bisnis

Dispela seksen i bihainim ol arapela hap bilong bisnis plen bilong yu, tasol em i toktok moa long sait bilong mani. Dispela hap ripot i tokaut o skelim ol sapos prodak o sevis em bisnis bai saplaim i makim stret maket o pipel em yu bilip bai sevim, hamas prais yu bai sasim long prodak o sevis em yu bai salim, namba bilong prodak o sevis em yu bai saplaim long ol kastoma, pe bilong hamas wokman metri em yu bai kisim. Dispela pepa wok o mani ripot bai helpim bisnis benk long lukim sapos bisnis bai mekim profit mani o nogat: Hia em ol arapela samting yu mas skelim tu insait long mani ripot o plen bilong yu:

i) Yu makim o bilip hamas pipel bai baim prodak o sevis bilong yu. Insait

long dispela ripot, yu mas makim namba bilong pipel long eria em bisnis i sanap o namba bilong pipel em yu laik sevim; hamas wantaim bisnis i givim wankain sevis o prodak olsem dispela yu laik sevim long luksave long hamas sia bilong maket yu at, makim hamas sevis o prodak em yu makim long salim long olgeta mun, na long wanpela yia.

ii) Yu mas makim hamas profit mani em bisnis i bilip long mekim. No ken lus tingting tu long hamas mani em yu ting bisnis bai lusim, bihainim bisnis plen bilong yu. Long painim profit mani, yu mas makim olgeta mani em bisnis bai mekim, na rausim ol kos bilong sanapim na ronim bisnis, na dispela mani i lep em profit mani bilong bisnis.

iii) Bikpela samting long olgeta bisnis em hamas mani stret em yu gat o bisnis i kisim long mekim wok. Olsem na yu mas mekim mani plen bilong ol mani tru em yu gat, hamas i go aut long baim sevis o pe bilong ol wokman meri, na hamas em yu kisim long olgeta de, wik, mun o yia.

iv) Yu mas tingim tu ol propeti o samting bilong bisnis, na makim wanem propeti em kampan i nidim, na wanem i stap nating na kosim moa mani long kampani. Na tu yu mas tingim sia bilong yu yet insait long bisnis.

NEKS WIK:

Ripot bilong neks wik bai tok klia moa long we bilong statim wanpela bisnis, wanem ol samting yu mas skelim gut long statim bisnis olsem mani, wanem kain bisnis yu laik sanapim, na kain olsem. Dispela em ol samting yu mas skelim bipo long yu laik go het long sanapim wanpela bisnis. Bikos long sanapim na ronim bisnis em i no wanpela isi wok.

Chevron lukluk long ges bisnis long PNG

YAKAM KELO i raitim

BIKPELA Maining kampani husat i save kisim oil long Kutubu i gat laik nau long kisim tu ges long graun we oil i stap long en. Dispela oil kampani em Chevron Niugini.

Chevron Niugini i luksave tu olsem i gat arapela mineral bilong kisim mani long en i save kam wantaim oil long graun. Dispela mineral em ges. Kampani i ting bihain long oil i pinis, kantri bai sot long mani na wok. Tasol ol i mas mekim wok yet wantaim nupela risos nau em ges.

Long las wik bikman bilong Chevron Niugini Mosley Moramora na wanpela saveman bilong Australia long wok bilong ges Cliff Leggoe i bin tokaut olsem ges i gat planti gutpela wok na helpim bilong em long ol pipel na kantri tu wantaim.

Tupela i tok ol ples we i gat oil long en, i gat tu ol ges i stap long ol i ken kisim.

Tupela i tok olsem i gat ol helpim bilong em long kantri na tu inap kamapim wok long ol manmeri bilong PNG na ol papagraun i ken kamap wantaim ol liklik wok bisnis long dispela projek.

Tupela i tok dispela ges projek inap kamapim moa wok na pulim mani long kantri long mak olsem 50 na 60 krismas olgeta. Na dispela em longpela taim bisnis projek we inap kirapim tru kantri, tupela i

tok. Ol sampela samting bai ges inap mekim em, yusim long kukim kaikai, ol ka i ken yusim long ron na lusim bensin na petrol, ol bikpela faktori i ken yusim, bikpela pawa jenereta i ken yusim long kamapim pawa na arapela moa.

Dispela toktok bilong kamapim ges projek insait long kantri i kamap pinis long haus palamen we ol lida i toktok pinis long en. Dispela ges projek bai kamaut long ol paip na go daun long Kumul pot long Westen provins. Ol i makim olsem bai longpela paip tru i go olgeta long Kwinslen Australia we ol bai yusim long ol haus faktori na mesin bilong ol. Sampela ges bai ol i skelim long ol bikpela sip i karim i go long ovasis maket.


Ol sampela eria we Chevron kampani i painim olsem i gat ges em olsem Kutubu Oil projek, Nomad, Hides ges na ol arapela moa long Sauten Hailans provins.

Tupela bikman bilong Chevron i tok bikpela samting nau em long stretim gut na redim maket bilong salim ges sapos projek ya i stap tru. Bikos maket tasol bai tokaut long groa bilong dispela ges bisnis projek long bihain.

Dispela olgeta toktok na tingting bilong statim ges projek i stap long han bilong gavman bilong PNG long givim tokorait long en na sapotim.

Nau yu no nap brasim strong bai yu wasim isi tasol!

NEW



NUPELA Pawa Klina. Tok save long ol pren bilong yu.

Wei bilong wasim samting wantaim NUPELA Pawa Klina. Dispela Klina yu save pinis tasol ol i putim mo pawa long detergent. Em i save putim out ol strongpela Pawa bubble long go insait long ol kles na klinim ol gut tru. Yu no nap wok hat bai Pawa bubble i wokim strongpela wok. Mekim de bilong yu isi baim NUPELA Pawa Klina em igat mo Pawa na strong bilong detergent.



Retpela mit i save pulim sik kensa

WOL NIUS

INGLAN: Wangepa sevei o wok painimaut i soim olsem ol pipel husat i save kaikai planti ret-pela mit i save gat bikipela sans long kisim sik kensa.

Retpela mit em ol mit olsem stek, mit bilong kau na sipsip samting.

Wangepa gavman komiti long Ingran i bin karimaut dispela wok sevei.

Sevei i painimaut olsem pipel i noken kaikai planti ret-pela mit bikos dispela i save pulim sik kensa.

Em i tok tok moabeta ol i kaikai moa kumu na ol siriel

kaikai bilong helpim ol daunim sans long kisim sik kensa.

Bihain long tupela yia wok stadi long dispela samting, komiti husat i bosim sait bilong kaikai na helt i tok lukaut olsem ol lain husat i save kaikai 90 grem hevi bilong retpela mit long wangepa de na wangepa kwata hambega i mas tingting strong nau long daunim kaikaim retpela mit. Ol dispela i save kaikai 140 grem hevi bilong retpela mit i kisim strong-pela toktok long daunim kaikai long ol.

Komiti i wok long glasim gut ol kain kaikai we ol man i kisim na i sut long ol pipel long Ingran i kisim sik kensa. Komiti i tok

moabeta ol manmeri na pikinini i kaikai moa kumu na prut samting na ol bai i gat helti na gutpela bodi. Na ol i no inap long bungim ol kainkain sik long fat tumas na ol kain hevi moa.

Fitin pela saveman long Wol Kensa Rises Fan i bin karimaut sevei long 4,000 pipel na ol i painimaut olsem sapos ol pipel i senisim kaikai bilong ol, dispela bai i daunim sik kensa long wol. Insait long wangepa yia, samting olsem 100,000 pipel long Ingran i save kisim sik kensa.

Helti o gutpela kaikai we i gat planti kumu, prut na liklik ret-pela mit long en wantaim eksa-

sais na gutpela skin we i no fat bai i daunim tripela sik we i save daunim planti pipel long wol. Em long kensa bilong lang, kensa bilong susu long ol meri na naraepla kensa bilong kolon.

Sevei i tok klia olsem moabeta pipel i no abrusim 80 grems hevi long kaikai retpela mit long wangepa de tasol kisim moa prut na kumu. Na mak bilong prut na kumu we ol i ken kisim insait long wangepa de em long 400-800 grems hevi, namel long 600 na 800 grem hevi siriel olsem konflikse samting, wokabaut long wangepa awa long olgeta de na nogat strong-pela dring na smuk.

OL WANSOLWARA NIUS

Welfea wok sot long mani

FJI: Sosel Welfea Dipatmen bilong Fiji i sot long mani bilong helpim ol famili husat i bungim hevi olsem bilong marit i bruk, na save lukautim pikinini long strong bilong ol yet. Olsem na nau yet asosiesen i putim stop long helpim ol dispela famili.

Dairekta bilong Sosel Welfea, Semesa Sikivou i tok moa long K3 milien em Fiji gavman i givim aninit long mani plen bilong dispela yia lonhg sapotim ol dispela famili i pinis.

Dipatmen i odarim pinis ol wokman meri bilong em long noken kisim moa aplikesen o askim long ol famili husat i laikim kain gavman sapot. Nau yet Dipatmen i helpim 10,000 famili olgeta.

• Long ol arapela nius, i gat bilip olsem Leba Pati Lida long Haus Palamen, Mahendra Chaudhry bai sanap long ai bilong kot long sampela toktok em bin mekim egensim kot insait long kantri. Nau yet opis bilong Atoni Jenerel i bungim ol evidens o witnes ripot ong kotim lida ya.

Wangepa loya long opis bilong Atoni Jenerel i tok ol i kisim evidens wantaim tingting long kotim Leba Pati lida. Ol i mekim dispela bihain long Chaudhry i no inap long strongim toktok bilong em olsem ol kot i no fit long stap namel na mekim stretpela wok insait long kantri. Em i mekim dispela toktok long bilong bilong Leba Pati, em i bin kamap i no longtaim i go pinis.

Ameriken Samoa na Samoa kros long nem

SAMOA: Tok pait i kamap nau long ol bikman meri long nupela nem bilong kantri Samoa.

Deputi Praim Minista, Tuilaepa Malielegaoi i tokim sampela bikman meri bilong Ameriken Samoa olsem gavman bilong em i no inap senisim nem bilong Samoa i go bek long Westen Samoa.

Mausman bilong Ameriken Samoa, Seti Lopa, i tok deputi praim minista bilong Samoa i tok strong olsem sapos Ameriken Samoa gavman i tambuim ol Samoa pipel wantaim "Samoa paspot" bai em bel kros nogut tru. Na bai mekim wankain long ol Ameriken Samoa pipel husat i gat "Ameriken Samoa" paspot na laik go insait long Samoa.

Lopa, man husat i go pas long dispela bil i tok planti memba i no soim sapot long pasim dispela bil. Em i tok moa olsem ol lida bilong Ameriken Samoa i mas kisim tok klia pastaim, bipo ol i pasim dispela bil.

"Wanem samting i kamap i soim rabis pasin bilong ol lida long Samoa long i no laik luksave long ol samting i kamap long Ameriken Samoa," Lopa i tok.

Oposisen Lida bilong Samoa, Tuiatua Tamasese, i tok dispela politik bilong Samoa laik strongim nupela nem ken kamapim belkros na wok bung namel long tupela kantri. Olsem na em i askim olsem ol lida bilong tupela kantri i mas toktok na wok bung wantaim long dispela samting. "Long senisim nem em i no bikipela samting, tasol ol wankain pasin we mipela i tilim em i bikipela samting," em i tok.

Ol meri Wes Honiara bung na tok bisnis

SOLOMON AILAN: Ol mauseri bilong wanwan wan pisin grup long Wes Honiara konstituensi bilong Solomon Ailan i bin holim wangepa bung. Insait long bung ya, ol paitim toktok long painimaut rot bilong mekim mani. Na salim ol samting em ol meri save mekim.


Dispela em bikipela astingting bilong wangepa tripela de wokso, em i bin stat long dispela wik Mande. Miting i kamap aninit long het tok long Inglis: 'Women in Self-Employment'.

Minista bilong Plis na Nesenel Sekyuriti, Lester Sa'omasi i opim dispela wokso. Na askim grup long kamapim wangepa 4-pela yia developmen wok progrem, we i mas gat bisnis interes bilong ol meri insait long en. Na em i bilip olsem dispela wokso bai kamapim sampela gutpela samting, we laip bilong ol meri long Wes Honiara bai kamap gutpela long bihain taim.

Strongpela win bagarapim Kiribati

KIRIBATI: Strongpela win i kamap nau long ol liklik ailan bilong Kiribati na bagarapim planti haus wantaim laip bilong ol manmeri na pikinini.

Bikipela bagarap i kamap long ol ailan i stap long not sait bilong Kiribati, na daunim o bagarapim ol haus, ol diwai, na tu mekim sampela skul i pas.



KRISMAS AMAMAS WANTAIM ZENAG

WINIM

*Air Niugini
tu-we balus tiket,
Moresby igo Cairns
4 pela nait long Bay
village Hotel na
Haia Kar long
4 deis*

Olgeta taim yu baim Zenag Kakaruk, bai yu gat sans long winim bikipela Krismas holide long Cairns - (Australia)

Long winim Holide long laip taim, yu salim tripela Zenag Logo bilong Zenag Kakaruk o Kiau kar, hariap wantaim nem na adres bilong yu.

**"ZENAG HOLIDAY"
P.M.B. 1 ZENAG
VIA LAE**



*Dro bai
kamap long 5
desemba na wina
bai tokaut long
93 FM - YUMI FM na
tu bai putim long
Post Courier
8 Desemba.*

**PRAIS BAI OL I YUSIM
LONG
MAS 30, 1998.**

LAIPSTAIL

KANAGE

"Em nau, narapela wik bilong mi ken"



□ Kanage em mangi Igiri. Em save wok sekyuriti long Mosbi. Misis bilong em i bilong Samatex. Misis i ekpektim Junia na i go stap long haus sik. Kanage pinis wok i go long haus na ol wanwok tokim em olsem misis go pinis long haus sik long asde nait.

Kanage bun guria na kwik taim sekim poket na kisim sampela coins. Em givim sisti i go long pablik telepon na ringim haus sik. Sista long haus sik kisim pon na tok halo: Na Kanage i askim: Is this the baby factory? Sista bekim na tok yes, orait Kanage askim gen: Is my wife make the baby yet or not? Sista i bekim na tok: She did.

Kanage kirap nogut na smail wantaim na askim sista gen: Is it boysees or girlses. Sista bekim na tok boysees. Kanage kirap bikmaus na lap wantaim na tok: "Oh Igiri! What a good shot. Sista harim long hapsait na pulim strongpela win stret. Kanage harim na kisim filings isi tasol na tok: Em nau, samting i wok long blut ya.

H. Tango (Namba 2 wina) MT HAGEN

□ Kanage save wok olsem wokboi bilong wanpela misis waitmeri long Lae. Waitmeri save tambuim Kanage long yusim toilet bilong haus. Wanpela de misis i go wok. Kanage wanpela wok long haus i stap na pilim pekpek. Tasol em tingim tambu na kisim taim stret. Man yu save, natural disasta ya. Mekim nogat na em brukim tambu na rausim pipia long toilet i stap. Sem taim em harim ka bilong misis draiv i kam aninit long haus na stap. Man, Kanage kisim narapela trabel gen. Sapos em presim wara long rausim ol pipia, misis bai harim long aninit long pairim em.

Taim em tingting i stap, misis wokabaut i kam antap long step. Hariap tasol Kanage putim pekpek long sink bilong wasim han, rausim long han, putim long poket bilong trausis na wokabaut i go ausait. Em bungim misis na step na tok: "Misis mi pinis wok nau. Na bai mi go long haus."

Em giaman olsem na taim em kisim kona, em das i go long Wara Bumbu long wasim as.

Zorro Tea MOSBI

□ Kanage i bilong wanpela ples long Sepik haiwe. Wanpela moning em wantaim pikinini meri wokabaut i go long gaden. Tupela bihainim bikrot na pikinini meri i karim wanpela pikinini blak bokis em ol i lukautim.

Sem moning sampela turis ron long bas i go olsem long Maprik. Ol lukim Kanage na pikinini meri na stap. Wanpela i go toktok wantaim Kanage. Tupela toktok i go na turis askim Kanage long pikinini meri bilong em olsem: is she your daughter? Na Kanage i bekim: "No, she is my woman".

Turis i askim gen long pikinini blak bokis: "Is that a flying fox?" Na Kanage bekim gen: "Yes, tonight, flying flying".

Turis lukim olsem em i no ki an ansa em i laikim. Isi tasol em kalap long bas na ol tekov. Tasol Kanage ting olsem em tok Inglis gut, na kisim hai filings nating.

Na Honna WEWAK

Moa tok pilai long pes 17

Laip stori bilong Bisop David Piso

AIVA TAMATE i raitim

BISOP David Piso em i hetman long Gutnius Luteran Sios bilong PNG bihain long

ol makim em long dispela wok i no longtaim i go pinis. Nau em i gat bikpela wok long stretim belhevi na bruk insait long sios politiks bilong GLC long 10-pela krimas.

"Mi bin save yet olsem God i singautim mi long kamap bisop na mekim dispela wok," Bisop David Piso hetbisop bilong Gutnius Luteran Sios (GTC) na beis long Wabag i bin tok.

Bisop Piso i mekim dispela toktok bihain ol i makim em olsem kaunsil memba na man i makim GLC na Evanjelikal Luteran Sios bilong PNG long Luteran Wol Federesen.

Tasol pastaim long Bisop Piso i kisim wok i bin gat bel hevi na bruk insait long sios politiks bilong GLC long 10-pela krimas.

Hevi i bin stap namel long olupela bisop, Weasa waima na Bisop Piso.

Long 1994, ol bin makim Bisop Piso long kamap het bisop. Long wankain taim tu, em bin sainim wanpela dokumen pepa wantaim Luteran Sios bilong Missouri Sinod long Amerika long wok bung wantaim ol we i go het gut long dispela taim.

Bisop Piso i tok hevi insait long sios bilong em i pinis na wanel pasin i kamap. Olsem na sios i stap isi na mekim gut wok bilong em long dispela taim.


Bisop Piso i apim nem bilong papamama na wanpela misinari Dokta Willia Bruce long ol bikpela na gutpela samting we i kamap long laip bilong em. Em bin kisim gutpela stia long kamap olsem sios pasto long papamama bilong em.

"Ol bin baim ol skul fi na strongim mi long sevim Bikpela," em i tok.

Papamama bilong em ol namba wan lain long hauslain bilong em long kamap Kristen. Planti hauslain bilong em i gat moa long wanpela meri bikos dispela i stap long pasin kastam bilong ol.

"Ol brata long papa bilong mi i maritim planti meri. Ol bin laikim papa bilong mi long bihainim ol tasol nogat, em i amamas long maritim mama bilong mi," Bisop Piso i tok.

Bisop Piso i kam long Imangapusa-Saka Veli long Wapenamanda eria insait long Enga provins. Ol misinari i bin



• Bisop David Piso.

kisim kristen lotu i go long eria na bilip i kamap strong. Olsem na pama i kisim wanpela meri tasol na bisop i bihainim wankain pasin tu.

Laik bilong em long kamap olsem wanpela wok man bilong Bikpela i bin kamap strong long 1967 na em i go skul long Evanjelikal Luteran Sios (ELC/PNG) Martin Luta seminari long Lae, Morobe provins. Kombain GLC na ELC/PNG i ranim dispela seminari skul.

Bisop Piso i bin wokim praimer bilong em long Pusa bipo long em i wokim haiskul long Tusbab Hai, Madang.

Taim em i go long semjari, em i lukim ol bikpela senis i kamap long Luteran komyniti.

"Long 1971 mi wokim vikarij skul bilong mi long Mosbi na bihain long en, mi go bek long pinisim seminari skul bilong mi. Long Novemba 19, 1992 mi bin pinisim skul na greduet wantaim diploma na digri long Tioloji. Mi bin kisim kes mani prais long wokim gut na kamap namba wan long skul bilong mi," Bisop Piso i tok.

Bihain long greduesen, Bisop Piso i go wok olsem

saplen bilong Sen Paul's Luteran Sios long Pausa we i stap long provins bilong em yet. Bikos long bikpela na gutpela wok em i mekim long komyniti, em bin makim sios long Wol Visen eksekutyutiv kaunsil long tupela yia. Em i lukim dispela tupela yia we em i wok wantaim Wol Visen olsem bikpela samting long laip bilong em. Long dispela taim tu, em i prisenim wanpela pepa ol i kolim long "Evanjelisim long PNG."

Long 1975 taim PNG i kisim indipendens, ami bilong Australia bin kisim Biosp Piso long wok olsem ami saplen bilong ol.

Em bin wok tu olsem saplen o pasto bilong ami na pipel long Moem Bareks long Wewak na Vanimo na Griniva. Em bin wok tu olsem welfea opisa.

Wok na ekspirians bilong em long PNG na ovasis i redim em gut long wok bilong em.

Bihain long wanpela yia ol i transferim Bisop Piso long lgam Bareks long Lae we em bin wok olsem saplen bilong join sevis kolis, gaidens tisa na

leksaŕa. Em bin statim tu difens ragbi lig klab long hap. Bihain long dispela ol bin transferim em i kam long Goldie Riva trening depo bilong difens we i bin wok long en insait long wanpela krimas. Em bin lusim Goldie bilong skruim skul bilong en long Tioloji.

Hatwok bilong en i karim kaikai taim sios i givim luksave long ol wok bilong en na makim em olsem hetbisop bilong GLC. Wanpela wok we bisop i save mekim olsem hap long sariti wok bilong en em long visitim ol sik manmeri.

Bisop Piso i lukim nupela wok bilong em olsem wanpela bikpela salens bilong em na famili bikos em i kisim dispela wok taim sios i stap bruk long tupela hap yet bihainim lidasip hevi. Wanpela i sapotim olupela bisop na arapela grup i sapotim em (Bisop Piso).

Dispela hevi i bin kamapim narapela hevi long mani insait long GLC we em i gat moa long K22,000 olsem dinau long beng i stap yet. tasol Luteran Wol Federesen i givim ol sampela helpim long stretim dispela hevi.

Toksave bilong ol Mutrus Kanage wina long dispela wik

Mutrus Kanage resis i go insait nau long namba tu wik. Dispela wik i gat tripela wina gen.

Wina bilong K50 prais mani em Graham Rambun bilong Kusbau Praimeri Skul long Madang provins. Fani tokpilai bilong Harry em long stail kuk boi bilong ol mes bilong ami, husat i stilim tupela sosis na haitim long tupela sait poket bilong trausis (ritim long pes 1).

Tupela arapela wina em H. Tango bilong Hagen na Harry Bella bilong Lae. Fani tokpilai bilong Tango i stori long kas nogut bilong Igiri,

husat i givim gut sot na misis i karim boyes o girlses, olsem em yet i tok: "... samting i wok long blut ya." Ritim long top spes bilong Kanage kolum long pes 11 na bai yu yet kilim skin long lap.

Tokpilai bilong Harry em long Kanage laik mekim 'marila' o blak pawa long hukim yangpela nil kabok bilong Tolai. Tasol abrus na kampang i go antap long lapun mama bilong meri Tolai em save mangalim. Na lapun mama i ron bihain long maritim em (ritim long pes 12 na yu yet skelim).

Rul bilong stap insait long resis:

Katim Mutrus Logo long fran o pes 1 bilong dispela niuspepa na salim wantaim Mutrus Kanage stori i kam long dispela adres:

Tokpilai wantaim Mutrus Kanage,
Wantok Niuspepa,
P.O. Box 1982,
BOROKO - NCD.

Wina bilong namba wan prais long olgeta wik bai kisim K50 prais mani i kam stret long Wantok niuspepa. Tupela ara-

pela wina bai kisim leta i kam long Wantok, we i tokim tupela long hau na we bilong kisim Mutrus Prais. Sapos yu no salim dispela Mutrus Logo wantaim stori, yu no inap winim prais.

Dispela wik i gat sampela manmeri klostu i winim sans long kisim K50 prais mani. Tasol bikpela asua em ol i no katim Mutrus Logo long fran pes na salim wantaim tokpilai bilong ol. Olsem na sore tumas, yupela mas traim gen.



Nem: Cathy Bobby

Krismas: 18

Adres: St Ignatius Secondary School, PO Box 41, Aitape, Sandaun Province.

Save Laikim: Raitim pas, ritim buk, harim musik, stori wantaim ol pren, na mekim penpren long ol arapela.

Nem: Martin A. Yalanem

Krismas: 19

Adres: A.R.S. Karuka Kantri, PO Box 183, Bulolo, Morobe Province.

Save Laikim: Raitim pas long penpren, pilai soka, kaikai buai, smok na raun wantaim ol wantok na ritim Wantok niuspepa.

Nem: Aponia Wingu

Krismas: 15

Adres: Kunjingini Primary School, PO Box 51, Maprik, East Sepik Province.

Save Laikim: Pilai volibal na basketbal, go long lotu na harim ol lotu singsing, stori wantaim ol pren, na raun long ol arapela provins.

Nem: Yama Yalanem

Krismas: 18 (man)

Adres: YHA Hauka Coffee Mill, PO Box 38, Aseki, Morobe Province.

Save Laikim: Tok pilai wantaim ol meri, pait long skin buai, go long disko na lukim ol pawa ben memba i pilai.

Nem: Len Chngal (man)

Adres: Log Pond Section, Putput Logging, PO Box 376, Kokopo, ENBP.

Save Laikim: Harim redio, ritim buk, lukim TV, tok pilai, raitim pas long ol meri, na painim isi meri long marit. Mi laikim meri man i lusim em o man bilong em i dai pinis.

Nem: Kepas Yalanem

Krismas: 17 (man)

Adres: Aseki Community School, PO Box 1, Aseki, Morobe Province.

Save Laikim: Harim kaset bilong Madang, kaikai na painim penpren. Nau yet em mi painim wanpela gutpela meri long maritim.

Nem: Brenda Tuia

Krismas: 15

Adres: Kunjingini Primary School, PO Box 51, Maprik, East Sepik Province.

Save Laikim: Go long lotu, stori wantaim ol pren, pilai volibal, laikim ol arapela manmeri na tilim samting wantaim ol arapela brata na usa.

Nem: Mishel Aris

Krismas: 23 (meri)

Adres: c/- PO Box 800, Kimbe, West New Britain Province.


Save Laikim: Go lotu long olgeta Sabat de, ritim Wantok niuspepa, klinim haus, wok gaden, kukim kaikai na mekim pren wantaim ol mangi. Mi bai amamas long bekim pas long husat mangi rait i kam long mi. Na mi laik maritim husat mangi i laikim mi.

Nem: Medelynn Bandi

Krismas: 20 (singel meri)

Adres: PO Box 93, Ambunti, East Sepik Province.

Save Laikim: Pilai volibal, sofbal, go long lotu, harim gospel musik, na raitim pas long ol penpren.



93FM YUMI Redio Stesen bilong yumi yet Harim olgeta gutpela program long 93FM YUMI

- * Olgeta lokol sing sing, na ol musik bilong bipo yet
- * PNG Motors prais bilong kes krop
- * Yamaha Provinsel weda ripot
- * BSP liklik bisnisan ripot
- * Pepsi lunch hour rikwest
- * City Pharmacy Lukaut bilong bebi
- * Post (PNG) Ron bilong ol Sip
- * Ela Motors kantri kaundaun
- * American God
- * Sande Gospol so

Em rait redio stesen ikamap
pinis harim long tok ples bilong
yumi yet, 93FM YUMI

Salim rekwest i kam long: YUMI request
Locked Bag 93
Port Moresby, NCD.
Fax: 320 1995

PNG FM PTY. LTD.
Trading as
NAU FM and YUMI FM
P.O. Box 774,
Port Moresby,
Papua New Guinea
Ph: (675) 320 1996
Fax: (675) 320 1995

Mangi Kaiva laik mekim samting stret


JAMES KILA i raitim

PLANTI ol manmeri long PNG i save laikim na skin kirap tru long harim musik bilong Oro provins taim ol musikman olsem Sauga, Babus, Hanakiro i save tromoi ol stail bilong ol. Tasol, planti ino skelim yet musik bilong Kaiva.

Plis stap isi na a skelim stail bilong wanpela yangpela man Kaiva, Fred Harrison husat i kamaut pinis wantaim nupela album bilong em long Chin H Meen taitol bilong en "Kaiva". Yes bai i laikim tru ya.

Fred em i wanpela memba bilong Alopops ben na bagaros i save pilai gita na tu tromoi musik long kibot. Em i bin rekotim 3-pela kaset album wantaim grup bipo long em i laik staitim solo kaset bilong em.

Fred em i hapkas Kaiva na Vavanga, tasol em i bikpela long



• Kaset kava bilong musik man, Fred Harrison.

sait bilong mama bilong em long Kaiva. Olsem na em i save tok olsem em i mangi Kaiva.

Em i bin go strong long pilai musik taim em i bin pinis skul long Matyrs Haiskul long 1984. Bihain long dispela taim laik bilong em long pilai musik i go strong tru.

Long 1992 wanpela poroman, Kelly Walter, husat i save go pas long Alopops i luksave long kain stail Fred i save pilai na em i askim em long joinim ol.

Taim Fred i stap olsem kibot pilaia, kain ol stail bilong em i winim lewa bilong ol lain long Chin H Meen studio, olsem na ol i askim em long pilai raun wantaim ol long ol bikpela konsert.

Fred i bin stap wantaim CHM Supasaun ben na pilai musik bilong ol lain olsem George Telek, Leonard Kania, Hitsy Golou, Charles Kivovon na Saugas. Fred i bin go ovasis wantaim ol grup

olsem Dejays na Cathy Lee long pilai.

Em i tok olsem bikpela laik bilong em long go kamap olsem solo atis bikos dispela em i driman bilong em.

Fred i tok tu olsem taitol bilong kaset bilong em em "Kaiva" ino Fred Harrison em planti taim ol redio anaunsa i save tok.

Long dispela nupela kaset bilong Fred em i singsing long tolples Kaiva, Korafe, Ewage na Hunzara bilong Oro provins, Tok Pisin na Inglis.

Oi singsing long kaset we i gat bilip olsem ol bai strong long lokal musik maket long PNG em Kaiva medley, Eri Eri na Kaiva disco. Oi singsing ya i gat stail bilong ol yet long kirapim filings bilong husat man o meri i tingting long sekim sekim bodi long musik.

Fred i dediketim nupela kaset bilong em i go long olgeta Kaiva pipel i stap insait long kantri.....Awara

1997 Saut Pasifik Musik Festival bai bikpela moa



• Oi mangi Vatdoro bilong Vanuatu.....Long tokples Vanuatu, mining bilong "Vat" em ston na "Doro" i min mekim nois. Vatdoro stringben i bilong Ragga viles long Not Pentekos Allan long Vanuatu.

Dispela grup i save pilai ol reggae musik na i bin kamaut pinis wantaim 5-pela album bilong ol long Vanuatu

Nau yet man husat i go pas long ben em Reynold Tamata. Oi narapela memba husat bai stap long konsert em Gary Mahina (drum), Richard Leo (ritem gita-singsing), Newman Tah (kibot), Charlie Gihiala (bes gita), Thomas Rau (tumbuna dram) Leo Hango (sekim mambu), na Alfred Loli (tumbuna danis man).

MOA long 20-pela musikman na meri long Saut Pasifik bai bung insait long wanpela bikpela konsert bilong Saut Pasifik Musik Festival long Sarere October 18 na Sande October 19 long Sir John Guise Stadium long Mosbi.

Dispela bikpela festival bai lukim ol grup i kam olsem long

Nu Silan, Westen Samoa, Fiji, Solomon Ailan, Vanuatu na ol lain top musikman bilong Papua Niugini stret i soim stail bilong ol.

Oi ovasis lain husat bai pilai long dispela konsert em Kulcha (Nu Silan) Five Stars (Samoa), Seru Serevi, Lia Osborne, Georgina Ledua na Laiza

Vulakoro (Fiji) Apprentice (Solomon Ailan) na Vatdoro (Vanuatu).

Oi lain bilong PNG husat bai pilai long festival em George Telek, Allan Lee Herove bilong Saugas, Robert Oeka, Leonard Kania, Basil Greg, Ronnie Galama, Hitsy Golou na Willie Tropu.

Dispela festival em wanpela bikpela musik konsert tru insait long Saut Pasifik bikos ol lain long Chin H Meen bai putim aut wanpela bikpela ol saun-sistem musik empliifaia.

•Oi samting ya i bikpela tru na pairap bilong musik bai bikpela moa.



TOP 20

This Week!

L/W	T/W	SONG	ARTIST
1	1	ERE BINI TU	KABANI
3	2	LESE MORI	AZZIMBAH
4	3	MAI TAURI AU	KABANI
2	4	O/ RAUSIM	K. PINERI
7	5	FROOKS LONG MI	AZZIMBAH
5	6	AZZIMBAH	AZZIMBAH
6	7	SHERRY	SERO SEREV
10	8	OVAVINE	AZZIMBAH
9	9	MERI DOI	C. KUSKUS
15	10	BOMANA	AZZIMBAH
14	11	KALUNGE	W. TROPU
12	12	TAMOATA	QUAKES
17	13	JUSTINA	L. WALLING
11	14	MASINGE	K. PINERI
19	15	NOQU ITAU	KABANI
13	16	GIABOX BAGARAP	W. TOROPU
16	17	LAKATOI	HIRI BAND
0	18	KEPOKO	HIRI BAND
18	19	LULU	QUAKES
0	20	UNITY	F. TADO/NEIL J.



PNG FM PTY. LTD.
Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995

Mani kapsait long 5 mail maket

SAPE METTA i raitim

YUMI wanwan man na meri bilong Papua Niugini i save gut olsem kaikai bilong gaden we yumi yet i save kamapim na karim i go long hap long salim i save helpim yumi yet gut long kaikai na stap gut long olgeta de.

Sapos yumi i no nap painim ol gutpela kaikai olsem kumu, kaukau, banana, taro, tapioka,

yam na kokonas long kaikaim, na sapos yumi laik kaikai rais na tin pis tasol long olgeta de, bodi bilong yumi bai inap long les na tu yumi i ken painim sik long kaikaim rais, tin pis, skon na lem fleps. Ol dispela kaikai em yumi save baim long ol stua, na ol dispela kaikai i gutpela na i save helpim yumi taim yumi hangre, tasol kaikai long gaden i namba wan, maski long ol kaikai bilong stua.

Long maket taim ol man na meri isave salim kaikai bilong gaden ol i save salim gut na prais tu i go daun tru. Prais i daun tru i min olsem sapos yu baim 10-pela kaukau long maket, em bai yu lusim K2 o K3 long baim, na sapos yu i go long stua na baim 10 kilo rais beg, em bai yu i ken lusim samting olsem klostu long K10.00. Skelim gut ol prais ya na askim yu yet long wanem hap

bikpela senta mi save lukluk raun long maket bilong ol na mi save lukim ol man na meri i save salim kinkain kaikai na abus tu. Na ol i save pulim planti mani taim ol i save salim ol kaikai na abus bilong ol. Em i tru, tasol mani i no save kapsait tumas long ol dispela kaikai na abus.

Wanpela samting mi luksave we i save pulim planti mani long lep, rait na senta em buai, daka na kambang. Dispela

maket, em dispela eria tasol mani i save bagarap na kapsait.

Sapos yu laik go long 5 Mail maket, yu ino nap westim taim long wetim PMV bas. Olgeta wan minit bas i save ron igo-ikam long 5 Mail maket we i stap arere stret long bikpela Okuk haiwe rot i go antap olsem long Kabuifa na Simbu.

Long baim bas em bai yu lusim 30 toea long igo na narapela 30 toea long kambek.

bilong gaden na kukim lem fleps, skon, kiau na salim ais blok na kolwara em ol lain asples i save mekim. Tasol ol dispela liklik kaikai nabaut i no save pulim planti mani.

Wanpela asples man long Kefamo viles, Tambu Huki i tok, mani i save ron na kapsait insait long 5 Mail maket long kinkain stail na pasin. Na buai tasol i winim olgeta arapela samting we ol man na meri i save salim na


dring, aiskrim na ais wara. Na igo moa long arere sampela yangpela na lapun tu bai salim ol kaikai bilong gaden olsem kaukau, banana, tapioka, kumu na planti arapela kaikai nambaut.

Huki i tok dispela pasin bilong pulim mani ino stop long hia. Surik i go moa yet long sait ol man na meri bai sanapim dats bod na bai ol i salim dats spia long sut na winim ol kol dring. Na tu long wankain pasin ol man bai bung long wanpela seksen long baim ol dats spia long sut na winim spak wara (bia). Na klostu long dispela dats na bia bai planti man, meri na pikinini tu bai wokim 10 o 15-pela grup long sutim kas na pilai laki.

Huki i tok long sem taim, taim planti man na meri i bisi long baim na salim ol kinkain samting long 5 Mail maket, arere tasol long bikpela haiwe rot sampela man na meri bai karim kopi beg bilong ol i go na skelim na kisim mani long kopi beg bilong ol i go na skelim na kisim mani long sait bilong ol. Em i tok olgeta samting long 5 Mail maket i ron tasol long mani, tasol buai em i go pas long pulim moa mani longol arapela samting.

Huki i tok ol biklain man na meri husat i save salim buai em ol lain long sait bilong Simbu.

Em i tok bikos ol dispela lain i lukim tumas mani long taim ol i sve salim buai, ol i luksave pinis olsem long dispela pikinini bilong diwai ol i save pulim planti mani olsem na long dispela as ol ino save givap long mekim dispela wok bilong salim buai. Huki i tok long save bilong em - em i save lukim ol lain bilong salim buai i save i go daun long Markham na lusim K200 o K300 long baim ol buai beg. Ol i baim pinis bai ol i karim i kam antap long 5 Mail maket na stat long salim. Maski sapos ol i lusim K200, bai ol i ken kisim bek dispela mani na antap long K200 bilong ol, ol i ken pulim narapela K300 na kamap wantaim K500 bihain long ol i salim dispela wanpela beg buai insait long tu o tripela de. Ol i mekim olsem pinis bai ol i das-tim gen i go daun long Markham na wokim wankain pasin. Na em bai igo olsem yet. I nogat stop bilong en. Olsem wanem? Sapos yu ino save, yu yet i go na lukim. Mani i ron, pulap na kapsait yet long 5 Mail maket. Husat bai stapim dispela kain laipstail long 5 Mail Maket?



• Ol kinkain we long lukim mani i pulap na kapsait long 5 Mail buai maket. Antap: Ol man, meri na pikinini i salim buai long 5 Mail maket. Aninit: Ol yangpela man i kukim lem fleps. Ol foto: SAPE METTA.



stret prais bilong ol kaikai i go daun tru. Mi yet isave stap long Goroka na save raun i go aut long planti arapela taun na siti olsem Pot Mosbi, Lae, Madang, Wewak, Vanimo, Kerema, Manus, Simbu, Mt Hagen and Mendi.

Long ol dispela

em i tru.

Long wanpela eria insait long Isten Hailens we ol man na meri i save maketim buai, mani i save kapsait long dispela buai maket.

Sapos yu raun long Goroka taun na harim ol i tok 5 Mail buai

Maket ya em i stap insait longples Vanima namel long tupela bikples em Kefamo na Kafuku viles. Na lukluk raun insait long dispela 5 Mail maket, ol asples lain i no save pilim sem long salim buai. Tasol long salim ol arapela samting olsem ol kaikai

pulim moa mani.

Huki i tok ol man na meri bai salim buai na long sait insait yet long 5 Mail maket, ol arapela man na meri bai kukim skon, kumu, kaukau na banana na salim long 10 toea, 20 toea na 30 toea. Sampela lain bai salim lus smok, ais blok, sof

Coming to a school near you!

Drink Fanta & Say "NO TO DRUGS"

FANTA is a Registered Trademark of The Coca-Cola Company



Bik
Bro

REBO

AUDA LAIK GO LONG PLES TASOL
PAPA BILONG EM TOKIM EM LONG
WET PASTAIM...



EM I ORAIT PAPS.. BAI MI GO KISIM P.M.V.
NA GO LONG PLES.. YU STAP WETIMMAMA!

P.M.V. NOWEI!
EM FRAIDE NA
PLANTI SPANNAN

TASOL, PAPS! MI LES LONG WET
IGO FAIV-KILOK APINUN! MI LAIK
GO NAU! KAMON PAPS! PLUS!



INAP! HARIM
TOK BILONG
MI! GO AUT-
SAIT NA WET!

TARANGU,
AUDA NO-
GAT TOKTOK
NA EM GO
AUT...



LOANS
MIEN

MAN! PAPS
INO DISPELA
KAIN MAN!
EM INO MAN
BILONG KEDS
O TOMAS.

DISPELA KAIN WET
IGO FAIV-KILOK EM
MI LES! MI WESTIM
PLANTI TAIM TRU!



MASKI! MI GO
NA KISIM P.M.V!
PAPS KEN KAM!
SEKIM MI BIHAIN!



AUDA INO
HARIM
TOKTOK
BILONG
PAPS NA
GO...

YU GO LONG
POREBADA
TU, AH?



(Hic!) EM NAKI!
KALAP TASOL
YAH!

Igo moa Neks Wik!!



SIPAK MAIK

NAU OL I GO LONG OPIS BILONG
LOYA...



ER.. MI LAIK SAVE HAMAS
BAI MI KISIM LONG DISPELA
ER.. SKENDOL, AH?

WELL... MI LUKIM
PASTAIM.. SAPOS MI
WINIM KOT NA
KISIM OL BIA BILONG!
MI BEK BAI MI.. ER..
SALTIM YU
WAN KATEN..



WAN KATEN?! @*Z!
NO WEI!! MI NO LIKLIK
MANGI NATING!!



SORI TRU!
NO DIL!!

ORAIT! ORAIT!
AI MEK IT
TWO KATEN, AH?



LAPUN KOIKOI OPIM DUA NA
NA GO AUT...

STIL NO
DIL!!

OKE, HAU ABOUT
K500 NA FAIV
KATENS!



NAU, DATS
MAI TOK
PLES!

!?!



Igo moa Neks Wik!!

TO ALL CONCERNED PAPUA NEW GUINEANS

YOU ARE BEING MISLED BY THE LOGGERS

THE LOGGERS ARE RUNNING A SCARE CAMPAIGN IN THE MEDIA BECAUSE THEY ARE INEFFICIENT AND GREEDY. THEY WERE TOLD IN 1993 TO GET INTO DOWNSTREAM PROCESSING BUT THEY WERE TOO GREEDY MAKING HUGE '*PROFITS FROM EXPORT LOGGING*' TO CHANGE THEIR WAYS.

YOU ARE BEING TOLD THAT BECAUSE LOG PRICES ARE NOW LOW, THE TAXES, ROYALTIES AND PROJECT DEVELOPMENT LEVIES ARE TOO HIGH.

FACT NATIONAL GAZETTE G57 11TH JULY 1996

ROYALTY

SET AT K10 PER CUBIC METRE'

(NOTE THE LOGGERS GET PAID IN US DOLLARS BUT LANDHOLDERS GET 1) AID IN DEFLATED KINA)

PROJECT DEVELOPMENT LEVY

SET ON A SLIDING SCALE WITH THE LOW END AT K2 PER CUBIC METRE, AND LOG PRICES ABOVE K200 PER CUBIC METRE AT K13 PLUS 7.5% OF THE FOB PRICE PER CUBIC METRE.

A SLIDING SCALES MEANS WHEN PRICES DROP SO DOES THE LEVY. SO WHAT ARE THE LOGGERS COMPLAINING ABOUT? WHEN THE LOG PRICES DROP, SO DOES THE LEVY.

THE LOGGERS OWE LANDHOLDERS AS MUCH **AS K50 MILLION IN BACK-PAY IN THE PROJECT DEVELOPMENT LEVY**. THIS MONEY IS OUTSTANDING SINCE THE 1ST OF JULY 1996 AND HAS NEVER BEEN PAID BECAUSE OF SECRET DEALS BETWEEN THE LOGGERS, SOME POLITICIANS AND THE FOREST AUTHORITY. THE LOGGERS ARE NOW THREATENING THE NATION WITH A STRIKE, SAYING THEY ARE CLOSING DOWN.

THE NGOS HAVE IDENTIFIED 14 LOGGING PROJECTS THAT ARE NOT SUSTAINABLE, OR INVOLVED LEGAL IRREGULARITIES.

THE NGOS HAVE IDENTIFIED A K30 MILLION GAP BETWEEN THE VALUE OF LOGS EXPORTED FROM PNG TO JAPAN, AND THE IMPORT VALUES QUOTED IN JAPAN DURING 1996.

THE INDEPENDENT REVEALED THAT SECRET DEALS WERE MADE TO GIVE UNREGISTERED LOGGERS TAX CONCESSIONS JUST BEFORE THE LAST ELECTIONS.

**WE RESPECTFULLY ASK THAT, YOU SUPPORT A
NEW COMMISSION OF INQUIRY INTO THE LOGGING INDUSTRY**

SPONSORED BY: • GREENPEACE PACIFIC AND ICRAF, BOX 155 UNIVERSITY, NCD.
SUPPORTED BY: • CONSERVATION MELANESIA • MELANESIAN ENVIRONMENT FOUNDATION
• RESEARCH AND CONSERVATION FOUNDATION OF PAPUA NEW GUINEA

KANAGE

"Em nau, narapela wik bilong mi ken"



■ Kanage i go long Rabaul na lukim wanpela yangpela meri Tolai na aigris tru long em. Em i go painim ol blak pawa man na askim long baim skin diwai. Em nau em i baim wanpela na papa bilong skin diwai i tokim Kanage olsem, "taim yu redim skin diwai ya pinis, orait yu go long hostel bilong meri ya long moning na nok long dua. Taim em kam ausait, yu kis long em hariap na ronawe. Bai yu lukim em i ron bihainim yu i kam." Olsem na Kanage redim ol skin diwai pinis na long moning taim em i go long hostel bilong ol meri. Em i go na nok stret long dua bilong meri Tolai ya. Taim dua i op, Kanage kalap i go na kis na ronawe i go. Em i ron i go na tanim bek na lukim ya nogat, em lapun mama bilong meri Tolai ya i pulim smok paip na ron bihainim Kanage i kam. Man Kanage givim siksi na makim stret long Rabaul Polis Stesin.

Harry Bella (Namba 3 wina)
Lae. MP

□ Kanage go long haus long lukim susa bilong em long dring ti. Taim em kamap long haus, liklik pikinini boi bilong susa i sindaun long varena na lukim Kanage kam. Olsem na em singaut, "mami, mami, atol Kanage i tam." Taim Kanage harim olsem em go klostu long kandre bilong em na tokim em, "bihainim yu bipla, bai yu bipla atol tret." Liklik kandre bilong Kanage i laik tok ankol tasol em kolim atol. Kanage i ting kandre i tok nogut long em olsem na em tu belhat na givim go bek long kandre bilong em.

Gaet Tembul
Lae. MP

■ Kanage wantaim poroman bilong em i raun long Hagen taun. Tupela spin i go na Kanage i saitim wanpela meri Banz na tupela pasim tok long bung long nait. Kanage i lukim na save pinis.

Long apinun, Kanage i kuk hariap tru na waswas na bilas stail tru na redi long tekov i go lukim prenmeri ya. Em i tokim poroman olsem, "i gat hevi long famili bilong pikinini meri bilong kandre man. Olsem na bai mi go sindaun wantaim ol long haus krai." Em tok olsem na em tekov i go long haus bilong meri ya. Kwiktai tu poroman bilong Kanage i kirap na wokabaut isi bihainim lek bilong Kanage na go kamap long haus bilong meri ya. Kanage i ting nogat man olsem na em i go na patim sait bilong haus na tok, "Rosa, mi kam pinis ya." Em nau Rosa i kam aut isi long isi long haus. Tasol Kanage i harim olsem liklik pikinini i krai long haus olsem na em hait aninit long lata. Rosa i go bek na stretim gut pikinini long em i mas slip na em i laik kamaut gen. Tasol bebi i krai gen na poroman bilong Kanage i sanap long sait na bikmaus, "Rosa, traim na givim gut susu long pikinini ya, wanem samting i stap ausait na yu laik go lukim?" Taim Kanage harim olsem, em givap olgeta na tekov i go long haus. Long haus, poroman bilong Kanage i giaman slip na wetim em i stap. Taim Kanage sotwin wantaim na i go kamap, poroman i askim, "wanem samting na yu sotwin tru?" Tasol Kanage i tok, "kandre man i no amamas long mi na mitupela pait tasol mi dropim em na tekov kam."

Chris Yaluwe
Kimbe

□ Papa Kanage i go daun long ples long boda wantaim junia Kanage na narapela pikinini boi. Junia Kanage wantaim narapela boi ya i wok long pilai pilai long ro: na mekim paps Kanage i belhat na patim tupela long pilai. tumas long hot san. Long haus, paps, Kanage kisim ol tupela na ol i go waswas. Taim junia Kanage rausim trausis, em tokim paps Kanage na narapela poroman bilong em, "yutupela lukim mi, i luk olsem mi wanwan nau ya?" Na paps Kanage na narapela boi ya i tanim na tok, "em nau, tru ya. Nau em 1997 na yu wanwan. 1998 bai yu tutu na 1999 bai yu tri tri. Na yia 2000 bai yu dabol."

Anak Dari Kanax
Vanimo

Tupela mangi kam long famili bilong wara



Wanpela taim, tupela brata i save stap long wanpela ples. Olgeta manmeri long dispela ples i no save laikim tupela bikos ol i tok mama bilong tupela manki ya em masalai meri. Mama bilong tupela i nogat wanpela wantok o ol lain famili long dispela ples. Em i kam long sampela hap na bungim papa bilong tupela boi ya na maritim. Na em kamapim tupela. Bihain em i lus nating long ples we nogat man i save. Taim papa bilong tupela manki ya i go painim mama bilong ol, em tu i no kam bek gen long ples. Ol lain bilong papa bilong tupela boi ya i no save wari o lukautim gut tupela manki ya.

Tupela i save stap long haus bilong ol we papa i bin wokim bilong ol. Tasol bikos tupela i liklik boi tumas, ol lip saksak long het bilong haus i wok long go olpela na ren i save pundaun long tupela long nait. Na ol sait sait bilong haus tu i go olpela na wok long bruk na ol manmeri i ken lukluk i go insait long tupela manki ya na mekim tok pilai na lap long tupela.

Wanpela taim, ol gaden kaikai bilong tupela i sot bikos nogat papamama long planim nupela gaden long kamapim ol nupela kaikai. Olsem na tupela



boi ya i nogat kaikai na tupela i stat long pilim hangre.

Wanpela nait, tupela i pasim tok long go painim papamama bilong tupela bikos ol lain brata susa bilong papa i no save helpim tupela long kaikai na ol samting. Long biknait yet, tupela bungim ol samting bilong tupela na redim wanpela las taro na kukim long paia na lusim i stap.

Long bikmoning stret, tupela i kirap na kaikai dispela wanpela hap taro bilong tupela pinis na tupela stat long wokabaut i go. Tupela wokabaut i go i go kamap long bikpela bus na go antap long maunten na i go daun na kamap long nambis na bihainim solwara i go yet. Tupela i kam kamap long wanpela hap ples we wara i save pundaun long maunten na i go raun na liklik brata i krai na singaut long mama bilong tupela. Em i nogat strong moa bikos hangre i bagarapim em na lek na bodi bilong em i tait olgeta. Olsem na em i pilim nogut na krai nau long mama papa bilong tupela.

Taim em i wok long krai i stap, bikpela brata i sori tu na em krai long liklik brata bilong em. Taim tupela i wok long holim han na krai i stap, bikpela nois tru i kamap long dispela bikpela raun wara. Wara i pairap na flai i go antap na kam daun. I no longtaim, bikpela wara i pundaun long maunten ya i drai hariap tru na kamap bikpela raun wara tasol long tambolo. Na bikpela lait i kamap na ol kain kain piksa i kamap wantaim ol singsing na bikpela lain manmeri i kamap bung antap long dispela wara. Wara i op na ples i kamap olsem wanpela bikpela ples tru.

Em nau wanpela meri i wokabaut i kam na soim han long tupela manki ya na tok long tupela i mas kam long em. Tupela boi ya i lukim na pret. Tasol meri ya i tromoi han yet na putim han i go long tupela i holim han bilong em. Em nau tupela manki ya i holim han bilong meri ya na em pulim tupela igo pas long tupela na tok, "mi mama bilong yutupela. Mi kam long famili bilong wara.

Olsem na mi no fit long stap antap long graun olgeta taim. Olsem na mi mas kam bek long ol lain famili bilong mi na lusim yutupela wantaim papa bilong yutupela.

Em i tok, papa bilong tupela i bin painim em i kam tasol em i laik kisim mi go bek gen, olsem na wara i daunim em na em dai.

Mama bilong tupela manki ya i belhat long ol lain famili bilong papa bilong tupela boi ya i no save lukautim gut tupela. Olsem na em i promis long panisim ol manmeri bilong dispela ples long mekim pasin nogut long pikinini bilong em. Olsem na wanpela de, em i stapim wara na olgeta manmeri long ples i painim hat long kisim wara bilong dring na kukim kaikai na waswas samting. Ples i drai olgeta inap 6-pela mun na olgeta manmeri i dai nabaut long drai. Taim em i amamas olsem olgeta manmeri i dai pinis, orait em i larim wara i ron gen. Na em i amamas wantaim tupela pikinini man bilong em na ol i stap amamas olsem wara famili.

Bai mi mekim wanem nau bikos kasen susa bilong mi i strong long mitupela i marit



DIA LAIPLAIN,

Kasen susa bilong mi i laik maritim mi tasol mi no wanbel long dispela bikos papa bilong en na mama bilong mi i wanblut. Tupela i brata susa.

Long taim bilong skul malolo mitupela i save slip wantaim na wokim pasin bilong ol marit lain. Dispela i bin kamap planti taim pinis.

Nau mi stap long taun na skul tasol kasen susa ya i save rait i kam na em i laikim mitupela long marit taim mi pinisim skul. Meri ya i no wari olsem mitupela i

bilong yupela em i orait long yutupela i marit, orait, moabeta yu tingim trupela laik bilong yu long meri ya.

Bai mi mekim wanem?

COUSINS

DIA PREN,

Yu gat wanpela hatpela disisen i stap long han bilong yu long mekim long dispela samting.

Ating bikpela as tingting long yu bilong maritim kasen susa bilong yu em yu slip planti taim pinis wantaim em. Tasol long wankain taim tu yu wari long wanem samting bai kamap sapos yu no maritim em.

Moabeta yu toktok long famili bilong yutupela na kisim tingting bilong ol long dispela samting. Kasen susa bilong yu i save tu olsem sapos tupela wanblut i marit, ol pikinini bilong ol bai i gat sampela bagarap long ol olsem mama i karim wantaim wanpela hap bodi i bagarap o kain olsem. Planti pipel long wol i stapim dispela kain marit namel long ol wanblut bikos ol i luksave long hevi i ken kamap.

Ol pasin tumbuna long ples bilong yu i olsem wanem? Sapos long pasin kastom

Sapos yu no inap o yu no laik maritim kasen susa bilong yu, yu ken raitim pas na toksave long em long disisen bilong yu. Tu yu ken rait long papamama bilong yu na tokim ol long dispela samting bikos yutupela i wanblut bilong ol na ol bai wari long yutupela wantaim. Na ol bai laik helpim yutupela.

Yu ting olsem kasen susa bilong yu bai i wokim tru dispela samting we em i toktok long em bilong kilim em yet?

Sampela taim pipel i save mekim ol dispela kain toktok long kisim samting we ol i laikim. Tru tru ol i no minim long mekim i kamap tru.

I gutpela sapos long meri ya i tokim wanpela gutpela pren o hauslain long laik na tingting bilong em bikos bai gat lain long helpim em sapos yu no maritim em.

Taim bai helpim yutupela long skelim laik bilong yutupela long wanpela arapela. Long wankain taim tu, i moabeta long yutupela i mekim pren wantaim ol arapela yangpela manmeri.

LAIPLAIN

Pasin bilong drink na spak long pablik i no gutpela

DIA EDITA,

Mi wanpela mangi long Baiya Riva. Nau yet mi stap long Baiya Distrik Stesin long Westen Hailans provins. Mi laik sapatim pas bilong brata Kume Kinkama Asaro, em i bin kamap long dispela niuspepa. Pas bilong em i toktok long pasin bilong sampela manmeri i save dring spak na mekim bikhet pasin long pablik ples.

Mi laik skruim dispela hap tok na tok olsem mi save lukim ol man i drink na

spak long pablik ples, na bagarapim planti samting. Sampela i save giaman long brukim botol, singaut nabaut olsem ol ainman o mekim pasin nogut long ol meri.

Mi ting kain bikhet pasin i kamap bikpela nau long Papua Niugini. Na long ples Baiya tu i wankain. Olsem na mi no amamas tumas.

Ol man save mekim olsem, ol i no save dring planti. Ol i dringim wanpela botol na

so op nating. Ating ol i spak long spet bilong bia tasol ya.

Ol man tru i no save mekim kain bikhet olsem. Ol save dring isi, bihain kirap go long haus na slip gut.

**Simon Lome
Baiya Riva
WESTEN HAILANS**

Maski salim buai long bas stop



DIA EDITA,

Mi wanpela grasrut lida bilong Leron/Wantoat sab distrik long Morobe provins. Mi laik sapatim pas bilong brata Heru Anabisa bilong Goroka. Mi laik toktok long pasin nogut em sampela hailans manmeri save mekim.

Mi lukim sampela hailans manmeri long Lae save salim buai na lus smok arere long ai bilong stua, opis na bas stop. Dispela pasin i no gutpela long ai bilong olgeta manmeri.

Taim ol salim buai long ol hap ya, ol manmeri save kam baim buai na kaikai. Na bai spet nabaut long ai bilong stua, opis o bas stop. Mi ken tok mipela ol aspies Morobe pipel i no amamas long dispela kain pasin.

Bikos mi kolim biknem hailans, mi laik tok olsem planti hailans i gutpela. Ol lain mi komplem long en em ol wanwan lain tasol. Olsem na taim yupela ol dispela lain i ritim dispela pas, plis kisim sampela sem na senisim rabis bikhet pasin bilong yupela.

Mipela ol Morobe manmeri i go long ol hailans taun olsem Goroka, Simbu, Enga na Hagen, mipela i gat rispek long siti o taun bilong yumi. Na yupela ol hailans i kam i stap long Lae, yupela i bagarapim tru Lae siti. Mi ken tok wankain tu long Mosbi siti. Mi raun long olgeta taun na siti na lukim stret long ai bilong mi. Olsem na mi ken tok.

I gat lo em Lae Siti Kaunsil i putim pinis we i tambu long salim buai na lus smok long kankain hap. I gat maket ples i stap we yu ken go salim buai na daka na kisim liklik mani bilong yu long sindaun long taun. Na maski go salim arere long opis, stua na bas stop.

Olsem na yu husat brata na susa bilong Morobe i laik sapatim o egen-sim pas bilong mi, rait tasol na mi bai amamas long ritim.

**Mathias Yalambing
Leron/Wantoat
MOROB**

Redio Madang no save pilaim PNG musik

DIA EDITA,

Mi wanpela mangi Yandera long Bundi Apa Ramu distrik bilong Madang Provins. Mi stap nau long Lae, Morobe provins.

Mi save harim planti manmeri komplem long Redio Madang olsem ol i no save pilaim gutpela lokol Papua Niugini musik. Na save apim nem bilong ol arapela

redio stesin tasol ol bilong Simbu, Goroka na Morobe.

Komplem bilong ol em Redio Madang save pilaim musik bilong ol waitman meri tasol. Na planti kaset bilong PNG yet em nogat na nogat tru.

Mipela laikim ol lokol musik olsem bilong Wali Hits na tumbuna trek. Tasol ol dispela

singsing i no save kamap liklik.

Olsem mi bilong Madang, mi save sem taim ol manmeri tok olsem. Redio Madang i laik kamap olsem redio stesin bilong ol ovasis kantri.

**Andy Gandine
LAE
MOROB**

Pelika n Wenge mas tingim Bulolo Menyamya rot

DIA EDITA,

Mi wanpela mangi Menyamya long Morobe provins. Mi gat komplain igo long memba bilong Menyamya. Thomas Pelika na Gavana bilong Morobe, Luther Wenge.

Plis, mi askim tupela bikman nau long lukluk na stretim gut rot long Bulolo i go inap long Menyamya.

Nau yet, dispela rot i bagarapim. Bikos ren i bin puindaun na mekim bikpela baret namel long rot. Olsem

na planti PMV ka na ol kampani na gavman ka i save kapsait long rot ya.

Plis wokim gut rot we mas igat gravel o ston i go olgeta. Dispela bai helpim mipela ol pipel long ronim gut PMV ka bisnis, na tu ken kisim ol gaden kaikai na ol kes krop i kam salim long Lae, biksiti bilong Morobe.

**Bob Teni Gavio
Menyamya Distrik
MOROB**

Redio Morobe mas tingim ol longwe rikwes pastaim

DIA EDITA,

Mi wanpela mangi Bunder bilong Marawaka na Morobe.

Mi laik autim bikpela be hevi bilong mi i go long ol anaunsa bilong Redio Morobe.

Taim yupela laik pilaim ol singsing long "Laik bilong Wanwan" program, plis luksave pastaim long pas bilong ol manmeri i stap long longwe provins na rait i kam.

Na pilaim pastaim ol singsing long laik bilong ol.

Mi rait long tok olsem bikos mipela ol manmeri i stap long ol longwe hap olsem Kimbe, Rabaul na Mosbi save putim yau long redio, na harim yupela pilaim musik, bihainim askim o laik bilong ol aspies lain long Morobe tasol.

Narapela samting tu em yupela ol anauna save mekim planti toktok tumas long dispela program. Mipela ol lisina i no laik harim toktok bilong yupela, mipela laik harim singsing.

Olsem na plis, toktok liklik taim tasol na pilaim moa musik.

Ating long dispela kain we, yupela ken sevim moa taim long tupela o tripela moa musik.

**Michael Wosako Sail
MKS Yavaya Ruts**

Ambunti Drekekir pipel karai yet long Haiwe rot

DIA EDITA,

Mi wanpela bus mangi insait long Ambunti Distrik long Is Sepik provins. Mi laik tok olsem Ambunti i gat planti graun bilong groim kopi na kaokao. Tasol mi tingting planti olsem taim mi groim, bai mi kisim go salim long wanem rot? Long wanem i nogat rot bilong ol baya i kam baim kopi na kaokao bilong mi.

Planti kain bisnis na kaikai bilong ples i sting nating na kaikai long maus tasol. Na tu i luk olsem mipela nogat maus man.

Sapos bikman bilong mipela Joseph Malip i no bin dai, ating nau mipela Ambunti Drekekir inap gat haiwe pinis. Olsem na nau mi askim nupela memba bilong mipela long mekim sampela senis long dispela tupela eria. Em bai mipela i bilip olsem yupela ol lida i bihainim plen long helpim mipela. Na mipela bai sapatim wok bilong yupela olsem lida bilong mipela.

Dispela em tingting bilong pipel long ples. Mi askim nau nupela memba long bekim pas long Wantok niuspepa, na bai mipela ol pipel i lukim.

**Trangu Mangi
Ambunti
IS SEPIK**

Sapos yu laik salim pas bilong yu, salim i kam long dispela adres:

**EDITA
WANTOK NIUSPEPA
PO BOX 1982
BOROKO**

NATIONAL CAPITAL DISTRICT

■ Yu mas putim trupela nem long pas bilong yu.

Ples mangi egensim VAT takis

DIA EDITA,

Mi wanpela mangi long ples Tongunjab long Ambunti eria bilong Is Sepik provins. Mi bin ritim long Wantok niuspepa wanpela stori we i toktok long dispela nupela VAT takis em gavman i laik kamapim. Ripot i tok dispela takis bai kilim stret mipela ol liklik manmeri. Bikos em bai apim prais bilong ol sevis na samting. Long wanem gavman i nogat gutpela opis wok yet long sekim olsem ol stua na bisnis kampani i noken apim nating orais, bikos long dispela VAT takis.

Nau yet mi na ol arapela liklik manmeri long eria bilong mi i painim hat long kisim mani. Bikos mipela nogat rot i joinim ples bilong mipela wantaim ol taun.

Olsem na mipela painim hat long salim ol gaden kaikai na kisim mani. Na tu bikos i nogat rot, tingting bilong mipela i no kirap long wokim bisnis. Nau yet em taim mipela baim kaikai long stua, liklik mani mipela lukim i pinis kwik. Bikos prais bilong ol samting i dia tru. Olsem na wantaim kamap bilong VAT takis, hones mipela bai kisim taim stret.

Mi amamas long Praim Minista Bill Skate i tokaut long putim dispela VAT takis long arere, we ol bai skelim gut pastaim. Plis noken bringim i kam insait long mani plen em gavman bai tokaut long mun Novemba bilong dispela ya.

**Kosie Gama
Ambunti, IS SEPIK**

Taim bilong yumi long senisim laip

DIA EDITA,

Mi gat liklik wari long tokim yupela ol pipel bilong Papua Niugini, na tu bilong dispela graun.

Nau em i taim bilong yumi long tanim bel na go klostu long God papa, na tu bikpela bilong yumi, Jisas Kraus. Bikos klostu bai las de nau. Olsem na mipela mas tingim dispela. I nogat wanpela man o meri bilong dispela graun inap long abrusim belhat bilong bikpela. Olsem na yu husat brata o susa i stap long pasin bilong olpela bel, yu mas tingting gut. Yu mas senisim pasin nogut bilong yu. Em tasol na tekyu long ritim dispela hap pas bilong mi.

**Ene Karap
CAF Sios, Lanekep WABEG**

Edwaki mas joinim Lumi ilektoret

DIA EDITA,

Mi wanpela Mangi Edwaki long Sandaun provins. Nau yet mi stap long Wewak, Is Sepik provins. Mi laik makim maus bilong ol pipel bilong eria bilong mi, na autim tingting na wari bilong mipela.

Mipela i no laik long stap insait long Telefomin ilektoret. Bikos mipela i no save kisim wanpela sevis i kam long Telefomin. Mipela save kisim sevis tasol long Lumi, we i stap klostu long mipla ken wokabaut.

Long olgeta ileksen taim, mi lukim ol ol kendidet na memba bilong Telefomin i no lukluk long mipela ol trangu pipel bilong Edwaki. Mipela i stap olsem ol longlong lain bilong ol. Na dispela i no gutpela long tingting na bel bilong mipela. Olsem na nau mi askim Gavana John Tekwie long skelim dispela askim, na brukim baundri mak we Edwaki i mas go insait long Lumi distrik.

**Ams Arron Philip
WEWAK**

Yumi yet mas painim God

DIA EDITA,

Mi wanpela pikinini Sepik. Mi stap nau long Westen Hailans long ples Gumus. Mi laik sapatim pas bilong brata Ben Elias. Pas bilong em i bin kamap long Wantok niuspepa bilong Julai 21, 1997.

Mipela laik skruim tok olsem mipela ol manmeri na pikinini long Westen Hailans, mipela noken pasim ai long dispela samting bilong graun. Na tok bilong God i wok long fulfil long dispela graun igo. Yumi olgeta mas go lotu na stap redi long kam bek bilong Jisas Kraus. Mi tok olsem bikos mi lukim olsem mipela tingting tumas long samting bilong dispela graun. Mipela mas senisim nau dispela kain tingting na pasin.

Olsem wanpela brata, mi autim dispela tingting long yupela ol arapela i ritim na skelim. Save na tingting i stap long yupela yet. Tasol long pinisim tok, mi laik God i laikim yumi tru. Olsem na em i salim wanpela pikinini tasol bilong em i kam dai long sin bilong yumi. Tenkyu long ritim dispela pas bilong mi.

**Roselyn Hombo
MT HAGEN**

Sapot long rausim lidasip traibunel

Dia Edita,

Mi laik sapotim tru dispela pas em Giangan Sopa bilong Vanimo i raitim. Pas bilong em i kamap long Wantok niuspepa bilong Septemba 18, 1997. Giangan i rait olsem ol politisian o lida i mas i mas go long han bilong plis long sasim ol, sapos ol i mekim paul pasin wok bilong publik moni.

Ating dispela kain tingting mi tu mi bin gat long sampela taim i go pinis. Mi laik putim long niuspepa. Tasol sampela guppela man i gat guppela ting-

ing i bin rait pas long niuspepa, na putim kamap. Olsem na nau mi sapotim.

Yes mi lukim tru olsem lidasip tribunel i nogat wanpela guppela as, na sanap bilong em long mekim ol wok bilong em insait long kantri. I gat tripela bikpela wok bilong lidasip traibunel em mi glasim olsem:

1. Em i kaikai nating bikpela moni bilong gavman na dispela i no stret olgeta;

2. Lidasip tribunel i sanap olsem wanpela dua bilong ol

kain lain olsem i mekim paul pasin i ken isi tru long ranawe we nogat lo bilong kriminel ekt i ken holim pasim ol; na

3. Ol lida o politisian baia-mamas tru long painim publik moni bikos ol i save gut tru olsem sapos i gat save long dispela stil pasin bilong ol, ol bai inap tru long yusim lidasip tribunel.

Ating i moa guppela long gavman bilong Praim Minista Bill Skate long sindaun na toktok wantaim kabinet bilong

em. Na putim wanpela askim i go long Haus Palamen long rausim traibunel olgeta. Na larim ol kain wok olsem i kam daun long ol plis fos long mekim bai i orait.

Bilong wanem bai wanpela liklik man i go kalabus long pikpoket long emti walet na politisian i paulim handred o tausen kina na i no i go long kalabus.

**Philip Amatus Pais
VANIMO**

Kolim stret man i save mekim blak maket

Dia Edita,

Mi wanpela meri Morobe tasol nau mi stap long Mosbi. Mi laik bekim pas bilong brata Kundip Hingi husat i bin rait long 25 Ogas, 1997 na tok olsem ol Morobe tasol i save wokim blak maket.

Yes brata, mi meri wopa na mi laik tok pasin yu mekim bilong kolim nem Morobe em i no guppela. Nem Morobe em i bikpela nem tumas. Mipela sampela i no save mekim oi blak maket. I moabeta yu kolim nem bilong ol ples bilong ol manmeri i save wokim blak maket na noken kolim nem Morobe bikos yu bai givim sem na daunim nating nem bilong ol sampela lain Morobe i no save mekim kain pasin bilong blak maket. Plis yusim het na skelim toktok bipo yu rait. Noken tromoi toktok tasol we i ken bagarapim nem bilong sampela ol Morobe. Em tasol na yu husat brata o susa i laik sapotim o agensim orait rait tasol i go long Wantok na bai yumi skelim toktok.

**Julie P. Jimmy
Wopa Kantri**

Wokim rot long Kaupena i go long Pangia

Dia Edita,

Mi wanpela mangi Pangia long Sauten Hailans provins, tasol nau mi stap long Kimbe na mi laik sapotim pas bilong Philip Warea i bin kamap long 12/9/97. Pas bilong em i tok olsem wokim rot long Kaupena i go long Pangia. Tok bilong Philip i tru. Nau long dispela taim mipela ol pipel bilong Pangia i laikim tru dispela rot i mas kamap. Mipela i no laik yusim olpela haiwei, bikos mipela i no laik long bunging ol kain hevi bilong ol birua bilong mipela. Yu husat man o meri i laik sapotim mi, plis rait i kam tasol long wantok na mi lukim.

**Chris K. Talua
KIMBE**

Wokim publik toilet long Hagen siti



Dia Edita,

Mi wanpela mangi Hagen na mi laik autim wari bilong mi i go long Hagen taun autoriti o Kaunsol. Wari bilong mi i go olsem planti ol manmeri na pikinini i save raun long taun na taim ol i laik pekpek na pispis, ol i panim hat long go pekpek o pispis, bikos nogat publik toilet i stap klostu long siti. Olsem na ol manmeri na pikinini i save go nambaut arere long siti. Planti taim

ol stilman i save bihainim ol i go na ol i save pretim ol long naip na kisim moni na samting bilong ol. Mi laikim ol taun kaunsel i mas wokim sampela publik toilet insait long siti. Em tasol wari bilong mi. Yu husat brata o susa i laik helpim mi orait helpim mi na skurim hevi o wari bilong mi go moa.

**Raldang Ku Kange
R. Waglipl.**

Leba Dipatmen, senisim lo bilong Kampani bilong baim gut ol wokmanmeri

Dia Edita,

Mi no wanpela wokman bilong Palm Lodge Hotel tasol, mi laik mekim komplek i go long nem bilong ol wokmanmeri Palm Lodge Hotel na ol arapela kampani bai ol i ken hapim pe bilong ol wokman. Ol wokman bilong Palm Lodge Hotel i komplek olsem ol save kisim K60-70 long ol fotnait pe bilong ol. Na tu ol save tok ol save wok hat tasol pe bilong ol em liklik tumas. Na tu taim

ol wokmanmeri laik i go komplek, ol bos i save tok ol i bihainim maus bilong ol leba dipatman na baim ol long dispela mak.

Olsem na mi laik leba dipatmen mas lukluk long dispela hevi na stretim. Em tasol yu husat laik bekim rait long wantok tasol.

**Yomo Wagoma
Kimbe.**

Ol politisen i mas sanap strong long wanem toktok ol i mekim

Dia Edita,

Mi wanpela mangi husat i save wari tru long ol pasin ol politisen i mekim.

Mi save lukim long taim bilong ileksen ol politisen i save mekim kainkain promis na polisi bilong ol antap long piksa bilong ol, na mipela ol grasrut pipel i ting ol i tok tru. Olsem na mipela i save votim ol tasol taim ol i go insait long palamen na

lukim na holim na tasim skin bilong mani ol i no save tingim wanem promis ol i bin mekim. Na i no save kisim sevis na developmen i go long ples.

Dispela em i wanem kain pasin bilong yupela ol politisen? Sapos yu wanpela politisen i lukim dispela. Yu mas sem nogut na noken mekim promis nating nating. Sapos yu laik mekim wok, tingting tasol i stap

na mekim wok stret. Noken mekim kainkain maus wara promis nabaut na bagarapim tingting bilong ol manmeri long ples. Sapos yu wanpela man o meri lukim dispela na i laik sapot, rait i go, long Wantok na bai mi amamas tasol long lukim pas bilong yu. Tenkyu.

**Lakigu Sanire
Rongo Komyuniti Skul**

Wokim publik toilet long Hagen taun

Dia Edita

Mi wanpela studen bilong Togoba long Bans, Westen Hailans provins. Mi laik sapotim pas bilong Frank Tony Kusingin bilong Jiwha. Pas bilong em i bin long dispela niuspepa bilong Septemba 4, 1997. Em i askim Mt Hagen Taun Kaunsil long wokim wanpela publik toilet.

Mi yet laik tok olsem wanpela taim mi bin kam raun ong Hagen taun na pilim pispis. Man pispis i kilim mi stret. Na mi painimaut hat stret long go long toilet bikos nogat publik toilet. Olsem na mi rausim pipia bilong mi long Pop's Oval.

Ol wokman bilong taun kaunsil i kam holim mi, na sasim mi K120. Dispela taim mi nogat kain mani long givim ol. Papamama givim mi K50 tasol long baim sop. Mekim nogat na mi givim K50 i go long ol.

Mi no save sapos kaunsil i giaman long kisim mani na pasim publik toilet o olsem wanem?

Olsem na mi laik tok olsem plis wokim hariap publik toilet. Na maski giaman long sasim ol manmeri na kisim mani nating.

**Patrick Num Kimil
Banz
WESTEN HAILANS**

Divelopim tu ol ruel eria bilong Morobe

Dia Edita

Mi wanpela mangi bilong Morobe tasol nau mi i stap long Kimbe, Wes Nu Briten provins. Mi baim Wantok niuspepa bilong Septemba 18, na ritim wanpela pas bilong Michael Wasoka.

Brata Michael i tok ol memba bilong Morobe i no tingim ol bus eria liklik. Ol i tingim tasol ol taun eria, na mipela ol bus pipel i stap wantaim nogat senis olsem rot.

Mi sapotim stret olgeta toktok bilong Michael. Mi laik tok olsem ol memba em mipela ol pipel i votim ol. Sapos mipela nogat, ol bai nogat pawa ya. Na tu bai i no inap stap amamas olsem nau.

Insait long Kabwum distrik, nogat tru wanpela liklik sevis i kamap. Memba husat i bosim Kabwum i mas ritim dispela pas na save. Ol memba bilong nau na bipo i lus tingting olgeta long mipela ol Kabwum pipel.

Ol ples olsem Komba Selepet na Timbe namba 1 na 2, Jalumet na het wara Timbe i nogat wanpela senis liklik. Mipela i stap yet olsem ol bus kanaka bilong tumbuna taim.

Plis traim na raun i go long ol dispela ples na lukim askim o laik bilong ol pipel.

**Livai Ilong
KIMBE**

Ol man, noken bagarapim ol meri

Dia Edita,

Mi laik autim wari bilong mi i go long olgeta man. Wari bilong mi em i olsem. Mi save lukim o harim olsem planti ol man na ol boi i save tok nogut long ol meri. Dispela pasin em i no guppela. Yupela ol pikinini mani mas luksave olsem ol meri i stap na yupela i kamap. Yupela mas skelim dispela, yupela i kam long wanem hap? Yupela kamap long hul bilong ston o wanem? Tingting gut na toktok. Sapos ol meri i no i stap yumi i no inap i stap olsem nau yumi i stap.

Olsem na mi laik askim yupela husat ol man i save tok nogut na bagarapim ol meri long stop long mekim dispela kain pasin. Toktok gut long olgeta meri. Sapos yupela askim wanpela yangpela meri long slip wantaim em na em tok nogat lusim em na go long narapela em i no wanpela i stap. Nogut yu mekim trable long em. Em tasol na sapos yu husat i laik sapotim mi rait i go long Wantok na bai mi ken ritim.

**Tom Kewa
Gouno**

Sapos yu laik long pas bilong yu, salim long dispela adres:

Edita, Wantok niupepa

P. O. Box 1982,

Boroko, NCD.



**PAPUA NEW GUINEA
FOREST INDUSTRIES ASSOCIATION (INC)**

P.O. Box 4037, Boroko. Phone: 325 9458 Fax: 325 9563

TRUPELA STORI BILONG SALIM DIWAI LONG OVASIS MAKET

- Ekspot maket bilong diwai i pundaun bikpela tru long ol mun i go pinis.
- Log ekspot o salim diwai em namba tri long oil na gol we PNG i save salim.
- Salim diwai i bringim moa long K450 million olgeta yia long kantri na givim aut moa long K150 million long baim takis we gavman i save kisim.
- Ekspot maket prais bilong ol diwai i kam bek nau long level we i no bin olsem long stat bilong 1993.
- Long las foapela yia taim ekspot takis, ol royolti na operesen kos i bin go antap tru, PNG i bin bungim hevi olsem strong bilong moni i pundaun long 39% (inflesen).
- Taim hevi bilong inflesen i kamap, trupela hevi i sanap olsem:-

EKSPOT PRAIS	DAUN	14%
EKSPORT TAKIS	GO ANTAP	100%
ROYOLTIS	GO ANTAP	20%
PRODUSA RITEN	DAUN	35%

Ol lain bilong mekim wok (produsa) i save stap bek long karim olgeta hevi bilong prais i go antap, takis i go antap na prais i pundaun.

	Feb. 1993	Jun 1997	Jun 1997
	bihain Long inflesen		
Ekspot Prais	US\$124/M3	US\$124/M3	US\$124/M3
	KM3	KM3	KM3
Ekspot Prais	122	171	105
Ekspot takis	17	55	34
Royoltis	5	10	6
Produsas Riten	100	106	65

Produsa riten em pastaim long papagraun primium, levis na arapela bikpela kos.

- Ol saveman i skelim olsem ekspot prais bai i stap olsem US\$100/M3 long pinis bilong yia. Taim maket i go het yet long pundaun, moa operesen bai daunim prodaksen o pasim sampela wok.
- Dispela bai daunim ol wok, o wok bai sot long ol ples, bai planti woka bai nogat potnait pe bilong ol famili na bai timba industri i pas we i save givim sevis long planti hap ples.
- Industri nau i lukluk i go long gavman long daunim takis bilong ekspot long daunim sampela bikpela hevi kantri bai bungim sapos ol timba bisnis i pasim wok.
- Bisnis disisen em ol komesel disisen we i sut long mekim profit. Sapos nogat profit, bai i nogat invesmen, nogat wokmani na nogat sevis.
- Wok bilong ol komesel bisnis em bilong mekim riten long kapitol invesmen na kos bilong operesen. Long praivet sekta entaprais, wok bilong ol i mas was long karamapim kos na mekim profit sapos em i laik stap laik yet na wok yet.
- Fores Industri, insait long sait bilong katim diwai i save baim takis. Ol i save baim takis long tenova - long bikpela prais tumas - we dispela takis i no luksave long maket prais na kos bilong operesen.
- Industri i stap hia bilong longpela taim. Strongpela invesmen i bin kamap long bihain long toktok na kondisen bipo tasol i no strong tumas nau bikos long ol kain kain polisi senis na ol askim bilong ol ausait lain i kam bagarapim sindaun bilong industri.

**NAU EM TAIM BILONG INDUSTRI LONG
KISIM GUTPELA SANS**



CAMBRIDGE *Rugbi Lig Nius*

Vudal Cowboys bai kirapim das long Cambridge kap gren fainol



• Lukaut long kain pilai bilong Goroka Tarangau long neks wiken taim ol i bungim Cowboys long gren fainol.

WATSON GABANA i raitim

Namba wan taim yumi laik mekim wanpela samting, yumi save tingting planti nogut bai yumi bungim planti hevi. Tasol sapos yumi skelim gut dispela pasin, bai yumi lukim olsem kain samting save kamap bikos yumi nogat bilip long yumi yet.

Wanpela liklik lain sumatin, husat i no surik long statim wanpela klap em ol sumatin long Vudal Yunivesiti long Rabaul.

"Ol sumatin bilong Vudal i bin lukim olsem ol i gat planti gutpela ragbi pilaia i stap. Tasol i nogat inap tim long ol i ken pilai long en. Olsem na ol i bin statim dispela klap long stat bilong dispela sisen. Kirap nogut, ol manki i stap nau long gren fainol bilong

tasol em i go long skul, burgim olgeta manki husat i bin hangre long pilai ragbi na tokim ol long bungim moni. Wantu tasol, ol kamap wantaim nem Vudal Cowboys na rejista i go insait long Rabaul lig na PNGRFL.

Ol sumatin i bin hat wok tru long painim moni long baim afillasen na registresen fi bilong klap na pilaia. Tasol studens kaunsel (SRC) i bin harim kraibilong ol na sapatim ol gut tru. Tupela pilaia bilong Tarangau tu joinim ol boi na olpela pilaia bilong Rabaul Guria, James Gume kam na givim sapo tu long ol yangpela blut.

Kirap nogut, Vudal Cowboys aninit long lukaut bilong Kosa Jeff Waide i kamap maina primia bilong Rabaul lig. Dispela i givim ol tok orait long pilai insait long Cambridge kap resis. Kirap nogut, ol pilai strong i go insait nau long gren fainol pilai-ov.

"Mipela lukim olsem, Goroka Tarangau i no wanpela isipela tim bai mipela pilaim neks wik," kosa Waide tok. "Ol i winim olgeta pilai bilong ol wantaim bikpela skoa lain. Olsem na mipela i no inap pilai kaskas wantaim ol."

Tasol Jeff askim long olgeta sumatin bilong kaikain skul insait long Mosbi long kam na givim sapot bilong ol long Cowboys long taim bilong pilai.

"Mi askim olgeta sumatin long UPNG, Sogeri Nesenel hai skul, POM Tek, Bomana semineri na arapela skul long Mosbi long kam na givim ful sapot bilong ol long taim bilong gren fainol," Waide tok. "Mipela nidim sapot bilong ol sumatin, bikos olgeta pilaia em ol sumatin bilong Vudal yunivesiti koles."

Gren fainol pilai bai stap long Lyold Robson ovel Mosbi. Tupela tim wantaim bai flai i kam long Mosbi long Fraide 24 na redim ol yet long dispela bikpela de bilong ol.

PNGRFL luk-daun long komplek pas bilong POM Tarangau

Gren fainol pilai bilong Cambridge kap resis bai stap namel long Vudal Cowboys bilong Rabaul na Goroka Tarangau long Sande Oktoba 26 long Lyold Robson ovel Mosbi.

PNGRFL kamap wantaim dispela disisen bihain long ol glasim ripot bilong refere husat i bin lukautim pilai namel long Mosbi Tarangau na Vudal Cowboys las wiken long Kokopo.

Bihain long dispela gem, presiden bilong Tarangau i bin raitim wanpela apeal leta i go long PNGRFL na tok olsem refere i bin stapim pilai hariap. Tasol

taim PNGRFL skelim ripot bilong refere, ol lukim olsem Presiden bilong Tarangau klap i bin ran i go insait long pilai graun na paitim refere. Olsem na ol givim win i go long Vudal.

Cambridge kap komiti i sindaun tu na glasim apil leta bilong Tarangau na tok olsem: "Aninit long lo bilong PNGRFL resis 14 (a), we i tok olsem sapos ol sapota i kirapim pait na stapim pilai, bai tupela tim wantaim i no inap pilai gen."

Ol bikman bilong PNGRFL i tok tu olsem refere em wanpela tasol jias bilong pilai. Sapos em kamap

wantaim wanem kain disisen, nogat wanpela man inap rausim.

Olsem na long dispela pilai namel long Tarangau na Vudal, ol eksekutyutiv bilong PNGRFL i givim gem i go long Vudal.

Long dispela taim, Vudal i bin go pas wantaim 14-12 skoa lain. Olsem na ol bai pilaim Goroka Tarangau long Mosbi neks wik Sande.

Tupela tim wantaim i wok long mekim olgeta samting long strong na save bilong ol long dispela bikpela gem long histri bilong ragbi lig. Wina bilong dispela pilai bai winim K10,000.

Vudal mas was gut - sapos nogat bai Tarangau nekim ol

SAPE METTA i raitim

Sapos yu tingting long winim wanpela tim long Cambridge kap resis. Yu mas pasim tok long winim Goroka Tarangau. Dispela em hap tok bilong kosa bilong Vudal Cowboys, Jeff Waide, taim *Wantok* i toktok wantaim em dispela wik.

Dispela hap tok bilong Jeff i no gijaman. Long stat bilong Cambridge kap resis i kam inap nau, Goroka Tarangau i bin winim ol birua bilong ol wantaim bikpela skoa lain tru.

Kain pilai bilong ol boi kol ples Goroka i kamapim bikpela hetpen long ol timhusat em ol bin pilaim.

Long laspela pilai bilong ol egen-sim Hagen Panthers, yanpela blut bilong Tarangau soim olsem ol min bisnis. Ol i bin bagarapim tru sindaun bilong ol Kange 52-16. Tasol bihain long dispela, ol i bin kilim i dai tewel bilong Wewak Tigers wantaim 72-18 skoa lain. Dispela kain skoa i soim olsem Tarangau i no laik pilai kaskas. Ol gat bikpela tingting long winim gren fainel na hangamapim Cambridge kap taitel antap long bros

bilong ol. Na tu ol laik kisim K10,000 prais moni.

Long neks wiken, ol Apaso bilong Goroka bai bungim pes wantaim wanpela nupela klap long ragbi lig resis. Ol dispela yangpela manki bilong Vudal i nogat wanpela samting long lusim tu.

Tasol kosa bilong ol, i bin tok olsem olgeta manki i redi tasol long mekim wanem samting ol lainim long trening. Olsem na gren fainel long Mosbi neks wik bai i no pilai pilai.

Long sait bilong Goroka, ol i gat kain ekspirians pilaia olsem Fatty Buka, Malum Oiyufa, David Nul. Ol bai go pas long sampela yangpela blut olsem Wesley Kevin, Omae Nufa na Ismael Nombe.

Ol manki Vudal long narapela sait i gat wanpela ekspirians pilaia bilong ol tasol. Em olpela Guria pilaia James Gume. Olgeta manki em fes taim bilong ol long pilai ragbi. Tasol kain pilai bilong kepten John Kui na arapela olsem faiv-eit Yasutuo na hav-beks Tau bai bringim ol manki bilong ol kamap wantaim wanpela strongpela gem neks wik.



Nem: Jonah Simeon Heni.

Krismas: 19.

Hevi: 76 kilo.

Longpela: 182 cm.

Asples: Unggai.

Provins: Isten Hailans.

Marit o Yangpela? Yangpela.

Yu wok olsem wanem? Stap nat-ning long ples.

Wanem taim yu stat pilai ragbi? 1995.

Wantaim wanem klap? Goroka Tarangau.

Na nau yu pilai wantaim husat? Goroka Tarangau.

Yu pilai long wanem divisen na posisen? Long A-gret olsem senta. Narapela spot yu save pilai? Basketbal, voliibal na swimming.

Feveret PNG pilai bilong yu: Ivan Mosoka.

Feveret kosa: Martin Nano.

STORI BILONG PILAIA

Feveret referi: Willie Tovebae.

Feveret kaikai: K0.05 skon.

Feveret dring: Coke.

Yu save mekim wanem taim yu no pilai? Sindaun lukim TV na muvi.

Feveret muvi: Olgeta katun piksa.

Feveret TV so: Walker Texas Ranger.

Feveret Ekta: Bruce Lee.

Wanem samting yu save laikim: Winim ol pilai.

Wanem samting yu no save laikim: Taim mipela lus.

Wanem driman bilong yu long bihain taim: Long makim Goroka na stap insait long PNG Kumuls.

Tenpela krismas long nau, yu ting long mekim wanem? Bai mi pilai ragbi lig yet na bai mi kosim na trenim ol liklik manki.



CAMBRIDGE

GOVERNMENT WARNING: SMOKING IS DANGEROUS TO HEALTH.





CAMBRIDGE *Rugbi Lig Nius*

Mariners - narapela tim bilong Newcastle i go insait long gren fainol

Tripela wik i go pinis, wanpela tim bilong Newcastle i bin winim gren fainol bilong ARL. Amamas na pati i go het yet na nau, Mariners, narapela tim bilong Newcastle bai traim strong bilong ol long Supa lig klap salens gren fainol egensim Brisbane Broncos long Nu Silan.

Kosa bilong Hunter Mariners, Graham Murray tok disisen bilong Brisbane Broncos long yusim Alan Langer, husat i bin kisim bagarap na stap nating longpela taim i no inap mekim wanpela samting long tim bilong em.

Murray mekim dispela tok bihain long em harim olsem kosa bilong Broncos, Wayne Bennett i bin tok olsem Langer bai pilai tumoro long gren fainol bilong Wol klap salens. Murray i harim olsem Langer i bin kisim bagarap long lek bilong em taim em i bin pilai wantaim St Helen long Iglan tripela wik i go pinis. Tasol Bennett laik yusim em long dispela pilai bai em i ken mekim i go insait long Ostrelia skwat.

"Dispela i no gutpela pasin long Wayne i yusim wanpela

pilaia husat i gat hevi long bodi bilong em," Murray tok. "Moa gut sapos Langer i ken malolo na stap tasol inap neks yia em i ken pilai."

Tasol Bennett tok olsem taim Langer i pilai insait long tim tumoro Fraide, em bai mekim olgeta trik bilong em na Broncos bai nekim Mariners. "I nogat wanpela bikpela samting i rong long Langer," Bennett tok. "Langer i gat liklik bagarap tasol long tais bilong em na em i ken pilai 80 minits wantaim dispela," em tok.

Bihain long dispela gren fainol, ol bai kamap wantaim tim bilong i go pilai insait long Inglen long neks mun.

Supa lig tim bilong raun pilai long Briten bai bung long Ostrelia bihain long gren fainol bilong WCC na pilai trening i go inap ol lusim Ostrelia. Kosa bilong Cronulla Sharks, John Lang bai i go pas long lukautim Supa lig tim bilong Ostrelia.

Bihain tasol long semi fainol namel long Sharks na Mariners las wik Sande, Lang i bin bungim Murray na tokim em olsem yang-

pela pilaia bilong Mariners; Kimmorley bai i gat sans long stap insait long Ostrelia tim. Long dispela taim, Kimmorley i bin putim tupela trai na setim Nik Zisti long putim laspela trai bilong Mariners long 76 minit bilong pilai. Mariners i bin nekim Sharks 22-16.

Lang i bin lukim pilai bilong ol yangpela pilaia bilong Mariners na tok olsem ol i gat bikpela sans long winim Broncos insait long gren fainol dispela Fraide.

"Mariners i gat bikpela sans tru long win," Lang tokim Murray. "Kain tim spirit na sapot i kam long ol manmeri bilong Newcastle i soim olsem yupela i gat bikpela sans tru long rausim trausis bilong Broncos," em tok.

Wina bilong dispela gen fainol bai kisim A\$1 milion. Wanwan pilaia bai tilim hap bilong dispela moni na hap bai i go long klap.

Tasol sapos Mariners winim gren fainol, olgeta moni bai i go long ol pilaia. Bikos nau aninit long nupela tok tok bilong kamapim wanpela resis, Mariners i no inap stap neks yia.



□ Hapbek bilong Mariners, Noel Goldthorpe.

Klostu bai ARL na Supa Lig long Ostrelia kamapim wanpela

Ol pesman bilong ARL na Supa lig sindaun klostu sevenpela aua long Mandé dispela wik long kamapim wanpela tim tasol neks yia. Toktok bilong bung wantaim i wok long kamap bikpela na klostu bai tupela grup wantaim wanbel long kamapim wanpela resis neks yia.

Eksekutiv darekta bilong ARL, Neil Witaker i bin tokim ol niusman long Sidney olsem ol mausman bilong ARL na Supa lig i wok long sindaun longpela taim nau long traim na stretim tok tok na kamapim wanpela resis.

"Olgeta samting i wok long ran gut nau. I no long aim bai mipela tok save long yupela wanem disisen mipela kamap wantaim," Witaker tok.

Taim tupela ogenaisesen bung wantaim long ranim

wanpela resis, sampela tim bilong Supa lig na ARL bai kam bung wantaim na kamapim wanpela klap. Kain olsem ol Hunter Mariners bai bung wantaim Newcastle Knights na Gold Coast Chargers wantaim Queensland Cowboys kamapim wanpela tim tasol.

Long neks yia tu, Melbourne bai kamapim wanpela tim long tek pat insait long dispela nupela resis.

News Limited, husat i bin namba wan sponsa bilong Supa lig tim long dispela yia i gat moa long A\$3 milion dinau long pinis. Tasol ol tok olsem dispela i no inap kamapim sampela hevi long ol pilaia na tim bilong neks yia.

Menesing darekta bilong News Limited, Ruben Murdoch i bin tok olsem

taim dispela nupela sistem i kamap, ol bai kamap wantaim nupela eksekutiv na menesmen long ranim olgeta afea bilong pilai. TV kampani bilong em, Sanel 9 bai i no moa kisim olgeta raits olsem long dispela yia.

Whitaker i tok: "Mipela laik kamapim wanpela resis tasol long developim ragbi insait long Ostrelia. Mipela i no laik mekim tok kros na bruk nabaut na bagarapim dispela spot long Ostrelia."

Murdoch i bin mekim wankain tok tok.

Em tok olsem long dispela sisen i kam, i bin i gat planti kain kain hevi long ol pilaia na sampela gutpela pilaia i no pilai.

"Olsem na long dispela rot bilong bungim olgeta tim wantaim em moa gutpela," Murdoch tok.

Goodwig painim ol pilaia long stap insait long Inglen skwat

Frant rowa bilong Westen Suburbs Magpies, Harvey Howard i no klia wanem tim bai em joinim taim em pinis long Ostrelia. Howard, husat i bin pilai wantaim Leeds, wanpela tim bilong Supa Lig long Inglen na bihain lusim ol na joinim Magpies i no save yet bai em pilai wantaim wanem tim.

Kosa bilong Inglen Supa lig tim, Andy Goodwig i bin nemim Howard insait long tim bilong em long pilaim Ostrelia supa lig tim neks mun. Tasol ol ofisel bilong Magpies i no laik bai Howard joinim ol. Olsem na Howard i no save tumas bai em pilai insait long Inglen tim o nogat.

Ripot bilong Howard long dispela yia soim olsem, em i bin pilai

faivpela gem wantaim Leeds. Tasol em i bin lusim ol na kam joinim Westen Suburbs long Ostrelia. Westen Suburbs em wanpela tim insait long ARL resis. Olsem na ol eksekutiv bilong Magpies i no laik larim Howard i go bek long Inglen na joinim Supa lig tim. Ol tok klap westim planti moni long Howard olsem na ol i no laik lusim em kam joinim nesenel tim bilong em.

Nau yet, Howard i stap long Ostrelia na i no save bai em mekim wanem samting. Tasol Goodwig i putim em i go insait pinis long 22-men skwat bilong em, husat bai pilaim Ostrelia long neks mun.

Tupela arapela man, husat i stap long wankain mak em Jason Robinson

na Gally Connolly. Tupela tu i sainim nem pinis long pilai insait long ol ARL klap long Ostrelia neks yia. Olsem na ol klap husat baim ol tok ol i no inap larim ol i go bek long Inglen na pilai insait long Supa lig tim.

Dispela i kamapim bikpela hevi long kosa Goodwig. Na em i traim yet long kamap wantaim wanpela strongpela tim husat i ken winim Ostrelia.

Nau yet long Ostrelia, bai ol selekta kamap wantaim tim bilong oi bihain long gren fainol pilai namel long Brisbane Broncos na Hunter Mariners tumoro. Tasol sampela biknem pilaia olsem Ricky Stuart, Steve Walters, Gorden Tallis, Darren Lokyer na Allan Langer i opim ai bilong sekekta pinis.



CAMBRIDGE

GOVERNMENT WARNING: SMOKING IS DANGEROUS TO HEALTH



DROUGHT and FROST

HITS PAPUA NEW GUINEA

HOW TO COPE

A drought covers almost all of PNG and frost in parts of the highlands. Your government and many organisations are aware of your problem and are trying to help in the best way they can. IT IS NOT EASY. There are too many people affected. Because of the size of the problem, help may not come quickly to your area. Help is not going to mean bags of rice or food stuff for everybody.



PLEASE UNDERSTAND AND DO THE FOLLOWING:

1. Help each other at all times.
2. Adults help children and old people first.
3. Tell government or church people of your problems.
4. Use food, water and money very carefully.
5. Village committees must set rules about use of water, fire lighting and food gathering. Everyone must follow these rules.
6. Remember that burning bushes will not bring rain. It will only make our problems worse.
7. Boil all drinking water.
8. In cold places keep yourself warm.
9. Do not wipe pots and plates with dirty cloth or hands.
10. Do not eat strange vegetables, roots, leaves or animals.



STICK TOGETHER AND HELP EACH OTHER AT ALL TIMES

NAMBAWAN TOKSAVE BILONG PLES DRAI NA AIS

Planti hap bilong PNG i drai nau, na long Hailans em ais i pundaun. Gavman na planti praivet bisnis kampani i save long hevi yupela bungim nau, na traim long helpim. EM I NO ISI HEVI. Planti pipel painim taim nau. Plis luksave olsem helpim i no min olsem planti beg rais na kaikai long olgeta pipel.

PLIS LUKSAVE NA MEKIM OL DISPELA SAMTING:

1. Helpim ol arapela.
2. Ol bikman meri mas helpim pikinini na lapun lain pastaim.
3. Tokim Gavman na Sios pipel long hevi.
4. Yusim gut kaikai, wara na moni.
5. Viles Komiti mas mekim lo long yusim gut wara, tambu long mekim paia, na pasin bilong lukautim na tilim kaikai. Olgeta mas harim tok bilong Viles Komiti.
6. Noken bilip olsem bus paia bai bringim ren. Em bai bringim moa hevi.
7. Boilim olgeta wara na dringim.
8. Long ol kol ples, lukaut bodi long stap hot.
9. Noken klinim sospen na plet wantaim doti laplap o han.
10. Noken kaikai ol gaden kaikai, wantaim rop, pikinini na lip bilong diwai em yu no save kaikai.



STAP WANTAIM NA HELPIM WANPELA NA NARAPELA

TANO KAKORO BONA KERU BADANA HADIBAIA HEREVANA

Tano kakoro bona keru badana be iseda tanobada (PNG) gabu momo ia hadikaia vadaeni. Gavmani bona hegunalai area momo be idia diba oi emu lalo metau eiava lalo hekwarahi.

Laloa idia karaia noho durua henia ena kahanai. INAI BE GAUKARA MARAKINA LASI.

Taunimanima momo be inai dikadika ese ia abidia vadaeni. Gabu momo be durua do idia davaria haraga lasi, badana inai be metau badana ta. Raisi baege bona aniani be sisina do ia auka taunimanima ibounai henia durua ena kahana dekenai.



LALOA NAMONAMO BONA INAI GAUDIA OI KARAI:

1. Durua karaia eheni hora ibounai
2. Burukadia bona marakidia durua guna.
3. Gavmani bona Dubu taudia emu metau oi a hadibaia.
4. Aniani, ranu bona moni oi gaukara laia namonamo.
5. Hanua gunalaia taudia be bema namo taravatu haida idia atoa ranu, lahi bona aniani gaukara laia ena kahanai. Taunimanima be bema namo inai taravatu idia badinaia.
6. Kurukuru gabua be medu do ia abia mai lasi. Inai be metau do ia habadaia.
7. Ranu hasiahua guna gabeai oi inua.
8. Tauanimu asiahua paraka lalonai.
9. Nanadu gaudia be dabua mirona o imamu dekenai daua lasi.
10. Aniani gauna idauna ta oi ania kava lasi.

GABU TAMONA DEKENAI HABOUA BONA DURUA KARAI

**The drought may prolong for a long time. Plan for your future carefully.
Dispela longpela taim bilong san i ken go het yet. Olsem na yu mas makim gut bihain taim bilong yu.
Inai tano kakoro be sisina do ia daudau. Emu vaira mauri hari oi a heroa namonamo.**



• Paratona tim poto husat bai pilai long gren fainel wantaim ol Defence.



1997 CAMBRIDGE CUP COMPETITION SEMI FINAL RESULTS

Goroka Tarangau 52 def Mt Hagen Panthers 16
ENB Cowboys 14 def Port Moresby Tarangau 12

FINAL DRAW OCTOBER 26
ENB Cowboys vs Goroka Tarangau (POM)



National Heart Foundation of Papua New Guinea Inc.



Yu save olsem hevi long bodi o bodi i tait (stress) i ken givim hevi long ron bilong blut long bodi na inap givim hevi long lewa bilong yu ??

Dokta i bin sekim ron long blut bilong yu pinis o nogat, na yu harim tok stia bilong em o nogat. Sapos blut bilong yu i ron strong tumas, dokta inap askim yu long kisim gutpela helpim long hausik. Em inap askim yu long no ken kaikai tumas sol na no ken dring tumas bia na traim lusim sampela fat long bodi bliong yu.

Traim na noken bungim hevi long bodi (stress) - Lainim long kisim inap malolo !!

LUKAUTIM GUT LEWA BILONG YU

NATIONAL HEART FOUNDATION OF PAPUA NEW GUINEA INC.
P.O. Box 158, Mount Hagen, W.H.P. Phone: 542 2199 Fax: 542 2384

P/MORESBY SOCCER ASSOCIATION PORT MORESBY GRAND FINAL 1997

Saturday 18/10/97

Bisini 2

8.30 PR1 FBH Defence vs Keweh
10.30 W2 Naniu vs Bomana B/Kumuls
12.00 Media vs Masters
1.00 D2 Cyclone vs Togelu
3.00 D1 PS Rutz vs Adau

Sunday 19/10/97

Bisini 2

8.00 PR2 Guria vs K/Andra
9.45 U/19 Uni vs K/Andra
11.00 W1 Telikom vs TST Stars
1.00 Gordon U/13 vs Pomi U/14
2.00 Entertainment
2.30 Arrival of FBH Defence team by helicopters
3.00 Team line up front of official dice
3.30 Rapatona vs FBH Defence
5.43 Presentation

LAHI SOCCER ASSOCIATION WEEK 29 MINOR AND MAJOR SEMI FINALS

Siks

Saturday 18/10/97

8.00 W2 Simambu vs NorthWest G1
9.30 W1 Rapatona vs Unitech G2
11.00 W1 Waliya vs Guria G3
12.30 D1 Lae Biscuit vs Gee Otton G4
14.00 P1 Unitech vs Telekom G5
16.00 P1 Sobou vs Guria G6

Sunday 19/10/97

8.00 U19-1 Looser (G8) vs Winner (G9) G15
9.30 W1 Looser (G3) vs Winner (G2) G 16
11.00 P2 Looser (G11) vs Winner (G10) G17
12.30 D2 Looser (G12) vs Winner (G13) G18
14.00 D1 Looser (G4) vs Winner (G14) G19
16.00 P1 Looser (G6) vs Winner (G5) G20

Uni Grd 1

Saturday 18/10/97

11.00 U/19-2 Eastern Star vs Lae Biscuit G7
12.30 U19-1 Elcom vs Sobou G8
14.00 U19-1 Morobe United vs Rapatona G9
15.30 P2 Asiawe vs Sobou G10
16.00 P2 Unitech vs Rapatona G11

Saturday 18/10/97

11.00 D2 Bugandi vs Dal Labu G12
12.45 D2 Kuac vs Eastern Star G13
14.30 D1 NorthWest vs Sunstriders G14

LAE SOKA GREN FAINOL DRAW

Sunday October 19, 1997

9.00 U/16 Mopi vs Miti
10.15 U/19 Mare vs Nadzab
12.00 Women Shorub K vs Jara
2.00 Lig riser Blue Kumuls vs Wests
4.00 Lig divisen Mopi vs Poro

TOK SORI

Ol wokmanmeri bilong WANTOK Niuspepa i laik autim bikpela tok sori na wari bilong em i go long dai bilong



DON SIGAMATA.

WANTOK i save long Don olsem seketeri bilong PNG Futbol Asosiesen (PNGFA). Em i wanpela spot edministreta husat i laik lukim soka i mas kama strong na gutpela long PNG.

WANTOK i laik serim dispela sori na wari wantaim famili na ol lain famili memba, ol pren na ol soka pren bilong leit DON SIGAMATA.

Sol bilong em i ken kisim gutpela malolo wantaim papa God long Heven.

Edita
Leo Wafiwa

"Yuniti, pis na amamas" pilai bai kamap long Arawa

WATSON GABANA i raitim

ANINIT long hettok: "Yuniti, Pis na Rikonsiasen," olgeta manmeri long 12-pela jon bilong Not Solomons provins bai bung long Arawa long Disemba 13 i go 20 long namba wan Mutrus Bogenvil spot tonamen.

Dispela tonamen i bihainim hettok bilong Burhaman Dikreresen, we ol bikman bilong gavman na ol pesman bilong BRA, BTG na BOG i bin sainim tupela wik i go pinis.

Joe Elizah, Pablisiti ofisa bilong Mutrus Bogenvil gem, i bin tok

olsem ol manmeri long olgeta hap bilong provins bai kam bung long Arawa long dispela taim na pilai insait long dispela bikpela tonamen long bringim pis i go bek long Bogenvil.

"Planti manmeri i soim laik pinis long kam long dispela pilai. Na dispela pilai bai stap olsem mak bilong bungim gen olgeta manmeri olgeta hap bilong Not Solomons," Elizah tok.

Elizah i tok tu olsem rot i op pinis long olgeta manmeri long i go kam namel long Buka, Kieta, Paguna na Arawa. Olsem na em tok ol manmeri bilong pilai bai skurim lain i kam long Arawa.

"Dispela pilai bai bungim planti manmeri husat i bin hait na stap insait long bikbus long stat bilong hevi," Elizah tok. "Ol soim laik pinis long kam bung long dispela taim na bungim pes long na wok wantaim long bringim gutpela sindaun i go bek long ailan bilong Bogenvil."

Papua Niugini Spot Komisen wantaim helpim bilong AusAid i baim pinis ol bal na arapela samting long yusim long dispela tonamen. Pe bilong dispela olgeta samting i kos olsem K6,000 na ol ofisel bilong PNGSC bai kisim ol dispela samting i go long Arawa bipo long gem. Dispela ol samting

bilong pilai i stap nau long lukaut bilong Jastus Joseph, Darekta bilong Komisel long PNGSC ofis.

Wanpela wik bipo long pilai, sampela bikman bilong PNGSC na NSI bai go pas long Arawa na karim aut wok rere. Pesman bilong PNGSC na Nesenel Spot Insitut long Goroka; olsem Moses Tolingling, Peter Chalapan, Geoffery Gedion, Aisa Nao, Samu Sasama, Michael Unatah, Raphael Kora na Raphael Sapea bai i go pas long lukautim dispela bikpela tonamen.

Richard Lyons, Provinsel Spot Minista em i stap olsem darekta

bilong dispela gem na: Provinsel Sekreteri bilong BTG em i stap olsem patron.

Jastus tok olsem ol ofisel bilong olgeta kain kain spot bai go pas long ranim wan wan pilai bilong ol long dispela Mutrus Bogenvil gem.

"Bihain long pilai, bai mipela tilim olgeta samting AusAid i baim long olgeta spoting asosiesen long provins," Jastus i tok.

Ol pilaia na sapota bai slip long olpela Arawa teknikal koles. Pilai sapos long stap long 22 i go 28 Novemba tasol ol skurim taim i go bikos ol i ken stretim olgeta ples bilong pilai.

Lapun Luiana bai strongim banis bilong Defence

HENRY MORABANG i raitim

LAPUN na wip yet. Dispela hap tok i save gat kainkain mining. Long soka, lukim Paul Luiana i narapela kain stail. Em i bikman tasol em i strong yet long kik.

Dispela wik long gren fainel, Luiana bai go pas long ol yangpela boi bilong Difens long bungim Rapatona.

Sapos ol lain husat i lukim gren fainel namel long Difens na Guria long 1995 bai save husat em Luiana.

Maski ol biknem straika bilong Guria olsem Linus 'smok balus' Kensap, Mathew Sais o Simon Emmanuel, Luiana i kamapim strongpela banis stret long stapim ol long sutim gol.

Dispela Sande, ol pilaia long Difens bai strong long em. Luiana

i gat eksperiens na em bai go pas long tim.

Luiana i tokim *Wantok* olsem em bai traim hat tru long winim dispela gren fainel. Na em i laik givim dispela gren fainel win i go long olpela soka pilaia bilong Difens, memba bilong B kampani long Taurama Bareks na tu ol sapota bilong klap.

Nau yet Luiana i no bilip olsem Difens i stap pinis long fainel. Sapos long skelim wantaim ol arapela tim olsem Babaka, Rapatona, Guria na Yunivesiti, dispela em wanpela mirakel stret ya.

Luiana em wanpela sajen long PNGDF. Em i bin wok strong tru long helpim kosa bilong em Parkop Komet long redim ol pilaia. Olgeta memba bilong tim i yangpela, na win o lus long gren fainol em liklik samting.

Bikpela samting tru em long redim ol pilaia long ol yia i kam.


Difens i bin bagarap taim bikpela hevi long Bougainvil i kamap.

Kosa bilong Difens, Komet Pakop i tok olsem dispela bai namba wan taim long klap pilai insait long gren fainel bihain long 13-pela krismas.

"Mi ken tingim yet em long 1985, we Difens i bin go insait long gren fainel. Tasol bihain, klap i bin bagarap olgeta bikos long Bogenvil hevi," Komet tok.

Nau yet, Komet i redim ol boi bilong em gut tru i stap long sutim daun Rapatona dispela wik Sande. Olgeta pilaia lusim wok long Mande na redim ol yet long dispela bikpela gem long histri bilong Difens dispela Sande.

"Mi gat bikpela bilip ol long yangpela pilaia bilong mi," Komet tok. "Tasol win o lus i no wanpela bikpela samting long mipela. Bikpela samting, em Difens i stap insait long gren fainel," em tok.



• Paul Luiana.

BIKPELA TOK TENKYU

Mi laik salim bikpela tok tenkyu bilong mi i go long ol dispela pipel na grup long gutpela pasin, helpim na toksore, wantaim gutpela sapot long mani na ol arapela samting wantaim Prea bilong God, long taim mipela lusim pikinini meri bilong mipela. Ol helpim na sapot bilong yupela i min bikpela samting long mi na famili bilong mi.

Leit: SYLVIA BAGAYUA PALIKIN

DAI LONG: Mande Septemba 22, 1997 (6:30am)

long makim maus bilong famili bilong mi, mi ken tok tasol olsem
BIKPELA TENKYU TRU LONG YUPELA OLGETA

Mr & Mrs Arnold & family
YC Kaindi community
Manager - Clover Trading
Mr Otto Lumat
Mr Alois, Haripem & family
Manager - Marani Trading
Mr. Linus Ipu
Mr. Theo Nimbikut & family
Bishop Leo Day High School
• Head Master
• Deputy Head Master
• Teachers
• Students
• Class teacher Grade 8 A
• Fiona - Sylvia's best friend
Mr. Simon Hubert
Mr. Joe Pusakus & family
Mr. Leo Kinminja & family
Mr. Francis Mahap & family
Mr. Joe Ikey & family
Mr. Gamarek & family
Mr. & Mrs. Francis Sapak

Mr. Paul Moiyak & family
Mr. Ruben Niakra & wife
Walu community
Chimbrian community
Nangusara/Wasara community
Chambri Youth
Kaindi Youth
Staff - Nambawan Bakstua
Mr. Emanuel Marop
Mr. Robert Neguei
Mr. Ignas Wani
Mr. Peter Kuian
Mr. Lazarus Pakai
Miss. Mikala Sarrik
Miss Nancy Kipikun
Mrs. Comclia Gawi
Mrs. Jacoba Tom
Mr. Michael Manguan
Mr. Raymond Bakavi
Mr. Jacob Ganyambu
Fr. Jeff Don
Mr. Casper Gondouon

Long ol manmeri husat em nem bilong ol i no kamap long hia, mi salim bikpela tok tenkyu tu long yupela long sapotim mi na famili bilong mi.

Famili bilong mi i kisim gutpela sapot tru i kam long gutpela pasin bilong yupela. Olsem na mi askim God Papa long salim bikpela blesing bilong em long yupela olgeta.

Benny B. PALIKIN na Famili
WEWAK



FRENCH BAKE HAUS PTY LTD

Bikpela tok amamas i go long French Bake Haus
Difens Soka Klap long go insait long 1997
gren fainal bilong Mosbi Soka Asosiesen.



Gut lak i kam long ol sapota.

1997 Mosbi soka gren Difens na

fainal: Lain ap bilong Rapatona

Nem: Luiana Paul
Krismas: 37
Posisen: Midfilda
Ekspiriens: 1982 - 1997

Nem: Metioga Last
Krismas: 23
Posisen: Straika
Ekspiriens: Faivpela yia wantaim Defence.

Nem: Stiven Kila.
Krismas: 27.
Posisen: Midfilda / straika.
Ekspiriens: 1982 - 83; U/19 Rabaul skwat, 85-87
Defence gren-fainol. 1990. POM trening skwat. 12 yia wantaim Defences soka klap.

Nem: Paul Berry
Krismas: 26
Posisen: Midfilda
Ekspiriens: 1994 gren fainol egensim Golo.

Nem: Linus Olsemnok
Krismas: 24
Posisen: Stopa
Ekspiriens: Stat pilai soka long 1994. Namba wan gren fainol egensim Golo. Dispela em namb wan gren fainol long Primia 1



Eliza Selan
Winga

Nem: Raphael Ewih
Krismas: 26.
Posisen: Winga.
Ekspiriens: Stat pilai soka long 1986 long Blue Kumuls Rabaul. Rabaul skwat 1987. Gren fainol wantaim Vitias long Rabaul na Kurti Andra Lahi (94).



Stuart Gai
Lef beks

Nem: Julius Chalapan.
Krismas: 22
Posisen: Rait beks.
Ekspiriens: 1993-1997.

Nem: Albert Maru.
Krismas: 22
Posisen: Straika.
Ekspiriens: Tripela yia wantaim Defence

Nem: Robin Sino.
Krismas: 25
Posisen: Rait beks.
Ekspiriens: 1995-1997

Nem: Vincent Wriken
Krismas: 25.
Posisen: Midfilda.
Ekspiriens: 1993-1997

Nem: Teran Ondem
Krismas: 21
Posisen: Midfilda
Ekspiriens: 1992 - 1997



Robert Dramoi
Golkipa



Basil Asiara
Swipa




Linus Olemnok
Stopa



Peter N. Mathew
Midfilda



David Kaepara
Straika



Vincent Wriken
Midfilda



Stiven Kila
Straika



Robin Sino
Rait beks

Nem: Philip Kule.
Krismas: 26
Posisen: Midfilda
Ekspiriens: Namba wan taim long pilai insait long gren fainol.



Raphael Ewih
Winga

Nem: Eliza Selan.
Krismas: 25
Posisen: Midfilda.
Ekspiriens: 1988 wantaim Leipon (Manus), Klap sem-pionsip long 1990. Gren fainol egensim Guria long PMSA 1990.

Nem: Bomsen Lem.
Krismas: 23.
Posisen: Winga.
Ekspiriens: Stat pilai soka long 1994. Tasol dispela em namba wan gren fainol bilong mi.

Nem: Robert Dramoi.
Krismas: 26
Posisen: Golkipa
Ekspiriens: Namba wan taim long pilai insait long gren fainol.

Nem: Brian Whai
Krismas: 26
Posisen: Midfilda.
Ekspiriens: Namba wan taim long pilai insait long gren fainol.

Nem: Peter Naps Mathew
Krismas: 25
Posisen: Midfilda
Ekspiriens: 1986-U/16 POM, '89 U/19 POM & 97 Defence PMSA.



Risev

Julius Chalapan Metioga Last Luiana Paul Albert Maru Philip Kule Bomsen Lem Teran Ondem

fainal: Lain ap bilong Rapatona



Peter Panau
Winga



Mark Lowap
Rait beks



Molean Kilepak
Straika



Panu Karrol
Midfilda



Duri Yarawi
Stopa



Less John
Swipa



Willie Bera
Golkipa

Nem: Willie Bera.
Krismas: Posisen: Golkipa.
Ekspiriens:

Nem: Pascalis Atalou
Krismas: Posisen: Straika
Ekspiriens:

Nem: Duri Yarawi.
Krismas: Posisen: Stopa.
Ekspiriens

Nem: Paul Kailou

Nem: Clement Anison
Krismas: 30
Posisen: Midfilda/Winga na Difenda.

Ekspiriens: Melo kap trening skwat 1989 / 90. SP gems 1991



Pascalis Atalou
Straika



Geoffrey Emang
Midfilda



Daniel Nelson
Lef beks



Clement Anison
Winga

Nem: Clinton Caleb
Krismas: 26.
Posisen: Midfilda / Difenda.
Ekspiriens: Fes taim long pilai insait long fainol.

Nem: Clement Anison
Krismas: 30
Posisen: Midfilda/Winga na Difenda.
Ekspiriens: Melo kap trening skwat 1989 / 90, SP gems 1991

Nem: Clinton Caleb
Krismas: 26.
Posisen: Midfilda / Difenda.
Ekspiriens: Fes taim long pilai insait long fainol.

Nem: Willie Bera.
Krismas: Posisen: Golkipa.
Ekspiriens:

Nem: Duri Yarawi.
Krismas: Posisen: Stopa.
Ekspiriens:

Nem: Pascalis Atalou
Krismas: Posisen: Straika
Ekspiriens:




Nem: Paul Kailou



Risev

Tarzan Tutua Clinton Calep Paul Kailou

WANTOK SPOT



Rapatona gat moa sans egens Difens

WATSON GABANA i raitim

DISINI soka graun bai paia long Sande dispela wiken taim Rapatona wantaim French Bakehaus Difens bungim pes insait long gren fainol bilong Mosbi soka resis.

Rapatona, husat i gat planti ekspiriens na biknem pilaia bai traime olgeta teknik na save bilong ol long stapim ol soldia boi bilong Taurama na Murray Bareks. Kain ol biknem PNG pilaia olsem: Willie Bera, Duri Yarawi, Karoll Paniu, Geoffery Emang, Peter Punau na Paskalis Atalou bai

kamapim strongpela banis long stapim ol soldia boi i no ken brukim banis bilong ol.

Narapela samting tu, Rapatona i bin winim olgeta do-o-dai gem i kam na ol stap antap tru wantaim hai spirit. Kosa bilong Rapatona, Robert Popat tu i gat bikpela save long senisim pilaia na gem plen. Olsem na ol i stap long gutpela sans bilong winim dispela taitel. Na tu, gren fainol i no nupela samting long ol boi Rapatona. Ol i bin pilai insait long 1995 egensim Momase na ol save wanem samting long mekim.


Tasol long sait bilong Difens, olgeta i nupela manki tasol long

kain bikpela gem olsem. Laspela taim ol i bin pilai insait long wanpela gren fainol em long 1985. Dispela em klostu 13-pela krusmas i go pinis. Tasol dispela i no inap larim ol daun. Kosa bilong ol, Pakop Komet sindaun pinis wantaim ol manki bilong em na skulim ol long wanem kain teknik ol boi bilong em bai yusim. Ol yangpela blut olsem, golkipa Robert Dramoi, Linus Olsemnok, Elizah Selan, David Kaepara, Paul Berry na Robin Sino bai yusim mejik bilong ol long sutim daun Rapatona.

• Lukim moa stori bilong PMSA gren fainol long pes 25, 26 na 27.




• Joe Aisa bilong Yuni soim stail tasol em salim long Rapatona las wiken. Rapatona win 3-1. Foto: Ivan Bayagau.



(Lephan) Robert Popat

VS

(Raithan) Komet Parkop



Ol wina bilong Cambridge Painim Bal resis


SAPOS yu salim entri long Cambridge Kap Painim Bal resis, putim yau long Kalang FM long Fraide nait, bikos nogut yu winim sans long kisim fri balus tiket long kam daun long Mosbi long lukim 1997 Cambridge Kap gren fainol namel long Goroka Tarangau na Vudal Kaubois, em bai kamap long Mosbi long neks wiken.

Anaunsa Patrick Patu husat save tokaut long ol prais stat long resis ya i stat i kam inap nau, bai go het yet long tokaut long nem bilong wina.

Em i tok sapos ol lisina i abrusim em long Fraide nait, putim yau gen long Sarere na Sande.

Gutpela nius long dispela resis em 50 arapela manmeri husat i salim entri bai gat sans long winim tu fri geit tiket bilong go insait long Mosbi Ragbi Lig graun na lukim pilai.

Taim dispela resis i bin stat, moa long 800 entri i bin kam insait. Na Rothmans kampani, husat save mekim Cambridge i givim aut moa long 400 fri geit tiket long ol manmeri husat i makim stret hap long poto em bal i sindaun long resis.



• Patrick Patu - Kalang Radio and George Tymoc - Marketing Menesa bilong Rothmans sekim ol entri long makim wina.

Poro bilip long autim LFA taitel

BUSTIN ANZU i raitim

NUPELA tim long primia gret bilong Lae futbol asosiesen (LFA), Poro bai bungim pes wantaim las yia maina primia, Mopi long gren fainel bilong LFA soka resis dispela wiken.

Mopi i bin rausim tiket bilong dispela yia maina primia, Shorncliffe Blue Kumuls 2-1 tupela wik i go pinis long bukim gren fainol. Long las wiken, Kumuls pundaun gen long but bilong ol yangpela blut bilong Papuan Kompaun, Poro na hagamapim su olgeta long dispela sisen.

Long meja semi fainol gem las wik, Poro i bin rausim tiket bilong Kumuls 1-0 long pilaim Mopi insait long gren fainol.

Long dispela Sande, Mopi bai pasim olgeta liklik spes na traime long stapim na bagarapim sindaun bilong Poro.

Tasol ol boi Poro i no inap larim dispela win ranawe long han bilong ol.

Kosa bilong Poro, Yana Wansom i tok olsem ol manki bilong em stap nau long hai spirit. Olsem na ol i no inap pilai kaskas wantaim ol boi long Morobe Patrol Post.

Em tok, yangpela blut bilong Papaun Kompaun bai yusim nupela stail na kirapim das long LFA pak dispela Sande.

"Mipela i no wari long ekspiriens bilong ol Mopi pilaia," Yana tok. "Mipela i bin winim divisen gren fainel las yia na mipela save long presa bilong pilai insait long fainols," em tok.

Mopi i bin winim dispela taitel las yia na ol i no inap larim dispela taitel bilong ol lusim ol.

Wantaim ekspiriens bilong Jonathan Dote na arapela yangpela pilaia, ol bai givim Poro wanpela strongpela salens.

Telikom redi long daunim Unitech long Lahi soka

Telikom soka klap, husat i bin joim Lahi soka asosiesen long stat bilong dispela sisen bai bungim pes wantaim Unitech long maina eliminesen fainel long Sir Ignatius Kilage Stadium dispela wik Sande. Wina bilong dispela pilai bai salensim lusa bilong Guria na Sobou neks wiken long meja semi fainel.

Telikom bin winim Asiaew 2-1 na kisim tiket bilong pilai insait long dispela namba tu gem bilong ol eliminesen fainol.

Kepten bilong Telikom na intanesenel fulbek bilong PNG, Gidix Nasa i tok olsem dispela pilai egensim Unitech bai i no inap isi. Em tok ol manki Unitech i bin lus las wiken na long dispela taim, ol bai strongim sait bilong ol long win. Olsem na ol bai kam strong long olgeta dipatmen insait long pilai graun.

"Mi rispektim ol boi Unitech. Ol lus las wiken long penalti sut aut. Nau ol bai kam bek strong egensim mipela," Gidix tok.

"Olsem na mipela i no inap pilai kaskas. Bai mipela strongim kona bilong mipela na winim dispela do-o-dai gem bilong mipela," em tok.

Gidix tokaut olsem olgeta manki bilong em husat i bin pilai las wiken bai pilai gen long dispela Sande.

Ol boi Telikom husat kepten Nasa ting bai bringim hetpen long ol sumatin bilong Unitech em: John

Koris na Ruben Yanga long midfil, Ambrose Pui na John Bal long wing, Richard Karisan na Nicolas Pui long straika na Nopi, Terence Anini, Theo Doweno na Gidix long beklain. Golkipa bai Tenge William. Kepten tok, olgeta pilaia long wan wan dipatmen bai mekim olgeta mas mekim olgeta wok.

"Sapos mipela laik win, ol boi bilong mi mas pilai strong insait long dispela ful 90 minits. Dispela em wanpela gutpela sait bilong mipela. Mipela i ken pilai 90 minits futbol. Tasol ol birua bilong mipela i no inap," Gidix tok.

Narapela samting Gidix tok bai helpim Telikom long winim dispela gem em sapos ol i ken pilai insait long kompaun bilong birua planti taim.

"Sapos mipela laik win, mipela mas pilai planti taim long teritori bilong ol birua," em tok. "Long dispela rot, bai mipela i ken putim presa long ol na mekim ol kamap wantaim sampela paul pilai we mipela i ken isi long skoa."

Long arapela sait, ol sumatin long Unitech i no inap larim dispela gem ranawe long han bilong ol. Tim menesa, Pulas Yowat i tok olsem Telikom i gat gutpela na ekspiriens pilaia. Tasol ol boi bilong em bai yusim gem plen bilong ol na stapim Telikom.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.